مسرحية المسرحية المسر



ترجيها للعامية مصطفى صفوان

مسرحية

تأليف: وليم شكسبير

ترجمها للعامية: مصطفى صفوان

الناشر مكتبة الأنجلو المصرية ١٦٥ ش محمد فريد ـ القاهرة اسم الكتاب: مسرحية عطيل

المسؤلف: وليم شكسبير

ترجمها للعامية: مصطفى صفوان

الناشير: مكتبة الأنجلو المصرية

تليفون: ٣٩١٤٣٧ / فاكس: ٣٩٥٧٦٤٣ (٠٠)

رقم الإيداع: ١٥٩٤٣ / ١٨

ترقيم دولـــى: (I.S.B.N.977-05-1663-5) : ترقيم دولـــى

تصميم الفلاف: الفنان / محمود القاضي

طبياء : دار اللواء للطباعة ـ تليفون: ٢٨١٦٧٠ - ٢٧٩٢٩٤٨

مقدمة المترجم

احنا ما فيش داعى نتحذلق فى المسائل الإلهية، علشان التقاليد
 اللى ورثناها عن أباهتنا واللى عمرها قديم قدم الزمن نفسه، ما فيش
 حاجة تقدر تكسرها، مهما أتفننت الأمخاخ السوفسطائية،.

يورييدس

الغرض من الترجمة إلى اللغة العامية واضح: إن ييجى اليوم اللى فيه محمد على عبد المولى والملايين اللى زيه يقدروا يقروا فيه كبار الكتاب من عندنا ومن عند غيرنا باللغة اللى رضعوها على صدر أمهاتهم واللى عاشوا بيها وفيها وماتوا وهم بينطقوا بيها.

الشعوب الحية مدينة بحياتها للأقلام، مش لأن أصحاب الأقلام بيوعُوها؛ الناس ـ يكفى تسمع نكاتها ـ عارفة كل حاجة ، وبالأخص عن السلطة وشهوتها ، عن الحكم وجبروته ، عن القوة وتوزيعها بين الناس بعضهم فوق بعض طبقات ، وعن الممالأة الكدابة في كل تمجيد . لكن الأقلام الكبيرة هي المتنفس الأول للحقايق الأخيرة ، واللي يواجه الحقيقة ما يخافش من سلطان .

إحنا مدنية من المدنيات اللي اخترعت الكتابة من خمس تلاف سنة (١) لكن الدولة عملت منها سر موقوف على كتبتها، فكانت النتيجة إن إحنا لازلنا إلى حد بعيد أميين، ربما كانت نسبة اللي بيقروا ويكتبوا بينا ماتزدش كتير عنها بين اليونانيين في القرن الخامس قبل الميلاد.

كذلك لغة الأدب، فصلنا بينها ربين عامة الناس، فكانت النتيجة

 ⁽۱) أقصد كنابة المقاطع والحروف لأن الكتابة بوجه عام موجودة في كل مكان فيه مجتمع إنساني وفيه لغة

إن الحكم قدر يستفرد بكل شاعر أو عالم أو فيلسوف خرج كلامه عن اللى واجب يتقال، وما فضلش فى الساحة غير أنصار السلطان، لدرجة إن الواحد يمكن يسأل هل الكتابة بلغة ما يفهمهاش إلا الخاصة ما كانتش أكبر فخ ـ وبلاش نقول فخ نرجسى ـ وقع فيه الكتاب، بحيث صاروا طايفة، زى البراهمة، يكتب بعضهم لبعض وكأن كل واحد فيهم بيكتب لنفسه.

مين يقدر يتصور أوربا كان حيكون إيه مصيرها لو أن اللاتينى فضل فيها لغة الأدب والعلم والفلسفة، كسر الإحتكار ده له قصة يصح نسرد حكايتها هنا ولو باختصار.

أول من كلم الناس فى أوربا بلسانها اللى ما أخدتهوش من معلم يلقنها صرفه ونحوه، واللى به فرحت أو زعلت، حبن أو اتحاربت، تاجرت أو غشت، واللى بيه أخدت مع بعض - بالصدق أو بالكذب عهود، كان المجانين، أقصد شعراء الحب، خصوصاً فى جنوب فرنسا وكان فيها أكتر من لسانين، وفى إيطاليا - وكان فيها من الألسنة العشرات - دانتى جه بعدهم وكان متبحر فى آداب اللغة اللاتينية، بجل فرجيل - أمير الشعراء فى نظره - تبجيل التلميذ للأستاذ، وانتهى إلى أن أعظم الشعر، يعنى اليونانى واللاتيني، هو اللى كان له قواعد وأصول، أو زى ما بيقول بيرم:

الوكنت يا فن مجعول لك قانون ونصوص لك تانون الكنت زى الكواكب في السمال الماع، لكنت زى الكواكب في السمال المناع، في في في على أنه يكتب عن الأشعار المنظومة باللغات الحية في

زمنه كتاب يعادل فن الشعر بتاع هوراس، ومن هنا جه عنوان كتابه: الفصاحة في العامية(١).

يبتدى الكتاب بالتمييز بين اللغة العامية، اللى هى اللغة اللى كانا بنتعلمها من غير تدريس، بتقليد مرضعاتنا، وبين نوع تانى من اللغة، ثانوية بالنسبة لنا، إللى هية الرومانيين بيسموها نحوية، ثم بعد التمييز ده يقول: وبين النوعين دول من اللغة، الأنبل هى العامية، جملة مافيهاش تعقيد؛ مبتدأ وخبر وراه نقطة، ولكن دى هى الجملة اللى انصاغ فيها إعلان إستقلال اللغات الأوربية.

بعد كده يوضح أسبابه: «أولا، لأنها اللى البشر بتبتدى بيها؟ وثانيا، لأن كل الدنيا بتستخدمها وإن يكن بنطق متنوع وكلمات مختلفة؛ ثالثا، لأننا مطبوعين عليها، بينما الثانية بتتوجد بالصنعة،.

ونظرا لأن المسألة وإن كانت تخص بالتحديد الطلياني واللاتيني، مسألة عامة وممكن تنحط في أي مكان أو زمان، فخطوة دانتي الثانية هية محاولة تعريف وظيفة اللغة أولا وتاريخها ثانيا.

التعريف الأول يستاهل ذكره بالنص، قال: «نظرا لأن الكائنات الإنسانية مابتحركهاش الغريزة وإنما بيحركها العقل، ونظرا لأن العقل بيختلف من فرد لفرد، حسب قدرته على التمييز والحكم أو الاختيار، كما لو كان كل واحد بيتمتع بالوجود كأنه نوع في حد ذاته، فلا إحنا نقدر، زى الحيوان، نفهم أعمال الغير ودوافعه بمشورة طبيعتنا؛ ولا إحنا نقدر نعرف فكر الآخرين بالقبول الروحي، زى الملايكة. لأن النفس الإنسانية محدودة بتقل الجسم وكثافته.

⁽۱) الكتاب دا نشرته دار جامعة كمبردج سنة ۱۹۹٦، أصل وترجمة، مع مقدمة وهوامش بقلم ستيفن بوطيرل.

من هذا كان لازم إن أعضاء الجنس البشرى، عشان تتبادل أفكارها، تكون عندها علامات مكونة من المعقول والمحسوس، والمقصود بالمعقول هذا هو المعنى، أما المحسوس فهؤه الصوت اللى يدل عليه.

أما عن التعريف بالتاريخ فيتلخص عند دانتى فى سرد حكاية نمرود اللى حرض البشر على بناية برج يناطح السما، فكان عقابهم إن ربنا بلبل السنتهم، فتعددت اللغات بعدما كانوا بيتكلموا لغة واحدة.

بعد المقدمات النظرية دى يتساءل دانتى ـ وهنا ببان المرمى السياسي، مش بس الأدبي، لكتابه ـ عن أيه هيه اللغة بين اللغات الجارية في إيطاليا ـ وكان فيها على الأقل ١٤ لغة ـ تستاهل تكون لغة الحكم، أو بالأصبح إيه هيـة اللغـة اللي ممكن تدى لإيطاليـا وحـدة في غياب كل حكم سياسي موحد. الجدير بالذكر هنا إن المعيار عنده ماكنش الأحلى أو الأنفع، وإنما: إيه هية اللغة اللي تناسب مقتضيات الشعر أكثر؟. لأن اللغة الشعرية تمتد قوتها وأصداءها في رأيه إلى أبعد من حدود الشعر نفسه، بل إلى أبعد من كل تصور جمالي للغة، إلى الدخول في معارك الحياة نفسها وفي التباستها. هنا تبتدي في الجزء الثاني من الكتاب صفحات من التحليل اللغوى والنقد الفني تعتبر الأولى من نوعها في تاريخ الأدب الأوربي في العصر الوسيط، ولكن الكتاب مايكماش، يقف في نص الجملة وأغلب الظن إنه وقف الأنه وجد إن المسألة ما تنحلش بالمقارنات النظرية وإنما بضرب المثل فعلا: ومنه إنعكف على كتابة الكوميديا اللي بتعتبر لغاية النهاردة أعظم عمل شعرى في تاريخ الأدب الأوربي، واللي إدّت للغة الإيطالية فعلا شكلها المعروف لغاية دلوقت.

أتصور إن القارئ راح يقول هنا إن المقارنة بيننا وبين أوربا فيها تجاهل للفارق، وهو أن الفصحى عندنا ماهياش بس لَغة الأدب وإنما لغة القرآن.

الرد هُوه إنه إذا كانت كرامة القرآن جاية من كونه ركيزة الإسلام وحصنه، فالإسلام آمنت بيه شعوب تختلف لغاتها نماما عن اللغة العربية، كما أن فيه بالمقابل ناطقين بالعربية فضلوا على النصرانية.

فإذا كان الأمركده، فإيه ذنب الإسلام في نظم من الحكم بقى لها دلوقت خمس تلاف سنة، عمر السلطة فيها ما انتقلت من إيد لإيد إلا بالعنف، فالحاكم متى مسك الصولجان مايسيبوش إلا ميت أو مقتول.

صحيح إن فكرة الجماعة ربما كانت جزء لايتجزأ من الإسلام، ولكن حتى لو سلمنا بكده، فالمقصود جماعة المؤمنين مش الجماعة السياسية: جماعة المصريين مثلا، أو العراقيين، أو التونسيين، إلخ وبلاش نتكلم عن اللى وجودهم السياسي خلقه الاستعمار.

فإذا كان الأمركده فالإسلام بخير وأمان، لأن الدين هو الركيزة الأولى لإحتواء الإنسان في الحياة الاجتماعية، تفتكر العراق كان ممكن يحصل فيه اللي بيحصل لو كان العراق بلد مسيحي؟، مش ممكن الواحد يقول هنا إن الوجود أو الإجتماع السياسي هوه اللي بيشل الجماعة من حيث هيه جماعة المؤمنين؟!، ثم عشان نأخذ أمثلة من اللي تلاقيها في كتاب تصادم الحضارات اللي كانت له في أمريكا وأوربا شنه ورنه، هل دى صدفه إن حلف الأطلاطي يقف عند الخط اللي تبتدي عنده المسيحية الشرقية، يعنى الأورثوذكسية؟!، أو هل دى صدفة إذا كانت

تركيا المسلمة واقفة تستجدى الدخول في السوق المشترك زي العطشان اللي ماحدش راضي يديله قلته؟!.

مالرو قال: «القرن الواحد والعشرين حايكون قرن تدين أو مش حايكون». ماتقوليش: حايكون قرن العلم، المسألة تنحصر في تعريف القدرة المطلقة. ومافيش أي شك في إن الإيمان بقدرة الله أحكم وأشد أمان في عواقبه من الإيمان بقدرة العلم. فطلب الخلود عند الإنسان شيء طبيعي، ليه هو ينفرد بمعرفة إرتباط الحياة بالموت من غير تعويض أو طلب الحياة الثانية من ربنا، أقل ما يقال في الدفاع عنه إنه مشروط بفعل الخير أو الشر، يعني يتضمن على أي حال تحمل من السائل لمسئوليته، أما في عصرنا، عصر الحقوق الأمريكانية، الإنسان، كأن الإنسان ماعليهوش واجبات، فبعد القانون الروماني ماحول جسمه إلى ملكية زيها زي السلعة، لو واحد قلع عينك يدفع لك عليها تعويض، صار الجسم دلوقت بفضل العلم ماكينة ينشال منها اللي ينشال وينزرع على كل حياة بلا قيد ولا شرط، فإذا ماكنش ده هو الجنون بعينه، يبقى على كل حياة بلا قيد ولا شرط، فإذا ماكنش ده هو الجنون بعينه، يبقى الهداون؟!.

أضف إلى كده إن العلم جمع أطراف الكرة الأرضية ووحدها توحيد ماقدرش عليه أى دين، ولكن المشاهد هو إنه كل ما زالت الصفات اللى كان بينبنى عليها التعريف بالجماعات صارت أى صفة صالحة النهارده لتحديد ذاتية تتعرف بيها وتتكون على أساسها جماعة من الجماعات، حتى الصفات الخاصة بالسلوك الجنسى ـ على الأقل في

أوربا وأمريكا(*) ـ وكأن العالم كل ما اتوحد كسوق، كل ما اتفرتك فرق وجماعات.

أرجع لرأيي إذن، وهو إن الشعر هُوه اللي خلق أوربا، حرر لغاتها، فاتحرر الأدب والفكر، وإذا حبيت تبص للجزء الشرقي منها ، وروسيا بالتحديد، حاتلاقي إن شعور الشعب الروسي بذاتيته لاهو مرتبط بالدولة ولا بالأرض ولا حتى بالدين، وإنما بحلم عن روسيا خلقه كتابه من بوشكين وجوجول إلى شالاموف وصولْنتسين، الشعوب بيخلقها الكتاب، شعب من غير كتاب يكتبوا بلسانه جثة من غير روح، مصيرها ولو طوّل آلاف السنين - هو الفساد، وإذا كان العلم له مخاطره اللي لا يستهان بها، فالأدباء - إقرا جونتر جراس مثلا أو بيكيت - هما برضه القادرين وحدهم على التذكير بالحقيقة وحماية العقل بقدر ما تمكن حمايته في وجه السلطان الجديد، قادرين لأنهم بيكلموا الناس بلغتهم، وبرهانًا على كده وعملا باللي عملوه إخترت الترجمة إلى العامية.

يفضل السؤال: وليه شكسبير؟، لأنه أشعر خلق الله، فإذا العامية ساعته، يبقى حاتضيق على مين؟.

وليه عطيل؟ لأن عطيل راجل بيتكلم وكأنه بيبص فى مرايا شايف فيها صورة مكونة من كل مايبهر العين ويعجب المجتمع، وإيه السبب فى الوجود الملزوق بالصورة المثالية دى؟!، هوه نطق بيه لما شكسبير، بحدسه الإلهى، خلاه يقول: «آدى نكبة الزواج، يخلينا نقول إننا نمتلك المخلوقات الرقيقة دى، من غير مانمتلك شهياتها، يعنى مش

^(*) الرجاله اللى بتحب الرجاله أصبحوا جماعة تطالب بحقوقها، وكذلك النسوان اللى بتحب النسوان، والعاطلين عن العمل اللى أصبحوا جزء لا يتجزأ من المجتمع، ده غير الشيع الدينية وانتحارها الجماعي في بعض الأحيان، وازدياد المطالبة بالإستقلال على أساس الجغرافيا أو العرق أو الدين أو اللغة في كتير من البلاد، إلخ... إلخ.

قادر يدخل في دماغه إن الرغبة في جوهرها هبه، مش مكفيه إنه حظى برغبة دسدمونه، لكن كمان عاوز يمتلكها بحيث يستحيل إستردادها أو توجهها لشيء غيره كأنها بيت أو غيط أو بقرة. ودا طبعا شيء مستحيل إلا إذا اتحولت إلى أيقونه أو تمثال أو جثة هامدة.. وبالفعل قتلها، الفرق بينه وبين ياجو إن واحد سخطه على الوجود ظهر في القتل مباشرة، والتاني قتل بعدما اتجاوز الخط اللي مافيش للحب حياة إلا في حدوده، الاثنين واحد. واحنا مجتمعات الحكم فيها سوى كان قراقوشي أو انتخاباتي، ما هواش بصوت الأغلبية، مرة عليه ومرة عليك، وإنما لصوت القدوة، والقدوة تنعجن في المثاليات، صحيح المثاليات ما فيش منها ضرر مادام المأخوذ بيها بيعمل المجهود اللازم علشان يبقى في مستوى الصورة، ثم إن فيه مثاليات معقولة زي إن الواحد إذا مسك شغلة يعملها كويس أو إذا اتكلم يقول كلام في محله، أو إذا حكم فبالعدل ولو على نفسه .. إلخ. ولكن التمييزات دى كلها ما أسهل ضياعها إذا كان القانون في إيدين سلطة هي نفسها لا تخضع لقانون أو دستور(١)، فضلا عن إن دور «الميديا، في عصرنا بيخلي الساسة في جميع أنحاد العالم بتهتم بصورتها أكثر مما تهتم بما يسمى في القانون الروماني باسم والقضية العامة.

عطيل هي أكبر مسرحية أعرفها ممكن تخفف من حدة الإنبهار الطبيعي المتيم بالمثاليات لدرجة تضيع كل تفكير.

* * *

⁽۱) زى الميثاق اللى الملك إدوار مضاه سنة ١٢٩٧ واللى اتبنى عليه البرامان الإنجليزى. تاريخ أوربا ممكن تلخيصه في سلسلة من العهود والمواثبي، اتقسمت القوة بمقتضاها بين الدولة والكنيسة أو بين الباباوات والأباطرة، بين الأباطرة والملوك، بين الملوك -

تفضل الشهادة بأني ماوجدتش في الترجمة إلى لغتنا العامية صعوبة تزيد عن الصعوبات اللي ممكن تواجه الترجمة إلى أي لغة لعمل زى ده: الاستعارات اللي يضيع جمالها ووقعها لأن الكلمة المستعارة مالهاش نفس المستدعيات في ذهن قارئ الترجمة؛ أو التعريجات الفكرية المبنية على كلمة في الأصل لها معنين؛ أو التركيبات النحوية اللي تستدعى تصرف جديد في التقديم والتأخير أو الفصل والوصل؛ أو الحذف اللي لا يمكن فهمه إلا إذا بدلته بالذكر؛ أو المعانى اللى تستوجب تعبيرات تانية تلمس أكثر الحساسية اللغوية للقراء؟ إلخ.. إلخ. فيه طبعا شيء ما فيش ترجمة تنقله، وهوه اللي سماه أحد النقاد وموسيقي عطيل، لأنها نابعة من أصوات اللغة الإنجليزية نفسها، لكنى حاولت أدى بقدر الإمكان ترجمة تتسمع قد ما تتفهم وإذا كان الكمال مالوش تعريف غير إنه حافز من الحسن للأحسن. فرجائي إن ترجمات ثانية أحسن تظهر(١)، وبالنسبة للترجمة دى أكون شاكر للي يدلني فين(١) أخطاءها عشان أصححها. المهم إنه يكون منتبه إلى إن فكرة المترادفات فكرة مالهاش أي نصيب من الصحة. فالكلمة أيا كانت، من حروف الجر إلى أسماء الأعلام، إستخدامها وخصوصا

⁻ والبرامان، أو بين السلطات النشريعية والتنفيذية والقضائية، سر قوة أوربا هو بالصبط تقسيم القوة بين الانجاهات المختلفة في المجتمع السياسي ومابقواش الجماعة بدل احتكارها استنادا إلى خلط مخيف ومنافق بين الكيان السياسي وجماعة المؤمنين، مما لا يجعل مجال التعامل مع من اختلف إلا اعتباره خارج والقضاء عليه .

⁽١) معظم اللغات الأوربية فيها أكثر من ترجمة لأعمال شكسبير.

⁽٢) باحطُ خط تحت افين، لأن واحد صحفى كتب فى موقف من مواقف عن ترجمتى لا) باحطُ خط تحت المعلم الله واحد صحفى كتب فى موقف من مواقف عن ترجمتى لكتاب تضير الأحلام فقال إن الأخطاء تتعد فيه بالعشرات بل بالمئات قلما اترجيت إنه يذكر ولو خطأ واحد ، لختفى الجبان ورا رئيس تحريره اللى رفض حتى نشر الطلب.

الاستخدام الشعرى بيحرك نظام اللغة كله، بحيث تاخد منه وقع وتضمينات يستحيل نقلها هيه هيه إلى لغة تانيه. وربما كان الأكتر من كده إن كل لغة، زى ما قال أكبر شاعر فرنساوى معاصر ايف بونفوا، في كتاب صدر له أخيرا عن شكسبير وبيتس، بتشيل معاها فلسفة مطبوعة فيها ضمنا، الكلام ما يصرحش بيها لكن بيفترضها. فاللغة الفرنسية مثلا تبص للكليات أولا ومن خلالها للجزئيات باعتبارها أمثلة وشواهد عليها. ومن هذا الصراع المسرحي، عند راسين مثلا، وجب يكون صراع معقول زي الصراع بين الحب والواجب، أو بين خيانة الحاكم أو خيانة الصديق. أما اللغة الإنجليزية فعلى العكس تماماً، الفرد له في نظرها الصدارة، وعن طريق الصراع غير المفهوم اللي هوه فریسته، زی تردد هاملت، ممکن تفهم شیء عن ارتباطاته بالقوانین الكلية، ومن هنا تكون ترجمة شكسبير إلى الفرنسية ماهياش ، فرنسه، ، وإنما بالعكس: مجاهدة للنفس علشان تطويع اللغة الفرنسية لفلسفة غريبة عليها. نفس الكلام ممكن يتقال عن الترجمة للعربى. صحيح أنا ماسمعتش كلام إتقال عن الفلسفة المبثوثة ضمنا في اللغة العربية، ولكن إذا حد سالني، قلت: يتهئ لي إن اللغة العربية بتغرق الكون كله في حضور مترستق كل شيء واخد فيه مطرحه نحت نظرة تحميه وتحمي (منه ؟!) الكل(١) . ودى فلسفة الواقع يكذبها كل يوم مليسون مرة لكن مايغيرهاش لأن التخاطب نفسه صار مبنى عليها. المهم إذا آخذنا بالنتيجة هوه إن الترجمة للعربي ماهياش وتعريب، وإنما بالعكس استخدام للغة علشان الخروج من أسر اللغة. ودا هدف مايتحققش بمجرد

⁽۱) إذا كان الكلام ده صحيح يبقى فلسفة اللغة العربية انقلبت ۱۸۰ درجة بعد ظهور الإسلام لأنها قبل كده كان محورها بالعكس الزوال. شوف فى الموضوع ده كتاب الأستاذ سلام الكندى عن الشعر الجاهلي، اللي صدر له أخيرا بالفرنساوي عن دار سندباد.

نقل المعانى أو المدلولات السطحية؛ الشكل أو طريقة استخدام الدوال هنا أهم، إذا الكاتب وصلِ شعوره بالسياده لدرجة كسر النحو إكسره. وإذا اختزل إختزل. أو هدر؛ فاهدر. ومن المعروف إن النثر بيخلى الكلمات تخسر جزء كبير من الدسم اللى لها في النظم، ومن هنا يبان النقص الأكبر في الترجمة دى، إنها نثر بينما الأصل نظم إلا في بعض المشاهد اللى النثر لها أنسب، ولكن ﴿لا يكلف الله نفسا إلا وسعها﴾، ماقدرش أقول إنى عملت الترجمة دى على أمل إن الباب ينفتح اللى ممكن يدخل منه صلاح چاهين أو فؤاد حداد جديد، ينقل لنا شكسبير وغيره، أو بالأصح ينقلنا لهم؛ لأن حتى الأمل الأخير ده - إذا حبيت الحقيقة - إنقطع، أقول إنها شهادة إنى عملت اللى أقدر عليه، علشان أكسر حاجز انضرب علينا من الأزل بينًا إحنا «المتعلمين»، وبين عامة الناس.

أخيراً أقول الى يعنيهم الأمر إنى إستشرت فى الترجمة دى طبعات كثيرة، أهمها سوان وكمبردج وآردن. ومن المعروف إن الطبعات دى بتختلف فيما بينها. لأن أقدم المخطوطات الموجودة لعطيل هى نفسها بينها اختلافات، سوا لأن شكسبير نفسه كان أدخل تعديلات، أو لأن المخطوطات أملاها ممثلين مااتفقتش دايما ذاكرتهم. فى حالة الاختلاف أخذت بالنص اللى بان لى يأدى المعنى بشكل ماشى أكتر ولكن اعتمادى فى النهاية كان على طبعة آردن التالتة اللى ظهرت فى العام الماضى (١٩٩٧) على يد هونيجمان، فهى قطعا بمقدمتها وهوامشها وملحقاتها، أحسن نشرة ظهرت لعطيل حتى الآن بل ربما لعدد كبير من السنين اللى جايه(١).

⁽١) اكتفيت بالإشارة إليها إذا احتاج الأمر تحت اسم آردن.

** تعقیب :

بعد كنابة المقدمة دى، قريت كناب دومينيك قالبل عن ناريخ الدولة الفرعونية، دار المنشورات الجامعية الفرنسية، ١٩٩٨. وقعت فى صفحة ١٩٩٨ على جملة وردت عن كاهن من كهنة هيليوبوليس قال المؤلف إنها غير مألوفة فى تاريخ الفكر المصرى، هى:

«ياريت أملك تعبيرات مجهولة، صيغ أصيلة معمولة من ألفاظ جديدة مامرش عليها الزمن، مجردة م التكرار، خالية من الصيغ المنقولة سمعاً، واللي سبق ونطق بيها السلف،

فاكتشفت في الجملة دي، بعد ما نمت الترجمة، الرغبة اللي صدر عنها المشروع ده كله!!.

مصطفی صفوان الغردقة ۸ فیرایر ۱۹۹۸

** شكــر **

الارتباط الطبيعي بالوطن وجد صداه اللي قواه عندي عشرين مرة عند المرحومة إنجى أفلاطون، الترجمة دي تذكار لها.

نهاد سالم هي اللي عرفتني بصلاح چاهين اللي لمست عنده لأول مرة فصاحة لغتنا العامية وحيويتها.

الأصدقاء اللى الدكتور حسين عبد القادر قرأ عليهم صفحات من الترجمة وأبدوا ملاحظات استفدت منها كتير. أشكرهم وأخص بالشكر: صديقى محمد عودة، فماظنش إنى كنت حلاقى نفس وصبر على الشغله دى لولا زقه ولولا إن حماسه عدانى.

أما الدكتور حسين عبد القادر فكان شريكى فى العمل من الألف للياء، قرأ كل سطر وصحح وحسن وعدل ونبهنى إلى أخطاء لو فضلت لكانت النتيجة جت مشوهه تشويه جامد. دا غير إنه هوه اللى قرر ساعة التردد بين ترجمتين أو بين حلين لمسألة واحده، وهوه اللى أحكم الهجاء والترقيم وأشرف على جميع خطوات التنفيذ من ساعة ماابتدينا نقرا النص، أو نقرا بالأحرى النصوص الانجليزية لغاية التسليم للطبع، فانفرادى بذكر إسمى على صفحة الغلاف مالوش معنى غير انفرادى بمسئولية الأخطاء اللى جايز تكون فضلت رغم جهدنا المشترك.

ائے ہ کی

قايمة الأدوار

- عطبيل: المغربي، قائد في خدمة مدينة البندقية(١) .
- _ برابانشير: والد دسدمونه، عضو، سناتور، في مجلس شيوخ البندقية
 - ـ كاســيو: ضابط عالى الرتبه، يخدم تحت أمر عطيل
 - ـ باجــو: شرير، حامل راية عطيل
 - رودريجو: رأجل ساذج من البندقية
 - السدوق: رئيس الحكم في البندقية
 - ـ سناتورات : أعضاء مجلس شيوخ البندقية، والمفرد سناتور
 - ـ مونتانــو: حاكم قبرص، حل عطيل محله
 - ـ سـادة من قبرص
- لودوفيكو وجراسيانو: سيدين من نبلاء البندقية، الأول إبن خال دسدمونه، أو قرابة من الدرجة دي، والثاني عمها
 - ـ بحـــار
 - مهسرج
 - ـ دسدمونه : زرجة عطيل وبنت برابانشيو
 - ـ إميليــا: زوجة ياجر روصيفة دسدمونه
 - ـ بيانكــا: غانية رعشيقة كاسير
 - ـ رسل، منادى، ضباط، سادة، موسيقيين وأتباع
 - المكان: الفصل الأول بالبندقية، من فصل ٢ إلى ٥ بقبرص.

⁽۱) كان كثير من مدن أوربا درل وكانت البندقية أقواها وكان يحكمها مجلس شيوخ أو أعيان يرأسه ودوق، ـ من كلّمة إيطالية بمعنى و الريس أو القائد ، .

الفصل الأول() (المشهد الأول) [شارع في البندقية] يدخل رودريجو وياجو

رودریجو: کلام فارغ. ماتقولیش، أنا واخد علی خاطری قوی منك، بقی أنت یا یاجو اللی کیسی کان فی إیدك كأن خیوطه ملكك كنت عارف ده.

یاجـــو: ودم المسیح إنت اللی مش عاوز تسمع، ده أنا لو كنت عمرى حاجة زى دى، إبغى العنى.

رودريجو: إنت قلت لى إنك بتكرهه.

یاج و اعتبرنی ولا حاجة او ماکنتش باکرهه، ثلاثة من کبراء المدینة راحو واحد ورا الثانی ینحنوا له علشان یعینی قائد تانی، وبذمة أی بنی آدم أنا عارف إن قیمتی ماتساویش مکان أقل من کده، لکن حضرته اللی ما بیحبش غیر کبریاؤه وأفکاره إتهرب منهم بکلام منفوخ، حشاه حشو فظیع بالمصطلحات العسکریة، وفی النهایة صرف وسطاء الخیر وهو بیقول: أنا فعلاً عینت الضابط بناعی، ویطلع مین ده من فضلك؟ واحد بحر فی علم الحساب، اسمه میشیل کاسیو، من فاورنسه، راجل یبیع نفسه للشیطان

⁽١) التقسيم لقصول ومشاهد مالوش وجود في مخطوطات شكسبير الأولى إلا في النادر، وأغلبه من وصع الناشرين بعد كده.

عشان واحده ست، عمره ما صف كتيبة في ميدان، وفي المعمة مايعرفش أكترم اللي تعرفه عانس، باستثناء النظريات اللي في الكتب، اللي أي مستشار ملفوف في عبايته يديك منها بنفس العلم. ثرثرة من غير عمل، دي كل مهنته، ومع كده يامولاي هوه اللي نال الاختيار، وأنا اللي عينيه شافت براهيني في رودس وقبرص وفي ميادين تانية مسيحية وكافرة لازم اتخزن ورا أستاذ الدخل والصرف. المحاسب هو اللي في زماننا لازم يكون قائد تاني، وأنا ربنا يستر حامل راية رفعته المغربية.

رودريجو: والله أنا لو محلك أشنقه.

یاج و دا داء مالوش دوا، لعنة مكتوبة على المهنة، التقدم بالواسطة والمحسوبية، مش بالأقدمية اللى فيها التانى يورث الأولانى، ودلوقت أحكم إنت يا سيدى، إذا كان ممكن بأى شكل من الأشكال يكون عندى ميل لمحبة المغربى.

رودريجو: لو كان كده، أنا ما اخدموش.

یاجـــو: من الناحیة دی ریح بالك، أنا باخدمه خدمة لنفسی، أصل مش ممكن نبقی كلنا سادة، ولا كل السادة ممكن یتخدموا بأمانة، إنت حتلاقی أكتر من مغفل مؤمن بالواجب، حانی ضهره أدبا، یستهلك حیاته، زیه زی حمار سیده، لا لشیء سوی لقمة العیش والمعاش علی الكبر، المغفلین المخلصین اللی زی دول، مالهومشی إلا الجلد، وفیه تانیین بیتزركشوا

بأشكال الواجب ومظاهره، لكن قلوبهم مكرسة لخدمة أنفسهم، صورالخدمة بس يرموها لأسيادهم، لكن المنتفع همه ويوم جيوبهم ما تختخ يبقوا أسياد لأنفسهم، دول رجالة، وأنا اعتبر نفسى واحد منهم، عشان يامولاى زى ماهو مؤكد إنك رودريجو، كذلك لو أنا كنت المغربى، لما كنت ياجو. إتباعى له إتباع لنفسى، والسما شاهده إنه مش أنا المعمول للحب والواجب، لكن مظهرى ده مجعول لغرضى أنا؛ لأنه يوم ما عملى الظاهر يكشف للخارج عن سر قلبى ومخبره، يومها راح تلاقيني حاطط قلبى على كفى عشان ألكل بيه العصافير، أنا مش أنا(۱).

رودریجو: دا یبقی ایه الحظ المکتوب لغلیظ الشفتین لو کان لهفها کده! یاجـــو: روح صحی أبوها، قومه من النوم، علیك بالمغربی، سمم فرحته، شنع علیه فی الشوارع بأعلی صوتك، هیج علیه قرایب ست الحسن، الجوحتی لو کان دلوقتی مواتی له، إملاه له دبان، فرحته حتی لو کانت صافیة، عکرها علیه لغایة ما تقلب غم.

رودريجو: آدى بيت أبوها، حانده عليه بصوت عالى.

ياجــو: ياللا، انده بصوت المرعوب وزعاق المستجير، كما لو كانت حريقة شعلات في عز الليل نتيجة إهمال في بلد مليان سكان.

⁽١) قلب لكلمة الرب لما سأله مرسى عن اسمه فرد: أنا من أنا.

رودريجو: ياهوه، ياهوه، برابانشيو، ياسيد برابانشيو، هوه، هوه!
ياجــــو: إصحى، اصحى، ياهوه، برابانشيو، الحرامية! الحرامية!
شوف بينك، شوف بنتك، شوف خزاينك، الحرامية،
الحرامية.

يظهر برابانشيو في الدور الأعلى ويطل من الشباك

برابانشيو: إيه سبب النداء المخيف ده؟ إيه الحكاية؟

رودریجو: یاسید، هل کل عیلتك موجوده عندك؟

ياجـــو: هل بيبانك متربسة؟

برابانشيو: ليه؟ إيه سبب السؤال ده؟

یاج و : أصل حضرتك اتسرقت، إلبس هدومك تحشماً وانزل، قلبك انكسر، ونص روحك ضاع، عشان دلوقت، أبوه دلوقت في اللحظة دى، فيه جدى عجوز أسود، راكب نعجتك البيضة، إصحى إصحى، دق الجرس، فرق أهل البلد اللي بيشخروا، وإلا فالشيطان راح يخلفلك حفيد، إصحى باقولك.

برابانشير: بتقولوا إيه ؟ انتوا فقدتوا عقلكم ؟

رودريجو: باسيدى المبجل، حضرتك تعرف صوتى؟

برابانشیو: ما اعرفشی، انت مین؟

رودريجو: إسمى رودريجو.

برابانشيو: لا مرحبًا بك، أنا نهيتك عن اللف كالشبح حوالين أبوابي، وسمعتني بأقولك بصريح العبارة إن بنتي مش لك، ودلوقتي لما الجنون ركبك بعد ما انتفخت بطنك بالعشا وطار صوابك من الشرب؛ جاى لى بكل لؤم عشان تقلق راحتى.

رودریجر: یاسید، یاسید، یاسید

برابانشیو: لكن انت لازم تعرف إن عزمی ومكانتی فیهم قوة تخلی تصرفك ده بنقلب علیك بالمر.

رودریجو: یاسید، صبرك!

برابانشير: سرقة إيه اللي بتكلمني عنها، إحنا هنا في البندقية وبيتي ماهواش وكالة.

رودریجو: یاسید برابانشیو، أنا جای لك بقلب سلیم وصافی.

باجـــو: يظهر ياسيد إنك من الناس اللى مايخدموش ربنا، إذا كان الشيطان هوه اللى بيطلب منهم كده، بقى عشان إحنا جايين نؤدى لك خدمة، وعشان إنت فاكرنا أوباش، راح تسيب بنتك يفرش عليها حصان مغربى، وتخلَّى أحفادك يصهالوا، وقرايبك يطلعوا حصنه وذريتك مهور،

برابانشيو: أما أنت إنسان سفيه صحيحاً!.

ياجـــو : أنا يامولاي واحد جاى يقولك إن بنتك والمغربي بيتكون منهم دلوقت وحش له ضهرين.

برابانشير: إنت سافل!!

ياجـــو: وانت ... سناتور.

برابانشير: ده كلام إنت راح تسأل عنه، أنا عارفك يارودريجر.

رودریجر: یاسیدی أنا مستعد أرد على أي سؤال، لكن أرجوك، إذا كان

ده بعلمك ورضاك، زى ما أنا شايف شويه، إن بنتك الجميلة، فى الساعة الساكته دى من الليل، اللى لاهى اتناشر ولا واحده، ماتلاقيش غير حارس لا يزيد ولا يقل عن كونه مجرد خدام ممكن أى واحد يأجره، مراكبى، يشيلها لأحضان مغربى الشهوة ملياه إذا كان ده معروف لك وموافق عليه، يبقى ارتكبنا فى حقك غلط جسيم وبذئ، لكن لو كان ده حصل بدون علمك يبقى ربايتى تقول لى ان تأنيبك فى غير محله، أوع تفتكر إنى من غير إحساس بأى أدب، رحت ألعب كده واستهين باحترامك، أكرر كلامى: بنتك إذا ماكنش معاها إذنك تبقى ثارت ثورة ضخمة وربطت طاعتها وجمالها وعقلها ومصيرها بمغربى ضخمة وربطت طاعتها وجمالها وعقلها ومصيرها بمغربى أفاق، مالوش محل هنا ولا فى أى مكان، روح شوف بنفسك، إذا كانت فى أودتها أو فى البيت، خلى قانون المدينة ينتقم لك لأنى خدعتك بالشكل ده.

برابانشيو: حكوا المحك(١) هُوه، هاتوا لى شعلة، صحوا كل أهل البيت، الحكاية دى مشابهة للى شفته فى المنام، تصديقها ابتدا خلاص يضيق نفسى، النور، باقول النور.

يختفى من النافذة

باجــو: الوداع، لازم أسيبك دلوقت، دى حكاية لا تتفهم ولا تنفع مركوري إنى أنكشف وسط أعداء المغربي وده اللي حايحصل لو فضلت، علشان أنا متأكد إن المدينة لو وجهت

⁽١) حسب الطريقة القديمة لاستخراج النار.

إليه بعض اللوم مش راح تسرحه من غير ما تجازف بأمانها، دا الشيوخ صوتوا لاشتباكه في حرب قبرص اللي لسه دايره، فإنقاذا لأنفسهم مش حيلاقواواحد محنك زيه يخلص لهم شغلتهم . عشان كده أنا، وإن كنت أكرهه كرهي لعذاب جهدم، مضطر لأسباب الحياة الدنيا إني أرفع راية المحبه: علامة، ماهياش صحيح إلا مجرد علامه، إذا كنت عاوز تلاقيه بالتأكيد، خد الجماعة اللي حاتدور عليه على لوكاندة السنتور(۱)، حتلاقيني هناك معاه. إلى اللقاء.

يدخل برابانشيو بجلبية النوم

ومعاه عدد من الخدم حاملين المشاعل

برابانشيو: اللى أنا خايف منه حصل، سابت البيت، والجزء الفاصل من العمر اللى ماعدت عاوزه ماحايجيب غير المر، قول يارودريجو، إنت شفتها فين؟ آه المتعوسة! بتقول مع المغربى، مين بعد كده يحب يبقى أب؟ مين قال لك إنها هى؟ آه خدعتنى بشكل يزيد عن التصور! قالت لك إيه؟ هاتوا مشاعل أكتر، صحوا كل أهلى، تفتكر إتجوزوا.

رودريجو: في الحقيقة أفتكر كده.

برابانشيو: يارب! خرجت إزاى؟! قد كده الدم يخون الدم، ياأبهات، أوعوا بعد كده تحطوا ثقتكم في عقول بناتكم حسب اللي تشوفوه من عملهم، هو السحر اللي يفسد كمال الشباب

⁽١) مخلوق نصه بني آدم ونصه حصان، إشارة إلى طبيعة عطيل المزدوجة .

والبكاره مش موجود؟ ماقريتش بارودريجو حاجة زى كده؟

رودريجر: أيره أنا فعلاً قريت.

برابانشير: صحرا أخريا، آه، ياريتك أخدتها ا إمشرا، جزء من هنا وجزء من هناك، تعرف ممكن نلاقيها فين هي والمغربي؟

رودريجو: أفتكر أقدر اكتشف مكانه، إذا تفضلت وأخذت حراسة مشددة وجيت معايا.

برابانشيو: أرجوك، إمشى قدام، أنا حانده على كل بيت، معظم البيوت أنا صاحب أمر فيها، انتوا، خذوا أسلحتكم واندهوا على جماعة من حرس الليل المخصوص، باللا با عزيزى رودريجو، أنا راح أعرف أكافئك.

خسروج (المشهد الثاني) [شارع تاني]

بدخل عطيل وباجو مع خدم شابله مشاعل بالحقى بالحب : ولو إنى باما قتلت رجال فى حرفة الحرب، إلا إنى بالاقى جوهر الضمير ببان لى فى النهى عن القتل المتعمد. الشراسة أحياناً بتنقصنى عشان أحقق غرضى. تسع أو عشر مرات فكرت أطعنه هنا تحت الصلوع.

عطيل: أحسن كده.

ياجــو: لا، دا تبجح وتهجم على شرفك بكلام قد كده بذئ ومثير

ولولا شوية ورع فاضلين ماكنتش قدرت أمسك نفسى، لكن استسمحك، سيادتك صحيح انجوزت؟ تأكد من ده، المفخم محبوب جدا من الناس، وصوته قوته ضد قوة صوت الدوق مرتين، يعنى هو إما حايطلقك، ياإما راح يفرض عليك كل القيود والمضايقات اللى حايلاقيها في جعبة القانون، بكل قدرته على تطبيقه.

عطيل: خليه يطلع غله، صوته مهما على بالشكوى، خدماتى اللى أديتها للسنيورية صوتها أعلى، ماحدش لسه يعرف، لكن لو بان لى إن الفخر شرف فالكل راح يعرف إنى مستمد حياتى ووجودى من رجاله تبوأوا عروش وإن كرم محتدى ممكن يكلم مكانة عالية قد اللى أنا اكتسبتها من غير ما يحنى راسه. إعرف كويس يا ياجو إنى لولا حبى لدسدمونه الرقيقة ماكنتش سبت حريتى اللى ما فيش بيت كان يقدر يحجزها أو حتى يحصرها ويلمها ولو مقابل كنوز البحر، لكن بص، إيه المشاعل اللى جاية هناك؟.

ياجـــو: دا أبوها ومعاه صحابه، أحسن لك تمشى.

عطيل : مش أنا، أنا لازم أفضل. قدراتي ولقبي وروحي النقية حاتعبر عنى تعبير صحيح، هما دول؟.

ياجـــو: قسما بيانوس(١) افتكر لأ.

بدخل كاسبو ومعاه عدد من الظباط حاملين المشاعل

⁽۱) اله روماني له رجهين .

عطييل: رجال الدوق والقائد التانى؟ مساكم خير ياأصدقائى، إيه الأخبار؟.

كاسبير: الدوق يحيى قيادتكم ويطلب حضوركم في أسرع وقت، بل في الحال.

عطييل: تفتكر إيه الحكاية؟.

كاسبيو: أظن رسالة من قبرص، يظهر إن الجو سخن، الغلايين بعتوا الليلة دى إتناشر رسول، كل واحد فى كعب التانى؛ وعدد كبير من المستشارين اللى صحوا واتجمعوا، موجودين دلوقت عند الدوق. الجميع طلبوا حضوركم بشدة، فلما تبين غيابكم من المنزل، بعت مجلس الشيوخ ثلاث فرق منفصلة للبحث عنكم.

عطيل : كويس اللى إنت لاقتنى . لحظة أسيب فيها كلمة هنا في البيت ، وأكون معاك .

ينرج

كاسبيو: ياحامل الراية، هوبيعمل هذا إيه؟

ياجسو: بذمتى الليلة دى حط إيده على حِتْتُ صيده لو صحّت له حاتحلاله للأبد.

كاسبير: مش فاهم ولا كلمة.

ياجمو: إنجوز.

كاسبيو: من مين؟!!

يعود عطيل

ياجـــو: إنجوز من ... ياكابنن مانيالاً بينا.

عطييل: خدوني معاكم.

كاسسيو: وآدى فرقه تانيه جايه تسأل عنكم.

ياجـــو: دا برابانشير، خد بالك ياسيادة القائد، دا نيته سوء.

يدخل برابانشيو ورودريجو وعدد من الضباط بمشاعل وأسلحة

عطيل: بس! أقف عندك!!

رودريجو: ياسيد، أهه المغربي.

برابانشيو: إظبطوه، اللص.

الجانبين ينزعوا السيوف

ياجــو: إنت يارودريجو، تعالى ياسيد، أنا اللي حاتصدي لك.

عطسيل : رجعوا سيوفكم لجرابها، لحسن يصديها الندى. ياسيد، ياأمير، سنك له أمر مطاع أكثر من سلاحك.

برابانشيو: إنت ياحرامي ياحقير، إنت خبيت بنتي فين؟ لعين زي ماانت، لابد إنك سحرت لها، عشان كده أنا مستعد استشهد بكل شيء فيه ذرة من العقل إذا كان ممكن بدون ما تتربط بحبال السحر إن بنت بكر، جميلة، سعيده، معارضة للجواز لدرجة الهرب من ولاد بلدها الأغنيا، المدللين، إذا كان ممكن عشان تبقى أضحوكة الخلق إنها تجرى من وصاية أبوها وتروح ترمى نفسها في صدر مهبب لواحد زيك، يخوف مش يتحب. خلى الدنيا تحاكمني إذا ماكانش واضح

للعيان إنك شُغلَّت عليها فنون شيطانية من السحر وغررت بشبابها الرهيف بعقاقير أو تعاويذ تضعف الإرادة . دى مسألة أنا حارفعها للنظر لأنها راجحة وملموسة للفكر، وعشان كده أنا بألقى القبض عليك واتهمك بأنك مضلل للعالم، ممارس لفنون محرمة ، مخالفة للقانون . إمسكوه ، إذا قاوم سكتوه ، مهما حصل له .

عطيل : إمسك إيدك انت وهوه، اللي معاى واللي على لو كانت ساعة القتال جت، كنت حاعرف من غير زق . تحب أروح فين للرد على اتهامك ده ؟

برابانشير : تروح السجن لغاية ما بيجى الوقت المناسب للقانون ولسير العدالة عشان يستدعيك للرد.

عطيل : لو أطعت، إزاى يرضى بكده الدوق بينما رسله هنا، واقفين جنبي لاستدعائي لمهمة عاجلة من مهام الدولة؟.

صابط أول : ده صحيح، ياسيدى الأكرم، الدوق في المجلس(١) ، وأنا متأكد إن سيادتك مدعو للحضور.

برابانشيو: إيه! الدوق في المجلس في الساعة دى من الليل؟!، خذني عنده، أنا قضيتي ماهياش قضية فارغة، الدوق نفسه، أو أي أخ من إخواتي في الدولة، راح يشعر بالضرر ده كما لو كان ضرر في حقهم همه، لأن أعمال زي دى لو كانت تنساب من غير حساب، يبقى دولتنا حايتكون رجالها من وثنة وعبيد.

⁽١) المقصرد مجلس الشيوخ، مؤلف من الأعيان، ويتولى حكم المدينة، اسم العضو سناتور.

(المشهد الثالث)

[حجرة إجتماعات المجلس]

الدوق والأعضاء جالسين، وراهم الظباط وحملة المشاعل السدوق: دى أنباء مافيش بينها توافق يدعر إلى تصديقها.

السناتور الأول : صحيح ماهياش راكبة مع بعض، أنا خطاباتي بتتكلم عن ميت غليون وسبعة.

السدوق: وأنا عن ميه وأربعين.

السناتور الثانى: وأنا عن ميتين، لكنها وإن اختلفت فى العدد زى ما بيحور الثانى التقدير هو بيحصل فى الحالات اللى زى دى لما بيكون التقدير هو الغرض من التقارير إلا أنها كلها تؤيد إن فيه أسطول تركى متجه إلى قبرص.

السدوق: أيوه، يبدو إن ده هوه الرأى المحتمل ولو أن التصارب لايدعوني إلى الثقة، لكني بأوافق على المغزى الأهم وإن كان ما يطمئش.

بحـــار: (من الداخل)، حد هنا، فيه حد هنا، حد هنا!! صابط أول: رسول من الغلايين.

يدخل بحار

المسدرق: نعم، إيه الحكاية؟!!

البحار: التراكوه في سكتهم إلى رودس، ده اللي السيور آنجلو أمرني بتبليغه هنا للدولة.

الــدوق: إيه رأيكم في التغيير ده؟

السناتور الأول: دا شيء لايثبت أمام إمتحان العقل، مناورة لجذب
النظر في الانجاه الغلط، لو خدنا في اعتبارنا قيمة قبرص
للأتراك، وفهمنا كويس أنها تهمهم أكتر من رودس، يبقى
أسهل عليهم كسبها لو هي إتجردت من كل إعداد حربي
واتعرت من التحصين اللي انكست بيه رودس، إذا فكرنا في
ده كويس، يبقى مش لازم نفتكر إن الأتراك أغبياء لدرجة
أنهم يسيبوا لغيرهم الشيء اللي يهمهم الأول، ويهملوا ضربة
سهلة، كلها مكسب، عشان يغامروا مغامرة خطيرة مافيش
منها ربح.

الــدوق: لأ، قطعا الأنراك مش رايحيين على رودس.

صابط أول : فيه أنباء تانية وصلت.

يدخل رسول

الرسول: العثمانلية، يا أصحاب الفضل والوقار، بعد ما أبحر أسطولهم رأسا إلى جزيرة رودس، التحقوا هناك بأسطول تاني.

السناتور الأول: ده اللي أنا فكرت فيه، عددهم كام في تقديرك؟

الرسول: تلاتين شراع، ودلوقتى أبحروا تانى فى الاتجاه العكسى، كاشفين من غير مواربة عن أهدافهم نحو قبرص، دى الرسالة اللى خادمكم المخلص الشهم، السنيور مونتانو، بيبلغها لكم مع تحياته ورجاء المسارعة إلى إسعافه ويرجوكم تصديقه.

السدوق : من المؤكد إذن أن الهدف قبرص، هل ماركوس للمناد؟ لوكتشيكوس في البلد؟

السناتور الأول: حاليا هوه في فلورنسه.

الـدوق: إكتب له رسالة من طرفنا بسرعة البرق.

السناتور الأول: أهو باربانشيو جاى مع المغربي الشهم.

یدخل بارپانشیو، عظیل، کاسیو، باجو، رودریجو، ویعض الظباط

السدوق: عطيل ياشهم، لازم نستخدمك في الحال ضد العثماني عدونا المشترك. يلتقت لهاريانشيو فت عن عدين، مرحب يانبيل، إحنا إفتقدنا مشورتكم ومساعدتكم.

برابانشيو: وأنا بالمثل، أرجو المغفرة من سماحتكم، لاواجبي هو اللي قومني من سريري ولا شيء سمعته عن الأحداث الجارية، ولا اهتمامي بالشئون العامة هو اللي مستحوذ عليه؛ لأن خوفي الشخصي بحكم طبيعته فاض وانفجر لدرجة إنه غرق الهموم التانية وابتلعها، وما زال هوه هوه.

السدرق: ليه، إيه الحكاية ؟!!

برابانشير: بنتي! آه يابنتي.

الجميع : مانت؟!!

برابانشيو: بالنسبه لى، أيوه، غرروا بيها، سرقوها منى، أفسدوها برُقى وعقاقير إشتروها من دجالين، لأن طبيعة مافيهاش نقص ولا هيه عميا ولا هيه ناقصة إحساس، لا يمكن من غير سحر تخرج عن مدارها بالشكل المذهل ده.

السدوق: أيا كان اللى سلب بنتك من نفسها وسلبها منك بالفن اللعين ده، فكتاب القانون المطبوع بالدم موجود، راح تقراه بنفسك في حرَّفُه الصارم بالتفسير اللي تشوفه، أيوه، حتى لو كان أبنى نفسه هو المرفوعه عليه قضيتك.

برابانشيو: بكل تواضع أشكر فخامتكم، آدى الراجل، الكمغربى ده اللى على ما يبدو موجود هنا دلوقت بناء على استدعاء خاص منكم لأمر من أمور الدولة.

الجميع : حنا في غاية الأسف للي حصل.

السدوق: (لعطيل) إيه اللي عندك تقوله دفاعا عن نفسك؟

برابانشير: ولا حاجة، سرى إن الحقيقة هي دي.

عطيل: يا أصحاب الأمر والشأن والمقام، ياللي نبلهم جعلني أرضاهم لنفسي أسياد، فأما إني خدت بنت الراجل الكهل ده، فمافيش أصح من كده، وصحيح إني اتجوزتها، ده آخر حدود جريمتي مش أكتر. أنا خشن في كلامي، ما اتباركتش كتير بجمل السلام الناعمة، لأن سواعدي من يوم ما بلغ عودها سبع سنين لغاية تسع شهور قمرية فاتت، ما لاقتش عمل أعز عندها من العمل في المخيمات، وأكاد أكون ما تعلمتش من أمور الدنيا الواسعة غير فنون الحرب والسلاح، عشان كدة قضيتي حايزيد حملها بدل ما يخف لو

دافعت عنها بلسانى. إلا إنى لو سمح صبركم الكريم، راح أحكى لكم بلا نقش ولا تزويق قصة حبى كلها، إيه العقاقير وإيه التعازيم، وإيه الرقى والسحر الجبار اللى كسبت بيها بننه، حسب ما أنا منهم بيه.

برابانشيو: بنت بكر عمرها ما انجرأت، روحها هادية ووديعة لدرجة إن الحركة منها يحمر ليها وجهها، هل من الممكن رغم الطبيعة، رغم السن، رغم السمعة، رغم كل شيء، إنها تقع في حب الشيء اللي كانت تخاف تبص له!، دا يبقي حكم خادع وسقيم اللي يقول إن الكمال ممكن يتوه بالشكل ده ضد كل سنن الطبيعة، الأمر اللي يوصلنا لأساليب مكرها جهنمي. عشان كده، أنا أشهد مرة تانية إنه لابد أثر عليها بخلطة عقاقير مفعولها كبير في الدم أو بجرعة مسكرة مقرى عليها تعزيمة لنفس الغرض.

الـــدوق: الشهادة بكدة وحدها مش برهان، من غير دليل أقطع وأوضح من المعتقدات الواهية والاحتمالات الهزيلة، اللي كلها ظاهر بلا باطن يدين.

السناتور الأول: لكن عطيل، إتكلم، هل أنت استحوذت على ود الشابة دى بأساليب معوجة فيها إكراه، ولا ودها جه إستجابة لسؤالك وحسن كلامك، زى القلب لما للقلب يميل؟!.

عطيل: أنا أرجوكم ترسلوا في طلب السيدة وتخلوها تتكلم عنى في حضور والدها. فإذا تبيئتم من كلامها إنى مذنب، فلا تكتفوا بسحب الثقة اللي وضعتوها فيه والمنصب اللي وضعتوني فيه، وإنما إجعلوا حكمكم ينصب على حياتي نفسها.

السدوق: هاتوا دسدمونه هنا.

عطييل: يا حامل الراية، أنت أعلم الناس بالمكان، وريهم الطريق. يفرج ياجو ويعض الأتباع

عطيل : ولغاية ما تيجى حاسرد على مسامعكم الموقرة ، بنفس الصدق اللي أعترف بيه للسماء بالعيوب اللي بتسرى في دُمّى ، إزاى حزت حبها وحازته منى .

السدوق: قول يا عطيل.

عطيل : والدها حبنى وكتير ما دعانى واستفسر منى عن قصة حياتى سنة بعد سنة ، المعارك والحصار وتقلبات الحظ اللى المتزتها ، حكيتها كلها ، من أيام الصبا لنفس اللحظة اللى دعانى فيها عشان أحكيها له . إتكلمت عن نكبات الصدف ، وعن الأحداث المثيرة في البحر والبر ، عن المرات اللى نجيت فيها من الموت بعد ما قربت منه بشعر ، عن وقوعى في أسر العدو الغاشم ، عن بيعى في سوق العبيد ، ثم عن خسلاصى من العبودية وسلوكى في تاريخ رحلاتى ، فاتكلمت عن الكهوف الواسعة ، عن الصحارى القفر ، عن المحاجر الوعرة ، عن الصخور ، وعن الجبال اللي رؤوسها تناطح السما ، دى كانت روايتى ، تمام زى ما كانت بتنموا روسها تحت أكتافها . كل ده جذب استماع دسدمونه جذب شديد ، لكن مشاغل البيت كانت بتستدعيها من وقت

التانى، فكانت تخلصها بسرعة على قد ما تقدر وترجع بودن مطرطأة تلتهم الكلام، فلما لاحظت ده إنتهزت ساعة مواتيه وعرفت أجتذب منها رجاء، بل طلب ملح إنى أحكى لها بالكامل قصة حياتى الطويلة اللى كانت سمعت منها نتف لكن من غير ما تغوص فيها، إستجبت، وكتير ما إستلبت منها دموعها لو اتكلمت عن ضربة من ضربات الحظ الأليمة اللى عرفتها في شبابي، فلما إنتهت روايتى، بادلتنى آلامى بدنيا من الأنين، حلفت بإيمانها إن الأمر عجيب فوق كل عجب، مؤثر فوق كل وصف. شكرتنى وحلفتنى لو كنت أعرف صديق يحبها إنى بس أعلمه زاى يحكى قصتى عشان يكسب حبها، بعد اللمحة دى بحت: يحكى قصتى عشان يكسب حبها، بعد اللمحة دى بحت: عليها عطفها، ده كل السحر اللى بيه سحرتها. لكن آهى عليها عطفها، ده كل السحر اللى بيه سحرتها. لكن آهى جاية بنفسها، الشهادة دلوقت لها.

تدخل دسدمونة وياجو ويعض الأتباع

السدوق: أفتكر الحكاية دى كان ممكن تجذب بنتى أنا كمان ياعزيزى برابانشيو، خد الموضوع المؤسف ده من وجهه الأحسن، الانسان أفضل له من إيده العريانه إنه يستخدم سلاحه المكسور.

برابانشيو: أرجوكم، تسمعوا كلامها، إذا أقرت بأنها قطعت نص الطريق ناحيته يبقى الخراب ينزل على دماغى لو بعد كده لُمنت الراجل ظلم. تعالى ياحبوبة، هل أنت شايفه مين في المجلس النبيل ده، طاعتك له واجبه.

دسدمونه: يا والدى النبيل، أنا شايفه هنا واجب موزع. لك أدين بحياتي وربايتي، حياتي وربايتي يعلموني إزاى أحترمك، فلك الأمر والطاعة، ولغاية هنا أنا بنتك. ولكن هنا زوجي، فكل الطاعة اللي والدتي أبديتها لك عن والدها، لابد أعترف إني أدين بقدها لسيدى المغربي:

برابانشيو: ربنا معاك، أنا انتهيت، أرجو من رفعتكم الانتقال إلى شئون الدولة. ياريتنى اتبنيت عيل ولا كنت خلفته، تعالى هنا يامغربى، أنا باسلمك هنا من كل قلبى العروسة اللى لو ما كنتش أخدتها كنت أفضل من كل قلبى إنى أحجزها عنك. أما عنك أنت يا جوهرة، فأنا سعيد الروح إن ما عنديش خلف غيرك لأن هربك كان حايجعل منى طاغية، يقيدهم بسلاسل.

السدوق: خلينى أتكام كما لو كنت إنت نفسك اللى بتتكام وأقول جملة ممكن تكون جسر أو خطوة تساعد الاتنين اللى بيحبوا بعض دول على استرداد خطوتك. إذا فات وقت الدوا يبقى انتهت الأخزان، ما دام الأسوأ اللى كان بيطرده الأمل حصل يبقى البكا على ضرر عدى ومر أحسن طريقة لتجديد الأذى، اللى ما تقدر تصونه فى وجه الحظ خليك بالصبر تضحك منه، اللى انسرق منه شىء وابتسم يبقى سرق كل شىء من اللى سرقوه، أما اللى يضيع وقته فى البكا فبيسرق نفسه.

لرابانشير: على كده خلى الترك باخدوا منا قبرص، نبقى ما خسرناش حاجة ما دام بنبتسم؛ كلمات العزا حملها سهل على اللى مش شايل على كتفه هم، لكن العزا والألم تقال على اللى لازم يدفع ثمن خسارته بالاعتصام بالصبر؛ الكلمات حلوها كتير، ومرها قده، ممكن تاخدها من ناحية وتاخدها م التانية. لكن الكلمات كلمات، أنا عمرى لليوم ما سمعت إن القلب المجروح له من الود سبيل، أرجو من سيادتكم بكل تواضع أن ننتقل لى النظر في أمور الدولة.

السدوق: الأتراك متجهين لى قبرص بأقوى إستعداد. عطيل، أنت أعلم الكل بمناعة المكان، صحيح إن عندنا قائد تانى لا جدال في كفاءته، لكن الرأى العام، وهو السيد اللى لا يعلو على قراراه قرار، ولآك ثقة أكبر، وبالتالى وجب عليك تقبل إن سعدك الجديد يبهت رواؤه قدام الحملة اللى هى أشد وأعتى.

عطيل: حضرات الشيوخ الموقرين، سلطان العادة جعل سرير الحرب
الجامد زى الحجر والصلب ناعم على زى الريش، نعم، أنا
منكرش الهمة الطبيعية المتحفزة اللى باجدها فى وقت
الشدة، ولا أنا باتردد فى قيادة الحروب الحالية ضد
العثمانيين، عشان كده بانحنى أمام مجلسكم الجليل بكل
تواضع وألتمس منكم أن تنال زوجتى كما يليق بها من
التدبير، من المكانة والراتب الملائمين، مع مستوى من
المسكن والخدمة يتفق ومنبتها.

الـــوق: جميل، ده ممكن يتم عند والدها، ذا وافقت.

برابانشيو: أنا غير موافق.

عطيل: ولا أنا.

دسدمونة : ولا أنا أحب إنى أمتحن صبر والدى بوجودى تحت بصره . ياسماحة الدوق، جودوا على بوحي بودن ألاقى فيها قبول، وخلوني ألاقى في صوتكم سند لسذاجتي.

السدوق: إيه رغبتك يادسدمونه؟

دسدمونه: أما إنى حبيت المغربى لدرجة أنى عُزت أعيش وياه، فثورتى الصريحة وزهدى فى اللى كان مقدر كى يعلنوه للدنيا كلها. قلبى خضع لدرجة إنى حبيت مهنة زوجى نفسها، أنا شفت وش عطيل فى روحه وأمجاده وجوانب شهامته اللى وهبت لها روحى ومقاديرى، من هنا ياأسيادى الأعزاء، لو إنى فضلت هنا، كأنى عتة سلام، وراح هو للحرب، لكان ده انتزاع منى لكل المقدسات اللى حبيته عشانها، وفترة غيابه الأليم حاتكون عبء تقيل على، خلونى أروح معاه.

عطيل : خلوها تاخد موافقتكم، السما شاهده إنى ما بطلبش ده من أجل لذة يشتهى حلقى طعمها، ولا من أجل شهوة متأججة بعد اندفاعات الصبا ما عفا عليها الزمن، ولا لإشباع شخصى، وإنما بحافز من الانصياع الحر السخى للى هيه تشوفه. أرجو ن السما تبعد عن نفوسكم الطيبة فكرة إنى

راح أهمل موضوعكم الخطير، والمهم، لأنها معايا. اليوم اللي ينجح فيه كيوبيد الطيار بألاعيبه الخفيفة الجناح في إنه يعمى بتخدير شهوى أدوات الملاحة والإضطلاع بالمسئولية عندى، اليوم اللي فيه ملذاتي تفسد وتبوظ شغلى، اليوم ده خلوا ربات البيوت تعمل من خوذتي كسرولة وخلوا كل الإهانات المشيئة الوضيعة تقضى على سمعتى.

السدوق: دى مسألة حتحددوها فيما بينكم، يا تفضل يا ترحل، الموقف بيصرخ في طلب سرعة العمل ولا بد من سرعة الرد.

السناتور الأول: لابد من سفرك الليلة.

عطسيل: من كل قلبى.

الــدوق: راح نتقابل هنا مرة ثانية، الساعة التاسعة صباحا، عطيل سيب هنا حد من ظباطك عشان يوصل لك أمرنا بتعيينك، مع الحاجات الثانية الخاصة بمنصبك وسلطاتك اللي تحتاج الدها.

عطيل: إذا سمحت سيادتكم فليكن حامل الراية، ده راجل أمين وموثوق فيه، حأوكل له اصطحاب زوجتى مع كل الحاجات الضرورية التانية اللي يحب رفعتكم إنه يبعتها لي.

الـــوق: وهو كذلك، إنمسوا بالخير كلكم. (إلى برابانشيو)، ياصاحب النبل، إذا كانت الفضيلة فيها جمال أخاذ يفتن،

يبقى صهركم خرج بوجه يزيد بياضه كتير عن سواده. السناتور الأول : الوداع، يا شجاع، عامل يسيمونه بكل الحس.

برابانشير: خد بالك منها بامغربي لو كانت عندك عنين تشوف، خدعت أبوها وممكن تخدعك.

عطسيل: حياتي رهن إيمانها.

بخرج الدوق والشيوخ والضباط

عطيل: باجر الأمين، لازم أسيب لك دسدمونه، أرجوك تخلى مراتك وصيفتها، وهاتهم معاك في أول فرصة، تعالى يا دسدمونه، ماعنديش غير ساعة واحدة للحب والترتيبات المادية وتوجيه التعليمات، أقضيها معاك، مافيش مغر من طاعة الزمن.

يخرج عطيل ودسدمونه

رودريجو: ياجواا

ياجــو: تقول إيه، يا صاحب القلب النبيل؟.

رودريجو: إيه اللي أعمله في رأيك؟.

ياجسو: آه، تدخل سريرك وتنام.

رودريجو: أنا راح أغرق نفسى في الحال.

ياجىلى : لو عملت كده، مش ممكن أحبك بعد كنه أبدا، وليه الحماقة دى ١١٤.

رودريجو: الحماقة هي الحياة إذا كانت العيشة عذاب، ثم إحنا عندنا

رصفة بالموت إذا كان الموت طبيبنا.

یاج ان الجبان آدینی بابص ع الدنیا بقالی أربع مرات كل مرة سبع سنین، ومن یوم ما عرفت أمیز الحسنة من السیئة عمری ما شفت إنسان یعرف یحب نفسه إزای انا قبل ما أقول حاغرق نفسی عشان حب فرخة أفضل أبدل إنسانیتی بقرد.

رودريجو: أعمل إيه؟ أنا باعترف بأن عيب فيه إنى أكون متيم للدرجة دى، بس أنا ماعنديش فضيلة فيها قرة تصلح العيب ده.

ياج ... و: الفضيلة؟ ورقة توت أمك حوه! كوننا كده أو كده، دا شيء موقوف علينا، أجسامنا جناين، واحنا بإرادتنا الجناينية، إذا حبينا نزرع فيها شوك أو نبذر خس، نغرس اشنان داود ونقلع الزعتر، نكتفي بنوع واحد من الأعشاب أو ننوعها كتير، نشوفها تجدب بدون عمل أو تزدهر بيه، نعم، القوة والسلطة المنظمة لكل ده مكمنها إرادتنا. لو كان ميزان حياتنا ما فيهوش كفة عقل تعادل كفة أحاسيس الجسد لكان حمو دمنا وسقوط طبيعتنا ودونا لنهايات أعجب م العجب، لكن عندنا عقل عشان يبرد عواطفنا الهايجة ويبرد نزعتنا الجسدية، وشهواتنا الجامحة، عشان اللي انت بتسميه حب حاجة تنقص أو تنزرع.

رودریجو: ده مستحیل،

ياجـــو: الحب ما يزيدش عن كونه شهرة من الدم ورخصة من

الإراده، صحصح، خليك راجل! أغرق نفسى؟! غرق قطط وكلاب عامية. أنا أعلنت إنى صديقك، وأسلم لك بأني مربوط في خدمتك بحبال متينه متانة مش ممكن تنفك، ومستحيل كنت أقدر أخدمك زي ما أقدر دلوقت. حط في كيسك فلوس، تعالى الحرب وغير وشك بدقن مستعار، باقول: حط في كيسك فلوس، محال حب دسدمونه للمغربي يدوم وقت طويل ـ حط في كيسك فلوس ـ ولا حب لها حيدوم، الحكاية ابتدت بداية عنيفة، وحاتشوف الانفصال وهو بيرد عليها ـ بس حط في كيسك فلوس . المغاربة دول إرادتهم مالهاش أمان - حط في كيسك فلوس - الأكله اللي الواحد منهم يلاقيها دلوقت حلوه زي الخروب، تبان له بعد شويه مره زي الكركم. هيه حتما حتغيره بالشباب، لما راح تاخد غيتها من جسمه حتشوف الغلط اللي في اختيارها، حط إذن في كيسك فلوس، أما إذا صممت على إنك نموت ملعون، فاعملها بطريقة ألطف م الغرق، لم كل الفلوس اللي تقدر عليها، إذا كان التمسح بالدين مع قسم باليمين بين مغربي أفاق وبنت من بنات البندقية مليانه دهاء ما هواش شيء يستعصى فهمه على قريحتى وعلى أهل جهنم كلهم، يبقى أنت حتنال متعتك منها، رعشان كده حضر إذن الفلوس، سيبك من حكاية تغرق نفسك، دى بره الموضوع. حاول تتشنق وأنت بتاخد متعتك بدل ما تغرق وتروح من غيرها.

رودریجو: طب هل أنت حاتفضل أمین تراعی آمالی طول ما أنا معتمد علی قرارك؟.

یاجـــو: تأکد منی، روح حط فی کیسك فاوس، أنا قلت لك مرة ومرة وأقول لك تانی وتانی، أنا أکره المغربی، قضیتی جذورها ضاربة فی قابی، وقضیتك سببها ما یقلش عنها. خلینا فی الإنتقام منه إید فی إید، إذا أنت ركبت له قرون حاتكون مكافأتك لذة، ومكافأتی ضحك، فیه حاجات فی رحم الغیب راح پیجی أوان خلاصها، إلی الأمام سر، جهز فی كیسك فاوس، وبكره نستأنف الكلام، مع السلامه.

رودريجو: راح نتقابل فين بكره.

ياجــو: في بيتي.

رودريجو: حاكون عندك من بدري.

ياجـــر: ماشي، مع السلامة، سمعت يارودريجو؟


رودريجو: أنا إتغيرت، حابيع كل أرضى.

يخسرج

یاج بیدها، إلى اللقاء حط فلوس كفایة فی كیسك، بكره أخلی الأهبل ده كیسی، دا یبقی تدنیس للعلم اللی أنا كسبته لو ضیعت وقتی مع حتة هلفوت بالشكل ده إلا لمجرد التسلیة والربح، أنا بأكره المغربی، البلد بتفتكر إنه لعب دوری فی ملایات سریری، ما اعرفش إذا كان ده صحیح ولا لأ، لكن مجرد شك من النوع ده مفعوله مفعول الیقین.

هوه نظرته ليه نظرة تقدير، وده أحسن عشان خطتى تعمل مفعولها فيه، أما كاسيو فراجل أمير، خلينى أفكر دلوقت، آخذ مطرحه وأكلل إرادتى بجريمة لها فرعين. إزاى، إزاى؟، خلينا نفكر. مع الوقت ندخل فى ودن عطيل إن كاسيو واخد على مراته زيادة عن اللزوم، هيئته وأسلوبه الناعم المعمولين لتصليل النسوان حيخلوه محل الشك، والمغربى راجل دوغرى وصريح، يفتكر إن الناس عندها أمانه، لكن الأمانه دى مجرد مظهر مش أكتر، وبكده راح ينساق بحنيه من منخاره زى ما تنساق الحمير. لقيتها! اتكونت! الجحيم والليل لابد يطلعوا لضوء العالمين المولود ده اللى ما لوش فى الطبيعة وصف.

بخسرج



القصسل الثاني (المشهد الأول)

[میناء فی قبرص، میدان مفتوح قرب الرصیف] بدخل مونتانو حاکم قبرص ومعاه سیدین

مونتاتسو: شايف إيه في البرمن طرف اللسان؟

السيد الأول : ولا أي حاجة، البحر في حالة غضب شديد، وما فيش بين السما والميه ولا شراع ممكن تميزه عنيه.

مونتات : بيتهيأنى إن الريح نطقت بالعالى فوق الأرض، أسوارنا عمرها ما هزتها عاصفة أشد، فلر كانت الريح إتوحشت بالشكل ده فوق البحر تبقى فين صلوع البلوط اللى حاتقدر تفضل متعشقه في بعض تحت جبال الفيضان ده ؟! إيه اللي ممكن تنتظره ؟.

السيد الثانى: بعترة الأسطول التركى، أقف بس على الشاطئ اللى بيناطح بيرغى، حاتشوف الموج المكريج كما لو كان بيناطح السحاب والبحر كأنه بيدفع الميه بقوه فظيعه على حريقه في برج الديب ويطفى حراس القطب اللى دايما مشطله، أنا عمرى ما شفت منظر فظيع لفيضان بيدمر بالشكل ده.

مونتات : إذا ماكانش الأسطول التركى لجأ أو إحتمى في خليج يبقى عليه العوض، الصمود في الجوده محال.

يدخل سيد ثالث

السيد الثالث: اسمعوا الأخبار ياجدعان! حروبنا انتهت، العاصفة المريعه خبطت الأتراك خبطة خططهم مش حاتقوم منها، غليون فخم من البندقية شاف الخراب التقيل اللي فوق الاحتمال اللي دمر معظم اسطولهم.

مونتاتسو : ا إزاى ؟ الكلام ده صحيح ؟ ١.

السيد الثالث: الغليون موجود هنا في المينا، من قيرونا، وميشل كاسيو القائد التاني للمحارب المغربي نزل البر، لكن المغربي نفسه لسه في البحر معاه تكليف بكل السلطات هنا في قبرص.

مونتاتو: أنا في غاية السرور للأخبار دي، المغربي حاكم كف، بصحيح.

السيد الثالث: ولكن كاسيو نفسه مع إنه مطمئن من ناحية خسائر الأتراك (يدخل كاسيو) باين عليه مهموم وبيدعى بسلامة المغربي عشان عاصفه شرسه وعنيفه هي اللي فرقت مراكبهم.

مونتاتسو: ربنا يسمع منه، عشان أنا خدمته وأشهد أن الراجل بيقود كعسكرى بصحيح، تعالوا نروح الشط ياللا، عشان نشوف الغليون وهوه داخل وندور بعينينا على المغربي الهمام لغاية ما نخلي عرض البحر وزرقه الهوا يندمجوا في البصر.

السيد الثالث: وهو كذلك، ياللا بينا، لازم نتوقع وافد جديد كل دقيقة. كاسبيو: أشكركم يا رجال قبرص البواسل على حسن ظنكم بالمغربي، نرجو أن السموات تحميه ضد عناصر الطبيعه لأنه غاب عن نظرى في بحر في منتهي الخطوره.

مونتاتو : هل الغليون اللي هوه عليه متين؟

كاسيو: مركبه بنيتها متينه وريسها معروف عنه إنه خبير جدا ومحنك، عشان كده آمالي لسه ما فطستش وإنما واقفه تتعالج بشجاعه.

صوت من الداخل: شراع! شراع! شراع!

كاسميو: إيه الزعيق ده ؟!!

السيد الثانى: البلد فضيت والناس واقفه على شط البحر صفوف تصرخ: «شراع!».

كاسبير: آمالي بتهيئ لي إنه الحاكم.

طلقة مدفع

السيد الثانى: بالفعل بيضربوا طلقة التكريم، يبقى على الأقل صديق. كاسبيو: أرجوك ياسيد تروح وترجع بالحقيقه: شوف مين اللى وصل.

السيد الثانى: أمرك.

بخسرج

مونتاتسو: لكن ياعزيزي القائد التاني، هو رئيسكم متجوز؟.

كاسبيو: أسعد جواز، حظه وقع على شابه بكر، الوصف والصيت مهما على أمرهم يصغروا جنبها، شابه تفوق كل شطحات أقلام المديح والثناء، خلقها جوهر كسوته يتعب في نسجها النساج.

يدخل السيد الثاني

هيه ١١ مين اللي وصل؟.

السيد الثاني : واحد اسمه ياجو، حامل راية القائد.

كاسيو: السحر أمن له الطريق، العواصف نفسها، البحور العاليه، والرياح النابحة، الصخور المتساقطة والرمال المتراكمه، كل المكاكمن الخاينه اللي راقده تحت الميه عشان تعرقل بطن السفينه، كلها نسيت طبايعها المميته كأنها حست بالجمال، عشان تسيب دسدمونه الإلاهيه تمر بسلام.

مونتاتو: مين دى؟!.

كاسسيو: اللى باتكام عنها، قائدة قائدنا العظيم، تركها فى حراسة ياجو الهمام وجه وصولها قبل موعد انتظاره بسبع ليالى وسبع تيام، يا جوبيتر(۱) يا عظيم، أحرس عطيل وانفخ شراعه بنفسك القوى عشان يبارك خليجنا بمركبه المستطيل ويلهث بأنفاس الحب فى أحضان دسدمونه ويجدد نيران هممنا اللى انطفت وينشر فى قبرص راحة البال.

تدخل دسدمونه وياجو ورودريجو وإميليا

كاسبيو: آه، آدى كنز البحر وصل البر، يارجال قبرص إحنوا ركابكم قُدُّامها. مرحبًا يامولاتى، إن شاء الله رضا السما يعمل حواليك سياج يحميك من قدامك ومن خلفك ومن عالجنبين.

⁽١) رب الأرباب عدد الرومان.

دسدمونه: أشكرك يا كاسيو الشجاع، إيه الأخبار اللي ممكن تقولها لي عن مولاي؟

كاسبير: لسه ماوصلش، وماعنديش خبر كفاية غير إنه في صحة كويسة، وحايكون هنا قريب.

دسدمونه: لكن أنا خايفة . . إزاى تهترا عن بعض؟ .

كاسبيو: الصراع الهايل بين السما والأرض هوه اللي فرقنا.

صوت من الداخل: شراع! شراع!

لكن هس، دا شراعا.

السيد الثانى : دى مدافع المركب بتحيى القلعه، دا كمان صديق. كاســــيو : روح شوف الخبر إيه.

يخرج السيد الثائي

باحامل الرايه، أهلا بيك (إلى إميليا) مرحبًا يا سيده: ماتزعاش يا ياجو الطيب إذا كنت بوسع منطقه تأدبى، تربيتي ياعزيزى هيه اللي بتفرض على الشكل الجرئ ده من المجامله.

يقيل إميليا

ياجـــو: لو كانت يا سيد سخيه معاك بشفايفها زى ما هى سخيه معايا بلسانها لكنت شبعت.

دسدمونه: یاحرام، دی حتی یا حسره نادر ما تتکلم.

ياجبو: بذمتى، بتتكلم أزيد من اللزوم، خصوصاً ساعة ما أعوز أنام، طبعا مع حضرتك بتحط لسانها في سرها وساعتها تفضل تتعارك مع فكرها.

إميليا: دا كلام مالوش أساس.

ياجــو: إيهيه، إطلعى من دول! إنتوا بره البيوت تصاوير وجواها نواقيس. قطط وحشيه في مطابخكم، لما تلذوا تعملوا قديسات، ولما تتأذوا تنقلبوا شياطين. في شغل البيت لعبية وشغيله... في السرير.

دسدمونه: ياحفيظ منك، يامفترى.

ياجـــو : أبدا، واللا يعنى أنا تركى، انتوا تصحوا عشان تلعبوا وتخشوا السرير عشان تشتغلوا.

دسدمونه: عمري ما حاخليك تكتب تمدحني.

ياجىر: لأ، أوعى تطلبي ده مني.

دسدمونه: طب إيه اللي تكتبه عنى لوكان لازم تمدحنى؟

ياجـــو: ياستى، يانبيله، إعفينى من المهمه دى، أنا ولا حاجه إن ماكنتش أنقد كل حاجه.

دسدمونه: باللا، حاول. فيه حد راح المينا؟

ياجــــو: أيوه ياهانم.

دسدمونه: (على جنب) أنا مش منشرحه، لكن باحاول أخدع الحالة اللي أنا فيها بمظهر تانى (لياجو): ياللا تقول إيه لو مدحتنى؟.

ياجـــو: ما أنا باحاول أهوه، بس ابتكاراتى بتطلع من نافوخى زى ما بيطلع الغرام القماش، تقوم تنبش معاها المخ بحاله وماله . لكن ربة الهامى جاها الطلق، وآدى خلاصها: إذا كانت جميله وعاقله يبقى عندها عقل وجمال، صفه للاستعمال وصفه يبقى تستخدمها.

دسدمونه: كريس، وإذا كانت سوده ونبيهه؟

ياجـــو: إذا كانت سوده ومع كده نبيهة، حاتعرف تلاقى لها شريك يشوفها بيضه.

دسدمونه: من سئ الأسوء.

إميليا: وإذا كانت جميله وناقصه عقل؟

ياجـــو : عمر الجميله ما ينقصها عقل، وحتى لو نقصها جنانها حيساعدها برضه إنه يجيلها وريث.

دسدمونه : دى مغالطات محفوظه من زمان عشان تضحك الهبل فى البارات، طب إيه المدح الذميم اللى حاتقوله فى اللى وحشه وناقصه عقل؟.

ياجـــو: مافيش واحده وحشه وناقصه عقل إلا وعملت عمايل الجميله الله عندها عقل.

دسدمونه: يا تقل جهلك، الأسوأ تقول فيها الأحسن، طب إيه المدح اللى تقدر تقوله في واحده تستاهله بحق وحقيق، واحده مزاياها تخلى الحقد نفسه يضطر يشهد لها؟.

ياجــو: الجميله دايما وعمرها ما اتغرت، اللي لسانها ملكها ومع كده عمره ما على، اللي دهبها كتير لكن عمرها ما اتبهرجت، اللي احجمت عن رغبتها ساعة ما قالت وممكن د الوقت، اللي لما غضبت وكان انتقامها في إيدها، مسكت نفسها وصرفت زعلها، اللي عقلها عمره ما نقص لدرجة أنها تبدل الكويس بالوحش، اللي تعرف تفكر لكن عمرها ما تدور تبوح بسرها، اللي المعجبين يبقوا وراها لكن عمرها ما وشها، دي إتعلمت، إذا كان إتعمل زيها...

دسدمونه: عشان تعمل إيه؟

ياجـــو: عشان ترضع مغفلين وتمسح البلاط.

دسدمونه: آدى كلام ختامه مافيش أعرج ولا أعجز منه! إميليا، رغم إنه جوزك، إوعى تتعلمى منه، وانت يا كاسيو، تقول إيه؟ مش برضه ده ناصح مافيش أكفر ولا أكتر استهتار منه؟.

كاسبير: كلامه ناشف، ياافندم. ممكن تقدريه عسكرى أكتر منه أديب.

یاجــو: (علی جنب)، ده بیاخذ کفها، عظیم، إهمس، إهمس فی ودنها، بشبکة رفیعه زی دی راح أصید دبانه کبیره أدها أد کاسیو، أیوه، ابتسم لها، ابتسم: أنا حاًعرف أسلسلك بخیوط غزل حضرتك، مضبوط، هوه کده، إذا کانت النمر اللی زی دی حاتکلفك مرکزك کان یبقی أحسن لك ما تبوسشی الأنامل کتیر زی ما بتعمل دلوقت وانت بتلعب دور السید المهذب. کویس قوی، بوسه جمیله؛ غزل رائع؛ هوه کده مضبوط، تانی الصوابع علی شفایفك؟ یاریتها کانت خراطیم حقنه شرجیه عشان تنبسط!!.

سوط طرمبيطه من الداخل

ياجــو: المغربي؛ أنا عارف دقته.

كاسسيو: دا صحيح بالفعل.

دسدمونه: تعالوا نستقبله.

کاسییو: آه دا جای.

يدخل عطيل ويعض الأتباع

عطييل: أهلا بالمحارب الجميل!.

دسدمونه: عزیزی عطیل!.

عطيل: دهشتى الكبيره إنى أشوفك هنا قبلى قد انشراحى يا متعة حياتى. لو كانت كل عاصفه تجيب بعدها هدوء زى ده، لتمنيت لو إن الرياح هبت لغاية ما تصحى الموت، وتجبر القارب المنهك إنه يطلع فوق تلال من البحار عاليه على جبل الأرباب وبعدها ينخفض تانى انخفاض الجحيم عن السما. لو كان الموت دلوقتى انكتب لكان السعد دلوقت إكتمل، لأنى خايف بعد ما روحى نالت منتهى الرضا، مايجيش نعيم زيه فى القضى المجهول.

دسدمونه: بعد الشر، ربنا ما يكتب لحبك وحبى وراحتك وراحتى إلا الزياده مع كل يوم من أيامنا.

عطبیل: آمین یارحیم، ما اقدرش أَرفی الهنا ده حقه الكلام، بیستوقفنی هنا (بلمس قلبه)، دی سعاده زادت عن الحد، ده، وده، دول أكبر خلاف ممكن تبلغه قلوبنا.

يبوسوا بعض

ياجـــر: (على جنب) أيوه، نغماتكم دلوقت ماشيه مع بعض، لكن وحياة أمانة ياجوراح أعرف أرخى الأوتار اللى بتعزف المزيكه دى،

عطيل : تعالوا ، ع القصر، فيه أخبار لكم ياأصدقائي، حروبنا انتهت،

الأتراك غرقوا. إزى معارفى القدام هذا فى الجزيرة؟ حبوبتى، انتى حاتكونى محط الرغبات فى قبرص، أنا وجدت هنا حب كبير، عزيزتى، أنا عمال أثرثر من غير مناسبه واهتى فى سعادتى، ياجو يا أمير، أرجوك تروح المرسى وتنزل صحاحيرى، وخد الكابتن ع القلعه، دا راجل كريم، كفاءته تفوق كل احترام، تعالى يا دسدمونه، مرة تانيه مرحب بيكى فى قبرص.

الكل يذرج ما عدا ياجو ورودريجو

ياج و: (لواحد من الأتباع الخارجين)، إنت تقابلنى فى المينا فى الحال، (لرودريجو): تعالى هنا، إذا كانت عندك همه وبيقولوا إن الجبنا لما يحبوا بيتولد عندهم نبل أكبر من المغروس فى طبيعتهم فاسمعنى، القائد التانى عليه الدور الليله فى الحراسه، لكن أولا لازم أقولك ده: دسدمونه واقعه فى غرامه تمام.

رودریجو: بتحبه هوه ؟! یاه ده مش ممکن.

ياجسو: حط صباعك على بقك كده، (يضع صباعه على شفته) وسيبنى أفهمك . خد بالك إزاى اندفعت فى حب المغربى من غير أى سبب غير بجاحته والتخيلات الكدابه اللي حكاها لها، فهل حاتفضل تحبه كده عشان ترثرته؟ ماتخليش قلبك الفهيم يتصور، عينها لازم تتغذى، وإن البهجه اللي حاتلاقيها في إنها تبص للشيطان؟ الدم لما يخمد بعد الفعل إياه، عشان يحمى تانى وعشان الشهيه

تنفتح بعد الشبع، لابد له من محيا جميل وتوافق في السن والتربيه والمحاس، ودي كلها حاجات المغربي منفض منها، فنظرا لانعدام جميع هذه اللوازم فحساسية الست المرهفه راح تكتشف إنها انخدعت وراح تبتدي ترجع وتشمئز وتنفر من المغربي، الطبيعه نفسها راح تدرس لها الموضوع ده وتفرض عليها اختيار تاني. ومادمنا سلمنا بكده باصاحبي، عشان ده رأى سليم نمام ومافيهوش أي تكلف، فقول لى بقى: مين اللى واقف بجداره على السلمه اللي تودي للحظ ده أد كاسيو؟ واد مكلمنجي، مالوش مبدأ غير مجرد الظهور في صورة الإنسان المؤدب المهذب عشان يضمن تنفيذ مراده وفجره المستخبى في الغويط، إه، مافيش، مافيش، واد مزفلط، نمرجي، نهاز للفرص، عينه تقدر تطبع مزايا مزيفه من غير ماميزة واحده حقيقية تبان، وغد ابن شيطان، فوق كده وكده مهندم وفي عز شبابه وفيه كل المستازمات اللي بتدور عليها العقول وقليلة الخبرة، وباء كامل، والمرة حطت عينها عليه خلاص.

رودريجو: أنا ما أقدرش أصدق كل ده عنها، هي أفضل من كده.

یاجـــو: فضیلة متغطیه بورقة تین^(۱) النبیت اللی بتشریه معمول م العنب، لو كانت ست فاضله زی حضرتك ما بتقول، كان عمرها ما حبت المغربی، فضیلة مهلبیة! ماشفتهاش وهی بتحسس علی كفه؟ ماخدتش بالك؟.

⁽١) التعبير الانجليزي و تينه و فيه استخفاف ويصطحب بحركة فاحشه: وضع الإبهام بين صوبعين مضمومين أو في الفم.

رودریجو: شفت بس ده کان مجرد مجامله.

ياجــو: أقطع دراعى إن ماكنش فسق، مؤشر ومقدمة غامضة لقصة شهوانية وأفكار وسخة. دول قربوا من بعض بشفايفهم لدرجـة إن أنفاسهم حـضنت بعض، أفكار كـريهـه، يارودريجو، لما العواطف دى تمهد الطريق م الطرفين بالشكل ده، ييـجى بعدها على طول اللب، والتـمرين الأساسى، الخاتمه الاندماجيه، بوف!! لكن ياسيد إنت تسمع كلامى. أنا اللي جبتك هنا من البندقية، روح الحرس الليله، حا اديلك أمر الخدمه، كاسيو ما يعرفكش، وأنا مش حاكون بعيد، شوف أى فرصه عشان تخلى دمه يغلى، إما بالكلام بصوت عالى أو بتسفيه علمه أو بأى طريقه تانيه تعجبك حسب ما تسمح بيه الفرصه.

رودريجو: كويس.

ياجـــو: يا سيد، كاسيو عنيف وسورة الغضب تركبه بسرعة متناهيه ويصح يرفع إيده عليك، سخن له ودانه لغاية ما يعملها عشان تدينى الفرصه أهيج مظاهره بين أهل قبرص اللى مزاجهم مش حايرجع لحالته الطبيعيه إلا إذا اتكرش كاسيو. بالشكل ده الرحلة تقصر لرغباتك بالطرق اللى حا العبها لك، والعقبه اللى لا كان فيه أمل ولا نجاح لينا طول ما هى موجوده تنزاح لمصلحتك.

رودريجو: حاعمل كده لو قدرت ألاقى الفرصه.

ياجـــو: اعتمد على. تعالى قابلنى قريب فى القلعه. لازم أروح أجيب له عفشه، إلى اللقاء.

رودريجو: إلى اللقاء.

بخرج

باجـــو : أما إن كاسير بيحبها، فدا شيء مؤكد، وأما إنها بتحبه، فدا شيء طبيعي ومعقول، والمغربي وإن كنت مش باطيقه، راجل مخلص بطبعه وحب ونبيل وأعتقد أنه حايكون جوز حنون جدا لدسدمونه. ودلوقتي أنا كمان باحبها، مش عن شبق مالوش آخر، وإن كنت ماارفضش خطيئه صخمه زي دى لو سنحت، ولكن جزئيا عشان آخد بتارى، لأنه عندى شك إن المغربي الشهواني ممكن يكون نط على سريري، شك زى السم الهارى بيقرصتى من جوايا، ومافيش أى شيء يقدر أو راح يهدى نفسى غير إن احنا نبقى خالصين، مرة بمرة . أو إذا ماكنش يبقى على الأقل أوقعه في غيره قد كده جامده لدرجه أنه ما فيش فكر يقدر يشفيه منها. ده اللي راح أعمله لو الواد التافه بتاع البندقية، اللي أنا كابح جماحه علشان أصطاده بسرعه، فضل على كده، راح أحط كاسير نحت رحمتي وراح أمرمغ سمعته في التراب عند المغربي، لأني خايف ليكون كاسيو هوه كمان لبس طاقية نومي، راح أخلى المغربي يشكرني ويحبني ويكافئني لأني عملت منه حمار أزعر واشتغلت على راحة باله وسلامه لغاية مارصله للجنون. الخطه هنا، بس لسة مش واضحه، اللزم ما يبانش وشه تمام إلا مع التنفيذ. يضرج

(المشهد الثاني) [شارع]

يدخل منادى عطيل بإعلان، ومعاه ناس

المنادى: آدى إرادة عطيل، قائدنا النبيل الشجاع، نظرا للأخبار المؤكدة اللى لسه واصله عن تحطيم الأسطول التركى عن آخره، فكل واحد له حق التعبير عن فرحته زى ما هو عايز، اللى يرقص يرقص، واللى يحب يولع صواريخ يولع، كل واحد حسب التسليه اللى تيجى على مزاجه، عشان بالإضافه للأخبار الساره دى، اليوم حيكون الاحتفال بزواجه. ده اللى تفضل بطلب إعلانه. جميع المكاتب مفتوحه والحريه التامه فى التعبير مكفوله من الساعة خمسة دلوقت لغاية الجرس ما يدق الساعة حداشر. بركه السماعي جزيره قبرص وعلى قائدنا النبيل عطيل.

خسروج (المشهسد الثالث) [قاعة في القصر] يدخل عطيل ودسدمونه وكاسيو

عطيل : عزيزى ميشيل ، قوم بالحراسة الليله. خلينا نعلم نفسنا الوقوف عند الحد الأمثل اللي مش لازم مسراتنا تخرج عنه أبدا.

كاسيو: ياجر عنده تعليمات باللي يتعمل لكن مع كده أنا راح اخللي باللي من الموضوع بنفسي.

عطیل: یاجو راجل فی منتهی الأمانه، میشیل إنمسی بالخیر، بکره أحب أكلمك بدری قد ما تقدر (لدسدمونة) تعالی یاحبیبتی الغالیة، مادام الکسب تم یبقی فاضل الاستمتاع، والثمره دی قطفها بینی وبینك لسه قدامنا، (لكاسیو) اتمسی بالخیر.

بذرج عظیل ودسدمونه بدخل باجسو

كاسبيو: أهلا ياجو، لازم نمشى نستلم الخدمة.

یاجـــو: مش الساعه دی یا قائد تانی، دی لسه ماجاتشی عشره، السید القائد بتاعنا وزعنا بدری علشان حب دسدمونه بتاعته، مین یلومه؟ دا لسه ما دخلشی علیها، ودی واحده تلیق بجوبیتیر.

كاســـيو: هيه فعلا ست بديعة.

ياجمو: وصدقني، لعبيه نمام.

كاسبير: فعلا مافيش مخلوق أعذب ولا أرق من كده.

ياجـــو: وياسلام على عينها، ماتقولشي دعوة للتحريض!

كاسير: عين جذابه، لكن بالنسبه لى باشوفها في منتهى التواضع.

ياجسو: طب ولما تتكلم، مش ده إخطار لحمل سلاح الحب؟

كاسمير: هي فعلا كاملة الصفات.

یاجـــر : النهایة، ربنا ببارك فی ملایات سریرهم، تعالی یا قائد تانی، أنا معایا شویة نبیت وفیه بره شباب من قبرص عايزين يشربوا معاك كاس في صحة عطيل الأسود.

كاسبيو: مش الليلة دى يا عزيزى باجو، أنا دماغى مش نمام ومالهاش طاقة على الشرب، ياريت روح المجاملة كانت اخترعت طريقه تانيه لتكريم الضيوف.

ياجـــو: أوه، دول أصدقائنا، وده كاس واحد، أنا راح أشرب بدالك. كاســيو: أنا شربت كاس واحد بس الليله وكمان حطيت عليه ميه، وشوف مفعوله هنا، أنا مالياش حظ مع الشرب، ولاقدرش

أحمل راسي فوق طاقتها.

ياجـــو: إيه الكلام ده ياراجل؟! الليله عيد والجدعان بيترجوك.

كاسير: فين هما؟

ياجسو: هنا على الباب، أرجوك تعزم عليهم.

كاسيير: حاضر، بس أنا مش عاجباني الحكايه دي.

يخسرج

یاجـــو: لو قدرت أبلعه کاس واحد بس فوق اللی شربه قبل کده اللیله، مزاجه راح ینقلب لغضب وعراك، زیه زی کلب الهانم الصغیره، ودلوقت الأهبل بناعی اللی اسمه رودریجو واللی الحب قلبه من فوقه لتحته شرب لکیعانه فی صحة دسدمونه، وهو مکلف بالحراسه، غیر کده غرقت فی کاس بعد کاس تلات ولاد من قبرص مالیین نفسهم قوی وعینهم محطوطه علی کرامتهم ماتنشالش عنها أبدا، ولاد من عصارة الجزیرة دی اللی مابتبطاش حرب، وهما کمان مکلفین بالحراسه. مش فاضل دلوقت غیر انی أخلی

صاحبنا كاسيو يتصرف وسط جماعه السكرانين دول تصرف مهين للجزيره، لكن أهم جايين هنا، لو إن البقيه جات موافقه للى أنا باحلم بيه تبقى مركبى ماشيه عال مع الريح والتيار.

يدخل كاسيو ومعاه مونتانو ويعض الساده

كاسيو: وربنا دول شربوني كمان كاس.

مونتات : بالأمانه كده، وكلمة راجل عسكرى، كان كاس صغيره، مايحصلش تمناية.

ياجـــو: شوية نبيت باللا!!

بغنی: وخلی الدن، یرن، یرنا وخلیهولی یرن، یرنا الجندی بشر والعیشه شبر سیب الجندی بشرب بقی

شرية نبيت يارلادا

كاسير: وربنا حته غنوه هايله.

ياجـــو: أنا اتعلمتها في انجلتره، بس هناك بيعرفوا صحيح يشربوا، صاحبك الدنمركي والألماني والهـولندي أبوكـرش في الشرب؟ هو هو! ولاحاجه جنب صاحبك الانجليزي.

كاسير: يعنى صاحبك الانجليزي خبير للدرجه دي في الشرب؟

ياجـــو: أمال، دا يشرب كاس ورا كاس وكأنه بيلعب لغاية صاحبك الدنماركي ما يقع من طوله، ومش محتاج لمجهود علشان صاحبك الألماني يتبطح علي الأرض، أما صاحبك الهولندي فيخليه يرجع قبل ما يبتدى الدور التاني.

كاسير: في صحة قائدنا.

مونتاتسو: صبح ياقائد تاني، أنا معاك.

ياجـــر: ياحلاره انجلتره!

بغنى: الملك ستيفن كان قيم حبتين لبساسه يادوب كلفه شلنين وبرضه لقاه غالى حبيتين جساب الخسياط ووراه الويل. كان راجل مهم سمعته عاليه وانت واحد درجتك واطيه، الغرور هو اللي بيشد البلد لتحت، إلبس بقى عبايتك القديمه وكفايه عليك.

كاسين، هــوه!

كاسبير: الله، غنوه أبدع من التانيه كمان.

ياجـــر: تحب تسمعها تانى؟

كاسير: لأ، عشان أنا باعتبر الراجل اللي يعمل الحاجات دى مايستحقش مركزه، أمال، ربنا فوق الكل، وفيه نفوس

مكتوبه لها النجاه ونفوس مش مكتوب لها النجاة.

ياجـــو: كلام صحيح، ياعزيزنا القائد التاني.

كاسبير: بالنسبه لى أنا من غير مساس بالقائد العام أو بأى شخصيه مهمه فأنا أنمنى إنى أكون بين اللى مكتوب لهم النجاة.

ياجسسو: وأنا شرحه، ياقائد تاني.

كاسبيو: أيوه، بس بعد إذنك، مش قبلى، القائد التانى لازم ييجى قبل حامل الرايه، سيبونا من الموضوع ده، خلونا نشوف شغلنا ربنا يغفر خطايانا ياساده، ياللا نبص للشغل، أوعوا تفتكروا ياساده إن أنا سكران، دا حامل رايتى، وآدى إيدى اليمين، وآدى الشمال، أنا دلوقت مش سكران، آدينى واقف بثبات واتكلم كويس قوى.

الجميع : كويس قوى قوى .

كاسبير : جميل، جميل جدا إذن، وإذن اوعوا تفكروا إن أنا سكران.

پخسرج

مونتاتو : باللاع القلعه باساده، باللا، خلونا نبتدى الحراسه.

ياج ـــو : شايف الأخ اللى مشى قبلنا، ده راجل عسكرى كان يصح يكون قائد تانى لقيصر نفسه، يأمر ويطاع، لكن أديك شايف عيبه، ضد فضيلته على خط مستقيم، دى طول دى، أنا متأسف عشانه، أنا خايف إن الثقه اللى القائد حطها فيه، في لحظة من اللحظات اللى يطير فيها عقله، تودى الجزيره دى في داهيه.

مونتاتر: هوه بيتوجد في الحالة دى كتير؟

ياجـــر : دى المقدمة اللازمة للنوم عنده . إذا الخمره ما رجحتش مهده يفضل صاحى لغاية العقرب ما يلف أربعة وعشرين ساعة .

مونتات : يستحسن إن واحد يفاتح القائد في الموضوع ده ميمكن مش واخد باله أو سلامة طبعه مخلياه مايشوفشي إلا الجانب الكويس في كاسيو من غير ما يبص لآفاته، مش صح كده ؟

يدخسل رودريجسو

باجـــو: على جنب، إيه اللى جابك بارودريجو، أرجوك تحصل القائد التانى، روح.

مونتات : ده شيء يدعو للأسف إن القائد يخاطر بتعيين واحد عنده صعف مستحكم في منصب التاني بعده على طول الأمانه تقتضي إن ده يتقال للمغربي.

ياجـــو : مش أنا ولو اديتني الجزيره دي بحالها، أنا كاسيو عزيز على، راح أعمل كل اللي أقدر عليه علشان أشفيه من داه.

صياح من الداخل: النجده! النجده!

لكن اسمع ، إيه الضجة دى.

يدخل كاسيو وهوييطارد رودريجو

كاسسيو: ياصعاوك، يامنحط، ياندل.

مونتاتو: إيه الموضوع ياحضرة القائد التاني؟

كاسبيو: واد وضيع زى ده جاى يعلمنى مهنتى، لكن الوضيع أنا حاضربه لغاية مايفطس فى قمقم.

رودريجو: تضريني؟!!.

كاسمير: إنت بتحرك لسانك، بامنحط ؟.

يضرب رودريجو

مونتاتــو: لاياحضرة القائد التاني، أرجوك ياسيد، وقف إيدك.

كاسميو: سيبنى يا سيد وإلا راح أكسر لك نافوخك.

مونتاتسو: هدى، هدى، إنت بس سكران.

كاسيو: سكران.

يتعساركوا

ياجسو: (على جنب لرودريجو)، وقعه، على بره بقولك، أخرج وصرخ إنه حصل تمرد.

بخرج رودريجو

لأ، مش كده باعزیزی القائد التانی، خافوا من ربنا باسادة، ساعدونی ساعدونی باهو، باقائد تانی، باسیدی مونتانو، ساعدونی باساده، أما دی حراسه جمیله صحیح.

الجسرس بدق

مين اللي دق الأجراس؟ ياحفيظ، البلد راح تصحى، رينا يهديك وقف ياقائد تاني، إنت كده حتفضل خجلان طول عمرك، راح تخسر سمعتك للأبد.

يدخل عطيل ويعض الأتباع

عطيل: إيه اللي بيحصل هنا؟

مونتاتو: أنا لسه بانزف، انجرحت لحد الموت، الموت وجب عليه.

بهاجم كاسيو مره تانيه

عطييل: كفايه، حافظوا على حياتكم.

ياجـــو: وقفوا، يانائب تانى، ياسيد مونتانو، ياحضرات، هوه انتوا خلاص فقدتوا كل إحساس بالمكان والواجب، وقف إنت وهوه، القائد بيكلمكوا، كفاية عار.

عطيل: عشان إيه ده ؟! جاه منين كل ده ؟! هو احنا انقلبنا تراكوه عشان نعمل في بعض اللي ربنا ماقدرش العثمانيين عليه ؟؟ استحوا من المسيح ووقفوا العركة الهمجية دى . اللي راح يرفع سلاحه الأول علشان يشفي غله يبقى مستغنى عن حياته ، موته راح يكون في حركته ، سكتوا الجرس الفظيع ده اللي بيبدد هدوء الجزيرة المرتاعة ، إيه الموضوع ياحضرات ؟ ياجو يا أمين ، باين عليك كأنك مت من الحزن ، اتكلم ، مين اللي ابتدى ؟ بحق محبتك ، أنا بأمرك .

یاجو : أنا مش عارف، من لحظه بس، یادوب لحظة . کانوا آخر صحوبیه ، لطاف مع بعض کأنهم عریس وعروسه بیقلعوا هدومهم قبل ما یدخلوا السریر، وفجأة ، مافیش ثانیه ، کما لو کان فلك من الأفلاك جن الناس ، کل واحد هجم علی التانی علشان یسیح دمه ، ما أقدرش أحدد بدایة العرکة السخیفة دی ، وکنت أتمنی لو خسرت فی معرکة مجیدة الرجاین اللی جابتنی هنا عشان أشوف اللی شفته .

عطييل: إزاى حصل يامشيل إنك نسيت نفسك للدرجة دى؟ كاسبيو: أرجوك تعفيني، أنا مش قادر أتكلم.

عطيل: وانت يامونتانو بقيمتك الكبيره، إنت اللى كنت دايما مهذب واللى الدنيا كلها لاحظت ثبات شبابك وجديته وكان لك اسم عظيم في أفواه أشد المتزمتين، إيه اللى حصل علشان تفك رباط سمعتك بالشكل ده وتضيع صيتك الطيب نظير لقب فتوة الليل؟!!

مونتاتسو: عطيل النبيل، أنا مجروح جرح خطير، حامل رايتك، ياجو ممكن يوفر على كلام ما أقدرش عليه دلوقت من غير ما أتألم ويبلغك كل اللي أنا أعرفه. أنا ما أعرفش إن شيء غلط صدر منى الليله دى بالكلام أو بالفعل، إلا إذا كانت الشفقه على النفس رزيله أو الدفاع عنها في وجه العنف خطيئة.

عطیل: آه، بحق السما، أنا الدم راح يبتدى يغلب دليلى والغضب بعد ما ضلم حكمى عاوز يحكمنى، أنا لو اتحركت بس، أو مجرد رفعت دراعى ده لمات أحسنكم من استيائى، فهمونى إذن إزاى حصلت العركه السخيفه دى، مين اللى بدأها، واللى راح تثبت عليه التهمه، ولو كان توأم لى، اتولد معايا واتولدت معاه، راح يخسرنى، إيه الحكاية، بلد فى حرب، لسه بترتعش ولسه قلوب أهلها مليانه خوف، وتعملوا عركة داخلية، أهلية، أهلية، فى عز الليل، وفى مكان الحراسة على داخلية، أهلية، وشيع. ياجو، مين اللى ابتدا؟

مونتاتو: لو تحيزت لميولك أو انتصرت لزميلك فزودت على الحقيقه أو نقصت، تبقى إنت مش عسكرى.

ياجــو: ماتلمسش الوترده، أنا كنت أفضل إن لساني ينقطع قبل ما

يقول كلام يؤذى مشيل كاسير، لكن أنا مقتنع إن التصريح بالحقيقه مش راح يضره في أي شيء، الحقيقه آهه ياقائد، مونتانو وأنا كنا بندردش، وإذا بواحد دخل يصرخ في طلب النجده، ووراه كاسيو بسيفه مصمم على الإجهاز عليه، السيد ده يافندم، تدخل عند كاسير رطلب منه يهدى، وأنا من ناحيتي جريت ورا الجدع اللي بيصرخ لحسن البلد زي ماحصل تنذعر من زعيقه، لكن هوه، برجل خفيفه، سبق قصدى، وأنا رجعت بسرعه لما سمعت رن السيوف وضرباتها، وكاسيو يحلف بأيمان غليظه عمري ما سمعتها منه قبل الليله دى، فلما رجعت، كل ده كان في ثواني لقیت سیف بسیف نازلین فی بعض ضرب، تمام زی ما كانوا لما انت فرقتهم عن بعض، أكتر من كده ماعنديش شيء يتقال، لكن البني آدمين، همه البني آدمين، أحسنهم بينسى نفسه في بعض الأوقات ، ولو إن كاسيو أذاه أذيه صغيره زي الرجالة ماينضرب في ساعة الغضب الناس اللي بتتمنالها كل خير، إلا إن كاسير في اعتقادي سمع قطعا من الواد اللي جرى شتيمة مانعرفهاش، مايطيقهاش الصبر. عطسيل : أنا عارف يا ياجر إن أمانتك ومحبتك بيهونوا الموضوع علشان تخففه على كاسير، كاسير أنا بحبك صحيح، لكن عمرك ما حاتكون ضابط عندى.

تدخل دسدمونه وأتباعها

شوفوا، آدی حبیبتی کمان صحیت، (لکاسیو) أنا راح أخلیك عبره. دسدمونه: إيه اللي حصل يا عزيزي؟

عطـــيل: كل شيء كـويس ياحـبيبتي، تعالى نامى (لمونتانو) جراحك ياسيد أنا بنفسى حاطيبهالك، إنقلوه من هنا.

أتباع تقوم بنقله

ياجو، انزل ع البلد شوف أحوالها كويس، وهدى اللى اتفزعوا من العركه الحقيره دى، تعالى يادسدمونه، هيه دى حياة العسكر، يصحوا من حلاوة النوم على صوت العراك.

خسروج، ما عدا كاسيو وياجو

ياجـــو: فيه إيه؟ إنت مجروح ياقائد تاني؟

كاسسيو: أيوه، جرح مالوش جراح.

ياجـــو: إيه ده، ربنا مايسمع منك.

كاسبير: سمعتى، سمعتى، سمعتى! آه فقدت سمعتى، فقدت الجزء الجزء الخالد من نفسى واللى فضل هوه الوحش، سمعتى يا ياجو، سمعتى.

یاجـــو: بذمتی أنا افتکرتك انجرحت جرح جسمانی، دا كان يبقی شیء ملموس أكتر من السمعه، السمعه دی تركيبه فارغه، مافيش أكذب منها، كتير مابتيجی من غير حق وتضيع من غير استحقاق، إنت ماخسرتش أی سمعه إلا إذا دخلت فی رأسك إنك خسرتها، إيه يا راجل، دا فيه ألف طريقه لرضا القائد، إنت دلوقت مغضوب عليك فی وقت متعكر فيه مزاجه، عقاب أكتره سياسه مش نقمه، زی ما تضرب كلبك اللی ما عليهش ذنب علشان تهت سبع جبار. اترجاه

تانى، تكسبه.

كاسبير: أنا أفضل أترجاه يحتقرنى عنإن قائد عيم زيه ينخدع فى ابط تافه، سكير، قليل العقل زيى، واحد سكرى، يتكلم زى البغبغان، ويثرير، يتشاحن، ويحلف، وينفخ فى الكلام مع ضله، ياروح النبيت المستخبيه، لو كان لك اسم تتسمى بيه لسميتك الشيطان.

ياجـــو: وداكان مين ده اللي انت بنجري وراه بالسيف؟! عملك حاجه؟!!.

كاسبيو: ما عرفش.

ياجىسى : بقى دە ممكن ؟!!.

كاسبيو: أنا فاكر شوية حاجات غامضه من غير أى شىء محدد، عركة، لكن من غير أى فكرة عن سببها، بقى يارب معقول الناس تحط عدو فى بقها علشان يسرق منها مخها، معقول إننا فى وسط الفرح والانبساط والتهييص والتصقيف نسيب نفسنا تتحول لبهايم.

یاجـــو: لکن انت دلوقت کویس قوی، إزای استرجـعت صوابك بسرعة کده ۱۴.

كاسبير: شيطان السكر عجبه إنه يسيب محله لشيطان الغضب، نقص يوريني نقص تاني علشان أحتقر نفسي إحتقار صريح.

ياجــو: حيلك، دا انت واعظ قاسى بصحيح. صحيح أنا كنت ائمنى نظرا للوقت والمكان ووضع البلد إن اللى حـصل ماكنش يحصل، لكن مادام حصل، صلحه بالشكل اللى ينفعك.

کاسیو: حاطلب منه یرجعنی مکانی، حایقولی إن أنا سُکری، لو کان عندی أفواه بعدد أفواه الهیدرا التسعة، لکان رد زی ده سدها کلها، کون الواحد بیقی دلوقت راجل موزون، وبعدها بشویه یبقی مجنون، وشویه بعدها کمان وینقلب وحش، شیء عجیب، کل کاس زاد عن الحد علیه لعنه ومحتواه شیطان.

باجـــو: سيبك من الكلام ده، النبيت الطيب مخلوق طيب وأليف إذا استخدمته كويس، ماتحتجش عليه بعد كده، ثم ياعزيزى القائد التانى، أفتكرك عارف إنى باحبك.

كاسيد. أنا سكران؟

یاجــو: أنت أو أی راجل ممکن یسکر فی وقت من الأوقـات، أنا حاقول عمل ایه، حرم قائدنا هی دلوقتی قائدنا، أنا أقدر أقول لك كده لأنه كرس نفسه واستسلم لتأمل وتمعن جاذبیتها وكل حته فیها، اعترف لها بكل اللی حصل من غیر حرج، لح علیها علشان تساعدك ترجع لمكانك، هی بطبیعتها قد كده كریمه، رحیمه، مستجیبه، ملائکیه لدرجه أنها تعتبره نقص فی طیبتها لو ماعملتش أكتر من المطلوب منها، اتوسل لها تسد الشرخ اللی حصل بینك وبین جوزها، وأنا مراهن بكل اللی عندی قصاد أی شیء ممكن تسمیه إن صداقتكم راح تبقی بعد الشرخ ده أقوی من الأول.

كاسير: دى نصيحة كريسه.

ياجــو: نصيحة صادرة أؤكد لك، عن محبة مخلصة وعطف

حقيقي.

كاسبير: أنا مؤمن بكده، بكره من الصبح بدرى راح اتوسل لدسدمونه الفاضلة علمان تتوسط لى، أنا حظى ميئوس منه لو وقف هنا.

ياجـــو : معاك حق، انمسى بالخيريا قائد تانى، لازم أقوم بالحراسه. كاســيو : تتمسى بالخيريا ياجو الأمين.

بنسرج

ياجـــو: مين ده اللى يقدر يقول إن أنا بالعب دور اللديم وأنا بدى نصيحة مخلصة لوجه الله، راجحة عند التفكير وبتورى صحيح أحسن طريقة تكسب رضى المغربي، ماهى دى أسهل طريقة تجر دسدمونه المحسنة علشان تكون واسطة خير، دى اتخلقت فياضه فيضان العناصر الجياشة، وما أسهل أنها تكسب رضا المغربي، ولو احتاج الأمر إنه يترك تعميده وكل ختوم الفدا من الخطيئة ورموزها، دا روحه اتقيدت بحبها لدرجة إنها تقدر تخليه يقرر ويلغى ويعمل اللى ما بدالها، طول ما هى عايزه تلعب دور ربنا بمخه الضعيف، إزاى إذن أكون لديم وأنا بانصح كاسيو بالخط المناسب، اللى يؤدى لغرضه طوالي ؟ يارب الجحيم، اما الشياطين تحب تدبر الخطايا اللى ما فيش أسود منها، تبتدى بتقديمها في صور سماويه، زى ما باعمل دلوقت، فبينما العبيط المخلص ده راح يشتغل على دسدمونه علشان تصلح له أموره وبينما هى راح تترافع عنه بقوة قدام المغربي،

حاكون أنا حطيت السم ده فى ودنه، دى بتدافع عنه عشان شهوة جسدها، كل ما زادت فى دفاعها عشان تصلح صورته، كل ما نقصت من رصيدها عند المغربى، كده فضيلتها راح أقلبها هباب، ومن طيبتها راح أعمل الشبكة اللى حاتصطادهم كلهم.

يدخل رودريجو

رودريجو، بتعمل هنا إيه؟!!


رودریجو: أنا هنا بطارد مش زی کلب صید بیل صطاد، لأ زی کلب بیعوی مع اللی بیعووا، فلوسی خلصت تقریبا، واللیله خدت علقه جامده ع الآخر، وأفتکر إن النتیجه حاتکون إنی خدت درس کافی من اللی شفته، وبناء علیه، من غیر ملیم فی الجیب، وشویة عقل زیاده، راح آخد بعضی وارجع علی البندقیه.

یاجـــو: مساکین الناس اللی ماعندهاش صبر، هوه فیه جرح اندمل الا شویة بشویة ؟! إنت عارف إن احنا بنشتغل بالعقل مش بالسحر، والعقل مستنی عجلة الوقت، هی المسائل مش ماشیه کویس؟ کاسیو ضربك، وانت بالوجع البسیط ده قطمت وسطه، یاما حاجات بتکبر وتحلا تحت الشمس، لکن الفواکه اللی بنستوی الأول لازم تکون زَهرت الأول.

اصبر شوية، وحق الصلى دا النهار طلع، الملذات والأعمال تخلى الساعات تبان قصيرة، خد بعضك وامشى، روح بيتك، بقولك روح، البقية راح تعرفها بعدين، ياللا امشى.

يخرج رودريجو

حاجتين لازم يتعملوا، مراتى لازم تتشفع لكاسيو عند سنها، وأنا على أحركها، وبين ده وده، أنا راح آخد المغربى على جنب وأرجعه في اللحظة التمام عشان يلاقى كاسيو عمال يترجى في مراته، أيوه، هي دى اللحظه! أضرب الحديد وهو سخن!!



القصل الثالث (المشهد الأول) أمام القلعة] بدخل كاسبو وشوية مزيكاتيه

كاسبير: العبوا هنا يامعلمين، أنا أعوض تعبكم، حاجه كده مختصره، كتحية إلعبوا ، صباح الخير ياقائدنا ، .

عــزف، يدخل المهرج

المهسرج: إيه الحكايه يامعلمين؟ هي آلاتكم جايه من نابولي علشان تخنف كده(١) ؟!.

موسیقی : إزای یا سید، إزای ؟.

المهسرج: هيه دى من فضلك آلات نفخ؟.

الموسيقى: أيوه، نعم، هي كده.

المهرج: وطلع لها بناع كده(١).

الموسيقى : طلع فين ياسيد؟

المهرج: مطرح مابيطلع لآلات نفخ كتير أنا عارفها، لكن اسمعوا

⁽١) ربما كانت إشارة للهجة أهل نابولي، وفيها خنافة، وكمان لمرض تناسلي يؤثر على الأنف.

⁽٢) تلميحة جنسية، المفروض إن المغربي حايدخل الليلة على مسمونه.

يامعلمين، آدى فلوس عشانكم، القائد قد كده بيحب المزيكه بناعتكم لدرجه إنه عاوزكم، باسم الموده القديمه، إنكم تبطلوا تعملوا دوشة بيها.

الموسيقى: خلاص ياسيد، حانبطل.

المهرج: إذا كان عندكم أى مزيكه مايتسمعش لها حس، ممكن ترجعوا لها لكن على ما بيقولوا، سماع المزيكه ماهواش موضوع مهم قوى عند القائد.

الموسيقى: ماعندناش مزيكه بالوصف ده ياسيد.

المهرج : إذن حطوا أنابيبكم في شنطكم، علشان أنا ماشي، روحوا إختفوا في الهوا، إبعدوا من هنا.

المزيكاتيه تخسرج

كاسبيو: صديقي الكريم، إسمعني.

المهرج: أنا ما اسمعش صديقي الكريم، أنا أسمعك انت.

كاسبير: في عرضك، وفر المراوغة، آدى حته دهب صغيره، عشانك إذا الست اللي بتخدم حرم القائد قامت من النوم قول لها إن في واحد اسمه كاسيو بيترجاها إنها تديله فرصة يقول لهاكلمتين، مستعد تعمل كده ؟.

المهرج: هي قامت على رجايها، فإذا رجليها حبت تجيبها لغاية هنا، فأنا حاتصرف على أساس إنى أبلغها.

يدخسل باجسو

كاسبير: بلغها يا أمير (يخرج المهرج) ، جيت في الوقت المناسب

ياياجر.

ياجـــو: الله، إنت مانمتش لحد دلوقتي؟.

كاسير: ولا لحظة، النهار كان طلع لما سبنا بعض، أنا سمحت لنفسى يا ياجو إنى أبعت لمراتك رسول، رجائى إنها تدبر لى مقابله مع دسدمونه الفاضله.

ياجـــو: أنا حابعتها لك حالا، وراح أشوف طريقه أبعد بيها المغربي من هنا علشان تعرف تتكلم وتتصرف بحرية أكتر.

كاسسير: أنا مدين لك بالشكر.

ينسرج باجس

أنا عمرى ما عرفت حد من فلورنسه أطيب ولا أخلص من كده.

تدخل إميليا

إميايا: صباح الخير ياسيادة القائد التانى، أنا آسفة لألمك لكن كل شيء راح ينتهى بالتأكيد على خير، القائد وحرمه بيتكلموا في الموضوع ده دلوقت، وهي بتدافع عنك بحرارة والقائد بيقول لها إن الراجل اللي إنت جرحته له شهرة واسعه في قبرص وصلاته العائلية فيها كبيرة، وإنه خضوعا للحكمة ماكانش يقدر إلا إنه يشيلك من رتبتك، لكن بيأكد لها إنه بيحبك وإنه مش محتاج لوسيط تاني غير مودته ليك علشان يختار الطريقة الأسلم اللي يرجعك بيها لرتبتك في أول فرصة تكون مأمونه.

كاسير: بس، أتوسل إليكي، إذا كنت تشوفي دا مناسب أو ممكن

محاولته، إنك تدبرى لى فرصة لحديث قصير مع دسدمونه لرحدها.

إميليا: أرجوك، اتفضل أدخل، أنا حارشدك للمكان اللي حاتلاقي فيه وقت كفاية علشان تتكلم براحتك.

كاسيو: أنا عاجز عن الشكر.

خسروج (المشهد الثاني) [في القلعسة]

يدخل عطيل وياجو وبعض السادة

عطيل : إدى الرسائل دى يا ياجو للربان وقول له يبلغ احتراماتى للمجلس، أنا فى المدة دى اح أتفقد تحصينات القلعة، ارجع لى هنا تانى.

ياجـــو: أمرك سيدى الكريم، أنا حافرم بالتنفيذ.

عطييل: تحبوا تشوفوا التحصينات ياساده؟

السادة: إحنا ررا سيادتكم.

خسروج

(المشهد الثالث) [في القلعـة]

تدخل دسدمونه وكاسيو وإميليا

دسدمونه: تأكد يا كاسيو النبيل،إنى راح أعمل كل اللى حاقدر عليه علشانك.

إميليسا: أيوه، ياستى، أيوه، ما قدرش أقولك الحكاية دى مزعلة جوزى قد إيه، كأن الحالة حالته.

دسدمونه : طبعا، ده راجل مخلص، مایکونش عندك شك یاكاسیو، إنى لابد راح أرجع المیه لمجاریها بینك وبین سیدى.

كاسبير : حسناتك فاضت على، وأيا كان مصير ميشيل كاسيو، هو ماسير مشير ممكن يكون أي حاجة غير خدامك المخلص.

دسدمونه : أنا عارفه ده ، اشكرك ، انت بتحب سيدى ومعرفتك بيه قديمه ، فتأكد إنه في ابتعاده عنك مش راح يروح مسافه أبعد من كونها مسافة سياسية .

كاسبيو: أيوه، بس السياسة بالفندم ممكن تقعد مده طويلة أو ماتلاقيش إلا طعام هزيل، صايص يغذيها، بحيث بعد أنا ما بعدت وانشغل محلى، ينسى القائد محبتى وينسى خدمتى.

دسدمونه : مایکونش عندك شك: أنا بأفراك قدام إمیلیا هنا إن أنا ضامنه لك مكانك وتأكد إن أنا مادام وعدت بصداقتی يبقی حأنفذ نصوصها لآخر بند. سیدی من دلوقتی مش راح يعرف

راحه، حاسهره لغاية ما اروضه، حاكلمه فوق حدود الصبر، سريره حايكون مدرسة، وترابيزته مكان اعتراف، مش راح يعمل حاجة إلا وادخل له فيها قضية كاسيو، خليك إذن مبتهج يا كاسيو علشان محاميك يفضل الموت عن إنه ينسى قضيتك.

بدخل عطيل وياجو

امیلیا: ستی، دا سیدی جای آهه.

كاسيير: أنا حاستأذن، يافندم.

دسدمونه: لأ، استنى واسمعنى لما اتكلم.

كاسبير: مش دارقت يافندم، أنا محرج جدا، وأعجز من إنى أخدم نفسى.

دسدمونه : طيب، اتصرف حسب ماتشوف.

بخسرج كاسيس

ياجـــر: آه ، دا مايعجبنيش .

عطيل: بتقول حاجه؟!!

ياجــو: ولا حاجة ياريس، أو إذا فحاجة مش عارف إيه هيه.

عطييل: مش دا كاسيو اللي كان بيستأذن مراتى؟.

ياجـــو: كاسير ياريس؟.. طبعا لأ، دى حاجه مش ممكن تيجى على بالجــو بالي إنه يتسلل زي المذنب بالشكل ده وهو شايفك جاى.

عطييل: أنا أعتقد إنه كان هو.

دسدمونه: آديك جيت، ياسيدي،أنا كنت لسه باتكلم مع واحد عدم

رضاك راح يقتله.

عطيل : قصدك على مين؟

دسدمونه: حایکون مین؟ کاسیو، القائد التانی بتاعك، سیدی اللی كلك طیبه، إذا كان لیّه معزه عندك أو عزوة ممكن تحركك، تبقی تتكرم علیه بالصلح فی الحال، علشان إذا ما كانشی ده إنسان بیحب حب حقیقی، وبیغلط عن جهل مش عن مكر، أنا مایبقاشی عندی أی تمییز للوجه الأمین، أرجوك ترجعه.

عطيل : هو اللي كان ماشي دلوقت؟.

دسدمونه : أيوه ، هو ، قد كده مذلول لدرجة إنه ساب معاى شيء من حزنه علشان أتألم معاه ، عزيزي ، أرجوك ترجعه .

عطييل : مش دلوقت ياعزيزتي، وقت تاني.

دسدمونه : طیب یبقی وقت قریب.

عطييل: أسرع وقت علشانك ياروحي.

دسدمونه: الليلة على العشا؟.

عطيل: لأ، مش الليلة.

دسدمونه: يبقى بكرة على الغدا؟.

عطييل: مش راح اتغدى في البيت بكره، لازم أقابل الظباط في العليات القلعه.

دسدمونه: يبقى بكره بالليل، أو التلات الصبح أو الضهر أو بالليل، أو الدمونه الأربع الصبح، أرجوك تقول أي وقت، بس ماتخليهوش

يزيد عن تلات تيام، بالأمانه هو ندمان، ومع كده لولا الحرب اللى عاوزه إن الأحسن لازم ينضرب بيه المثل، فجريمته لو حكمنا عليها بالعقل يبقى ماتحصلش حتى غلطة تستاهل التأنيب فى السر. حايرجع امتى؟ قول لى ياعطيل، أنا مش قادره اتصور إيه اللى ممكن تطلبه منى وأرفضه أو أفضل متردده فيه كده. جرى إيه، كاسيو اللى كان بييجى معاك فى زياراتك ليه واللى كان دايما يدافع عنك لو قلت كلمة وحشة فى حقك، الواحد محتاج للمجهود دا كله علشان يرجع، صدقنى، أنا راح....

عطيل : أرجوك، كفايه كده، خليه بيجى وقت مايعوز، أنا مش حارفضاك حاجه.

دسدمونه: یاسلام، دی مش حسنه، ده زی ما اکون باترجاك تلبس الجوانتی أو تاكل وجبات مغذیه أو تدفی نفسك، أو بالح علیك علشان تعمل حاجه لمصلحتك، أنا لو كان عندی مطلب یلمس حبك صحیح، لكان مطلب عظیم،صعب، ماحدش یقدر یمنحه من غیر خوف.

عطسيل: أنا مش رافض لك شيء، دلوقت أرجوكي تمنحيني فرصة قصيره أختلي فيها مع نفسي.

دسدمونه : أناأرفض لك طلب؟!! مش ممكن، مع السلامه يامولاي.

عطيل : مع السلامه يا عزيزتي دسدمونه، أنا راح أحصلك حالا.

دسدمونه: إميليا، تعالى، (لعطيل): خليك زى مارغباتك تعوز، أيا كنت، أنا لك مطيعة. تخرج دسدمونه وإميليا عطيل : قمر واكتمل! روحى خلاصها في حبك انت، لو انتهى رجع العدم.

ياجــر: يا صاحب النبل.

عطيل : بتقول ايه يا ياجو؟

ياجـــو: هوه ميشيل كاسيوكان عنده علم بحبك أيام ما كنت بتتقرب م الست؟

عطيل : كان، م البداية للنهايه، ليه السؤال ده؟.

ياجـــو: لا، بس بتأكد من فكرة مرت بذهني، مش أكتر من كده.

عطيل : فكرة إيه يا ياجو؟

ياجـــو: كنت فاكر إنه ما كانش يعرفها؟

عطيل : لأكان، وكان بيروح وبيجي بينا كتير.

ياجــر: صحيح؟.

عطيل : صحيح، أيوه صحيح، إنت شايف فيها حاجة؟ هو مش راجل أمين؟.

ياجمر: أمين يامولاي؟.

عطييل: أمين؟! أيوه أمين.

ياجـــو: مولاى، على قد علمى ...

عطيل : إنت فاكرك إيه؟.

ياجـــو: فكرى يامولاى ١.

عطيل : فكرى، يامولاى ؟! وحق السما دا عامل لى صدى كما لو كان فيه مسخ في قرارة فكره أوحش من إنه يوريه، إنت قصدك

حاجه، أنا سمعتك بتقول اسه من شويه، وكاسيو بيسيب مراتى، إن دا مايعجبكش، إيه اللى مش عاجبك؟ ولما قلت لك إنه كان على علم طول مدة الود، صرخت: «صحيح، ؟ وقمصت لى حواجبك وزمتهم على بعض كما لو كانت فكرة مخيفة ضربت ساعتها في مخك، إذا كنت بتحبنى، وضح لى فكرك.

ياجـــو: يامولاي، إنت عارف إن أنا باحبك.

عطیل: أفتكر كده، ونظرا لأنی أعرف إنك ملیان حب وأمانه وبتوزن كلامك قبل ما تمده بنفسك، عشان كده الحركات السكیتی بتاعتك دی بتخوفنی، لأن الحاجات دی من خادم كداب، ماعندوش أمانه، تبقی خدع عادیة، لكن عند راجل نزیه تبقی إتهامات فاتت م القلب قبل ما یضبطها.

ياجـــو: بالنسبة لميشيل كاسيو، أنا مستعد أحلف إنه راجل أمين.

عطييل: أنا كمان باتصور كده.

یاجـــو : الناس لازم تکون زی ما بنیان، واللی غیر کده یاریت مایبان له أثر.

عطييل : قطعا الناس لازم تكون زي ماتيان.

ياجــو: إذن أعتقد إن كاسيو راجل أمين.

عطيل : لأ، الكلام هنا وراه كتير، أرجوك تقول لى الأفكار اللى انت بتجترها، وأسوأ الأفكار اديها أسوأ الألفاظ.

ياجـــو: عفوا يامولاى، أنا وإن كنت مازم بكل شيء منصوص عليه في الواجب، مش مازم بالشيء اللي حتى العبيد معفيه منه،

أصرح بأفكارى؟ ليه؟ إفرض إنها دنيئة وكدابة، ثم فين القصر اللى عمره ما دخلته دسيسة؟ وفين القلب الصافى اللى النوايا العكرة عمرها ما تتربع فى مجلسه، وتقعد يوم الحكم جنبها جنب الفكر المشروع؟

عطيل : إنت تيقى متآمر ضد صديقك يا ياجو، لو افتكرت إن غلط حصل في حقه وخليت بعد كده ودنه في وادى وأفكارك في وادى .

یاج و : أتوسل إلیك، ماتنساش إن أنا ممکن أکون آثم فی ظنی، أنا طبعی أنا باعترف لك فیه داء الشمشمة ع الشر فی کل مکان، وغیرتی یاما تتوهم أخطاء مالهاش کیان، عشان کده أتوسل لیك إنك ماتنتبهش بحکمتك لشخص شطاح فی ظنه، وتسبب لنفسك قلق مالوش أساس غیر ملاحظاته المبعترة اللی مالهاش ضمان، دا شیء مایناسبش راحتك وسعادتك، وکمان مایناسبش رجولتی وأمانتی وعقلی، إنی أعرفك بفكری.

عطييل: دا معناه ايه؟!.

ياجـــو: السمعة الطيبة، عند الراجل والمره، يامولاى العزيز، هيه أغلى جوهرة لروحه وروحها، اللي يسرق منى كيسى بيسرق منى معدن نفاية رخيص؟ شيء، لاشيء، كان بتاعى، بقى بتاعه، وياما خدم قبل كده آلاف، لكن اللي ينشل سمعتى الطيبة بيفقرنى من غير ما ياخد شيء بعينه.

عطيد : وحق السما أنا لازم أعرف إيه اللي في مخك.

یاجـــو: مش حانقدر دالوقت حتی لو قلبی کان فی ایدك، ولا بعدین طول ما هو فی حراستی.

عطيل: ها؟!.

باجــو: خد حذرك م الغيرة بامولاى، خد حذرك، الغيرة هى المسخ أبو العنين الخضرة اللي كل ما اتغذى استهزأ بالشيء اللي غذاه، يابخت أبو قرون اللي عرف نصيبه لكن مابيحبش اللي خايناه، وياويل المتيم لكن بيشك ، بيشك لكن بيحب.

عطميل: يادى البؤس!.

ياجـــو: الفقير القنوع غنى، وغنى كفاية، لكن الغنى اللى مالوش أول ولا آخر ينقلب فقر أشد من فقر فصل الشتاء عند اللى دايما خايف م الفقر، يارب يارحيم، إحفظ أهل عشيرتى(١) جميعا من نار الغيرة.

عطليل: إيه الحكاية، ليه الكلام ده، إنت شايفنى مستعد أعيش فى غيرة مستمرة، كل ما القمر يتغير شكله أطلع له بشك جديد، لأ، الشك إذا دخل مرة، إنعقد العزم مرة، اليوم اللى تلاقينى فيه معلق مصير روحى على تخمينات منفوخة، مضخمة زى اللى تتفهم من كلامك، إبقى بعنى واشترى بيه كبش، أنا ماغيرش لوحد قال لى إن مراتى جميله، تاكل كويس وتحب العشرة، تتكلم بحريتها وتغنى وتلعب

The state of the s

⁽۱) ورد في كتاب قراء شكسبير عن الحكم في البندقية إن المدينة كأنت منقسمة ست قبائل، انظر طبعة آردن ص ٥ - ٦ .

وترقص حلو، مطرح ما تكون الفضيلة، فكل دى فضائل، ولا أنا حاستخرج من قلة مزايايا أقل خوف أو شك من خيانتها، عشان يوم ما اختارتنى كان عندها عنين، لا يا ياجو، أنا قبل ما أشك لازم أشوف، وإذا الشك جه، طلبت البرهان، فإذا ثبت البرهان، فمافيش زياده عن كده، ولا أقل من كده، الوداع في الحال، للحب أو للغيرة!.

ياج ... و أنا سعيد اللى باسمع الكلام ده ، عشان دلوقتى أقدر أعبر لك عن حبى ووفائى بشكل أصرح . ما دام الكلام وجب على ، فاسمعه منى ، أنا لسة ما بتكلمش عن البرهان ، خد بالك من مراتك ، بص لها كويس مع كاسيو ، خلى عينك لا تغير ولا تغفل أنا ما أحبش طيبتك تخدع طبيعتك السخية ، النبيلة ، بص لها : أنا عارف طبيعة بلدى كويس ، نسوان البندقية السما بتشوف منهم ألاعيب مايستجروش يوروها لاجوازهم ، وضميرهم مهماعلى يحطوه فى التخفى مش فى الامتناع .

عطسيل: دا رأيك؟

ياجـــو: هيه خدعت أبوها لما التجوزتك، وتعبيراتك حبيتها أكبر حب ساعة ما بان عليها الخوف منها وارتعشت.

عطسيل: دا صحيح.

ياجــر: طيب اطلع بقى بالنتيجة، هى اللى وهى لسة صغيرة كده، عرفت تتشبه بمظهر تربس عنين أبوها كما لو كان بخشب سنديان دا افتكر الموضوع سحر، لكن أنا غلطان جدا، أرجوك بتواضع إنك تصفح عنى لزيادة حبى،

عطيد : أنا مدين لك إلى الأبد.

ياجــو: أنا شايف إن الكلام ده سبب لك شيء من الانقباض.

عطيل: لا، أبدا، ولا خردله.

ياجو: بذمتى، أنا خايف لايكون.. أملى إنك تعتبر الكلام اللى قلته صدر عن محبتى، لكن أنا شايف إنك متأثر، أرجوك رجاء حار إنك ماتحماش كلامى معانى أضخم، تبعد عن مجرد الشك.

عطيل: لأ، مش حاأعمل كده.

ياجـــو: لو عملت يامولاى، يكون كلامى نجح نجاح واطى ماهواش أبدا اللى أقصده. كاسيو صديق عزيز على .. مولاي، أنا شايفك متأثر.

عطيل : لا،مش كتير، أنا لايمكن أعتقد إلا إن دسدمونه أمينة.

ياجـــو: يارب تعيش هيه كده، وتعيش انت عشان تعتقد ده ١.

عطيل : ومع كده ، لما الطبيعة تتوه عن مسارها ...

ياجــو: آه، آدى النقطة: زى مثلا عشان أكون صريح معاك لما الاختيار ما يقعش على اللى ياما طلبوا إيدها، من بلدها ولمونها ومركزها، حسب ما بنشوف الطبيعة إزاى فى كل شيء بنـميل، بوف، الواحـد ممكن يشم فى كـده إرادة مريضة للآخر، فساد منحط، أفكار غير طبيعية، لكن سامحنى، أنا قطعا مابتكلمش عنها بالتحديد، وإن كنت خايف إن إرادتها، يوم ما ترجع لصوابها، تقعد تقارن بينك وبين أشكال بلدياتها، وربما تندم.

عطـــيل : مع السلامة، مع السلامه، إذا شفت شيء تاني، عرفني، وقول لمراتك تاخد بالها، سيبني دلوقت، يا ياجو.

ياجىسىو: (وهوه ماشى) مولاى، أستندن أنا.

عطـــيل : أنا اتجوزت ليه؟ الواد الأمين ده قطعا شايف وعارف أكتر م اللي بيقوله، أكتر بكتير.

یاجـــو: (وهوه راجع) مولای، أنا بودی أترجی من جنابك إنك ما تتحراش الموضوع ده أكتر من كده؛ سیبه للزمن، ولو إنه شیء صح إن كاسیو یرجع مكانه لأنه أكید بیملاه بجدارة عظیمة، لكن لو سیادتك حبیت تركنه شویة، راح تعرف بعد كده إیه هوه وایه أسالیبه، فلو الست ألحت فی وساطتها الحاح جامد أو عنیف، دا راح یكشف حاجات كتیر، وفی المهلة دی، إعتبر إن أنا بابالغ فی تخوفاتی وعندی سبب وجیه للخوف من كده وأعتبرها هیه بریئة، أتوسل إلیك.

عطيل : ماتخافش من حكمى على الأشياء.

ياجـــو: أستئذن من جنابك مرة تانية.

بخسرج

عطيل : الجدع ده أمين إلى أبعد الحدود وأزيد، ويعرف كل ألوان المعاملات بين الناس بدراية واسعة، آه لو ثبت لى إنها صقر صياد! ساعتها الخيوط اللى ماسكاها(۱) ، وإن كانت هيه أوتار قلبى، راح أقطعها وأسيبها للريح تصيد على هواها. ممكن لإنى أسود وماعنديش الكلام الناعم بتاع

⁽١) الصقر اللي بيتدرب على الصيد، يفمنل الصياد ماسكه بخيط.

رواد المخادع، أو لإنى نزلت ع الناحية التانية من جبل السنين وإن كان ده مش لحد كبير ممكن تكون خدعتنى وماعادش ليه ملاذ غير إنى أكرهها. آدى لعنة الجواز، يخلينا نقول إن المخلوقات الرقيقة دى مثكنا، من غير ما نملك شهياتها! دا أحسن أكون ضفدع عايش فى بخار زنزانة ولا أسيبش ركن فى الشىء اللى باحبه لاستعمال الغير، لكن دى بلوة الأكابر، إمتيازاتهم أقل م اللى بيتمتع بيها الدون، قضا ومفيش منه مفر، زيه زى الموت: حتى البلوة أم قرون دى مكتوبة علينا من ساعة مانتولد، آدى دسدمونه جايه.

تدخل دسدمونه وإميليا

إذا كان ماعندهاش إخلاص، تبقى الطبيعة بتضحك على نفسها، أنا مش ممكن أصدق.

دسدمونه نا إيه اللي جرى ياعزيزي عطيل؟ العشا والضيوف اللي عزمتهم من كرام أهل قبرص، كلهم في انتظارك.

عطيل : معلهش الحق على.

دسدمونه: ليه بتتكلم بصرت ضعيف كده؟ إنت حاسس بحاجة؟.

عطـــيل: عندى رجع في جبهتي، هنا(١) .

دسدمونه : طبعا، دا من السهر، حايروح بسرعة، خليني بس أربطها لك جامد، وفي ساعة واحدة مش حايكون فيه وجع.

⁽١) إشارة إلى القرون.

عطييل: منديلك صغير قوى.

يقع المنديل من إيدها

سيبيه في حاله، تعالى، أنا جاى معاكى جره.

دسدمونه: أنا آسفة جدا لأنك مش حاسس كويس.

تخرج مع عطيل

إميليا: أنا حظى كويس اللى لقيت المنديل دا، كان أول تذكار من المغربى، ياما جوزى بعنده لح على فوق الميت مرة عشان أسرقه، لكن هيه قد كده حبته كرمز دا كان بيناشدها إنها تحتفظ بيه للأبد لدرجة إنها كانت بتاخده معاها مطرح متروح عشان تكلمه وتبوس فيه، أنا حاعمل منه نسخة وأديه لجوزى، راح يعمل بيه إيه، ربنا وحده اللى يعلم، مش أنا. أنا كل اللى أعرفه هوه إنى أبسط نزواته.

يدخسل باجس

ياجــو: إزاى كده ؟ إنت بتعملي إيه هنا لوحدك.

إميليا: ماتتريقش، أنا عندى حاجة علشانك.

ياجـــو: حاجة علشاني مخصوص ؟! دي حاجة شايعة.

إميليسا: إيه؟!.

ياجـــو: إن الواحد يكون عنده مره هبلة.

إميليا: طب خلصت كلم ؟ راح تديني إيه بقى دلوقت عشان المنديل إياه ؟ .

ياجــو: منديل إيه؟.

إميليا : منديل إية؟ ياسلام، اللي المغربي إداه أول هدية لدسدمونه، اللي الرجتني كذا مرة علشان أسرقه.

ياجـــو: سرفتيه منها؟.

إميايا: لأ، وقع منها عفوا، ولحسن الحظ كنت هناك ولقطته، بص أهو.

ياجـــو: شاطره بابت، هاتيه.

إميليا: حاتعمل بيه إيه، ده انت كنت حريص قوى على إنى أسرقه؟.

ياجــو: (ينتشه) ، وانت إيه دخلك؟

إميليا: لو ماكنش لغرض مهم إدى هولى تانى، الست مسكينه، راح تتجنن لو عرفت إنه ضاع.

تخرج إميليا

المنديل ده، حانساه في بيت كاسيو وأخليه يلاقيه، التوافه اللي أخف م الهوا تاخد عند الغيران شكل الإثباتات القوية كأنها براهين طالعة من الكتاب المقدس، ده جايز يعمل حاجة، المغربي إبتدا فعلا يتغير بعد ما شرب سمى، الأفكار الخطر طبيعتها سم، في الأول نادر ماطعمها ينفر، لكن بعد شوية من مفعولها في الدم، نارها تشعلل زي مناجم الكبريت، أنا قلت كده، (يدخل عطيل) بص، آهو جاي، لا الأفيون ولا اللفاح ولا المشروبات المنومة اللي في الدنيا

كلها، راح تعرف أبدا ترجع لك النوم اللي عرفته إمبارح.

عطييل: ها! ها! بتخرني؟

ياجـــو: إيه اللي حصل ياسيادة القائد؟ ما بلاش من كده.

عطيل : ابعدو، إمشى، انت حطتنى على آلة التعذيب، أحلف إنه أحسن أحسن الواحد يتغش كتير ولا يعرفش القليل.

باجــو: إزاى بس يامولاى؟

عطيل: ساعات اللذة اللي اختلستها كان إيه إحساسي بيها؟ لاكنت باشوفها ولا بافكر فيها، ولا كانت تأذيني، الليلة اللي وراها كنت أنام كويس، أتغدى كويس، كنت مرح وطليق، ماكنتش ألاقي قبلات كاسيو على شفايفها، اللي اتسرق ومش حاسس باللي اتاخد منه، خليه على عماه، يبقى أبدا ما اتسرقش.

ياجـــو: أنا آسف اللي باسمع ده .

عطيل: أنا كنت أفضل سعيد لو المعسكر بحاله، من حفارين الخفادق وطالع، كلهم بس من غير علمى داقوا حلاوة جسمها، أما دلوقت، فإلى الأبد الوداع لراحة البال، الوداع للإطمنان، الوداع لاستعراض الفرسان، للحروب الكبيرة اللى تخلى م الطموح فضيلة، آه، الوداع لصهيل الجياد ولوهج الأبواق، للطبول اللى تهز الروح، والصفافير اللى ترج السمع، للأعلام الملوكية ولكل وصف وحال، للفخر، للفخامة، لطقوس الحرب المجيدة، وانت يا آلات الموت اللى حناجرها الخشنة تحاكى رعد جوبيتر المربع، الحوداع! عطيل

رسالته انتهت.

ياجـــو: دا ممكن ده يامولای؟!.

عطيل : انت ياوغد، تأكد إنك تجيب لى الداليل إن مراتى بغى، تأكد: ادينى برهان عيان برهان أشوفه بعينى .

بمسكه جامد

وإلا فقسما بخلاص روحى المؤبدة، كان أحسن لك تتولد كلب من مواجهة غضبي بعد ما صحى.

ياجمو: الموضوع وصل لكده؟

عطيل : ورينى الدليل، أو على الأقل برهان قاطع مافيهوش عقدة أو مفصلة يتعلق عليها الشك وإلا حسرة على حياتك.

ياجـــو: مولاى النبيل.

عطيل : لو حاتفترى عليها وتعذبنى، فوقف الصلى من دلوقتى، أترك كل ندم، كوّم الأهوال بعضها على بعض، إعمل عمايل تخلى السما تمطر دموع والأرض في اندهاش، مافيش شيء أزيد من اللي عملته ممكن يوديك جهنم.

یاج نارحمه ربنا، نصرك یا سما! هل انت إنسان انت؟ هل عندك روح أو حس؟ ربنا یعینك، شیلنی من شغلتی، آه یامغفل، یاللی عشت عمرك عشان أمانتك تتحول رزیلة، أد كده الدنیا فظیعة، إكتبوا یاعالم، إكتبوا إن الصراحة والأمانة خطر، أشكرك علی الدرس، من هنا وطالع أنا راجع عن كل حب لأی صدیق، ما دام الحب مابیجی منه إلا الاذی.

عطيل : لأ، استنى، إنت المفروض تكون أمين.

یاجـــو: مغروض أكون عاقل، علشان الأمانة عبط وبتخسر مرامها. عطــیل: وحق الدنیا الفانیة، أنا شایف مراتی أمینة وشایف لأ، شایفك نزیه وشایفك لأ، لابد من دلیل، إسمها اللی كان رایق زی وجه دیانا(۱) أصبح دلوقت ملغوص واسود زی وشی، لو كان لسة فیه حبال جایة فی السكة أو سكاكین، سم أو نار أو سیل خناق، مش راح أقدر استحمل ده. آه لو بالی ارتاح!.

ياجـــو: أنا شايف يامولاى، إن الحب أكلك ونادم اللي صارحتك، تحب تقتنع ؟.

عطييل: إلا أحب؟! طبعا، ولازم حااقتنع.

باجـــو: ممكن.. بس إزاى؟ زاى سيادتك تقتنع؟ تحب وبقك مفتوح زى الصنم، تتفرج عليها وهي بتتنط؟

عطيل : الموت واللعنة الأبدية! آه!.

ياجـــو: أفتكر دى مسألة صعبة إن احنا نجيبهم للمنظر ده. دول يبقوا ملعونين لو عين غير عينهم شافتهم على مرتبة واحدة، ما العمل إذا؟ كيف إذا؟ أقول إيه؟ فين القناعة؟ مستحيل إنك تشوف ده ولو كانوا هايجين زى المعين، سوخنين زى الحمير، داعرين زى الدياب وهيه فى الشبق، مجانين انعبطوا زى جاهل وسكر، ولكن، حسب رأيى، إذا كان الاستدلال والقرائن القوية، اللى توصل طوالى لباب الحقيقة، راح تقنعك، فدا ممكن.

عطييل: إديني برهان حي على إنها خاينة للعهد.

⁽١) ربة العفة والقمر.

یاج ... و : دی مهمة ماتفرحش، لکن مادمت دخلت فی القضیة للدرجه دی، انحشرت فیها بعبط إسمه الأمانة والمحبة، یبقی لازم أكمل، أنا دیك النهار كنت نایم مع كاسیو، وكان عندی وجع سنان، فماعرفتش أنام، فیه نوع من الناس روحهم تحب تفضفض لدرجة إنهم حتی فی منامهم یقعدوا یهلوسوا بأشغالهكم، كاسیو واحد من النوع ده، سمعته بیقول وهو نایم، دسدمونه یاحلوه، خلینا ناخد حذرنا، خلینا نخبی حبنا، ثم بعد كده یامولای، قعد یمسك فی إیدی ویعصرها ویرخ، یا أجمل الخلق، ثم ینزل فیه بوس كما لو كان بینتش من خدودها بوسات نبتت علی شفایفی، ویحط رجله علی فخذی ویتأوه ویبوس ویصرخ ملعوب القضی اللی كتبك للمغربی.

عطيل : شيء فظيع، فظيع.

ياجــو: بس دا كان حلم.

عطــيل: لكن بيشير لنتيجة سبقته.

ياجـــو : دا شك في محله وإن كانت الواقعة مجرد حلم، وده ممكن يدى دسم لبراهين تانية دلالتها في حد ذاتها رفيعه.

عطييل: أنا راح أقطعها حتت.

ياجـــو: أيوه، بس خليك عاقل، إحنا لغاية دلوقت ماشفناهاش عملت حاجة، ممكن لسة تكون مخلصة، قول لى، إنت ماشفتش أحيانا منديل مطرز بالفراولة في إيد مراتك؟

عطيل : أنا اديت لها منديل بالرصف ده . دى كانت أول هدية منى

لها.

یاجـــو: دی حاجة أنا ماعرفهاش، لكن مندیل زی ده أنا متأكد إنه بتاع مراتك أنا شفته النهاردة فی إید كاسیو بیمسح بیه دقنه.

عطييل: إذا كان المنديل ده ...

ياجـــو: المنديل ده أو أى حاجة من متعلقاتها، يبقى ده دليل يضاف للأدلة التانية.

عطيل: آه باريت العبد كان عنده أربعين ألف روح، روح واحدة تعمل إيه علشان تروى انتقامى، دلوقت أنا شايف إن ده صحيح، بص باياجو، حبى المجنون كله، أنا بارميه كده في الهوا: راح؛ الانتقام الأسود بيهب من قاع الجحيم، تاجك وعرشك اللي كانوا في قلبي، سيبهم ياحب للكره وجبروته! ياصدري انتفخ بحملي، دا انت شايل لسنة تعابين.

ياجــو: بس خليك هادى.

عطييل: الدم، الدم، الدم،

يركع عطيل

ياجمو: بقولك أصبر، عايز تغير رأيك.

عطيل : أبدا يا ياجو، زى البحر الأسود بنياره البارد زى الثلج، وجريانه اللى مالهش دفع، ومده اللى مالهوش جذر، لكن دايما يستمر، لحد ما يرتمى فى بحر مرمرة، كذلك أنا،

أفكارى المتلطخة بالدم، بخطوة عنيفة عمرها ما حاتبص لـورا، ولاحاتركن لسكون الحب لغاية ما انتقام رحب، فسيح يبتلعها كلها، قسما بالسما المرمرية المنثورة فوق رؤوسنا، أنا ربطت كلمتى هنا بالإجلال الواجب لكل عهد مقدس.

ياجــو: خليك راكع (ياجو يركع) اشهدى يا أنوار ماتنطفى أبدا، يا كواكب محوطنا طوقها، إشهدى إن ياجو بيتنازل هنا عن ذكاؤه، عن إيديه، عن قلبه، إلا إذا اشتغلوا فى خدمة عطيل المضام، إذا أمر وجبت عليه الطاعة، أيا كان الدم المسفوك. عطيل: أنا أحيى محبتك، مش بكلمات للشكر تروح مع الهوا وإنما بقبول من القلب، وأكلفك فى الحال، عاوز أسمع منك فى

ظرف تلات تيام إن كاسيو إنشطب من عالم الأحياء. ياجه و صديقي ميت، مات بناء على طلبك، لكن سيبها هي تعيش. عطيل : اللعنة على الداعرة الوقحة، اللعنة، اللعنة، تعالى، امشى معايا؛ أنا راح أشوف طريقة تموت بيها في الحال الشيطانة الحسناء، إنت قائدي التاني من الآن.

ياجسو: أنا محسوبك إلى الأبد يامولاي

يخرجوا

(المشهد الرابع)

[شارع]

تدخل دسدمونه وإميليا والمهرج

دسدمونه : ممكن تقول لنا ياصحبي فين نقدر نلاقي القائد التاني كاسيو؟

المهرج: تلاقيه في أي حته ماتلاقيش فيها القائد(١).

دسدمونه: إزاى بقه ا.

المهرج: لأن القائد التاني بينوب عن القائد، فإذا القائد اتوجد ماينوبش.

دسدمونه: طب إيه عنوانه؟.

المهرج: عنوانه؟ أنا عمري مابعت له جواب.

دسدمونه : مش ممكن تستعلم م الناس وتجيب لنا الرد؟.

المهرج: أنا حاحط الناس كلها على كرسى الاعتراف، يعنى حاحط لمهرج الأسئلة اللي هي نفسها الجواب.

دسدمونه : دور علیه، قول له بیجی هنا وفهمه إنی باتوسط له وأرجو إن كل شيء يتم على خير.

المهسرج : دى مهمة تدخل فى نطاق إمكانيات البشر، إذن راح أحاول أقوم بيها. يغسرج

⁽۱) النص بيلعب هنا على كلمة لها معيين: موجود، وبيكدب، أنسب طريقة لنقل سفسطة المهرج، لقيتها في ترجمة من الترجمات الفرنساوي، طبعة ، بل لتر، أصل وترجمة، ١٩٦٩.

دسدمونه: أكون ضيعت المنديل فين يا إميليا؟

إميليا: أنا معرفش ياستى.

دسدمونه: صدقینی أنا كنت أفضل أضیع كیس ملیان ذهب، ولولا إن مولای المغربی معدنه صریح، خالی من وضاعة المخالیق اللی بتغیرلكان ده كافی إنه یفكر فی حاجه وحشه.

إميليا: هوه مابيغرش؟!.

دسدمونه : مين، هوه ؟ أفتكر إن الشمس اللي إتولد تحتها إمتصت منه كل الأمزجة اللي من النوع ده.

إميليسا: بصى آهو جاى.

يدخسل عطيل

دسدمونه: أنا دلوقت مش راح أسيبه إلا لما ينده على كاسيو. إزاى الحال يامولاى؟

عطييل: كويس يا أميره. (على جنب) قد إيه النظاهر صعب!. وانت يادسدمونه.

دسدمونه: وكويسه باعزيزي.

عطييل: إديني إيدك، الايد دي رطبة، يا أميرتي!.

دسدمونه: لا العمر إمتحنها ولا عرفت الأسى.

عطيل: دا دليل على بطن ولاده، على قلب يدى عمال على بطال، سخنة، سخنة ومنديه، إيدك دى تستازم حَجْره على الحريه، صوم وصلاه، تأديب شديد وتمارين ورعة، عشان فيه هذا إبليس صغير بينض عرق من النوع اللى بيتمرد

كتير، إيد كريسه، إيد مبسوطه.

دسدمونه: صحيح، ممكن تقول كده لأن دى الإيد اللي اديت لك قلبي.

عطيد الإيدين، أما بعرف زمان كانت تدى الإيدين، أما بعرف زماننا فالايدين تنعطى، مش القلوب.

دسدمونه : دا موضوع ما أقدرش أدى فيه رأى، كلمنى دلوقت عن وعدك.

عطيل : وعد إيه يا كتكوته ؟

دسدمونه: أنا ندهت على كاسيو، بيجى يكلمك.

عطييل: أنا عندى برد وزكام تعبيني، إديني منديلك.

دسدمونه: اتفضل يامولاي.

عطييل: المنديل اللي إديتهولك.

دسدمونه: مش معايا.

عطيل: مش معاك؟!.

دسدمونه: لأحقيقي، يامولاي.

عطسيل: دى غلطة، المنديل ده واحده مصرية إديته لأمى، كانت شاطره فى السحر وتعرف تقرا أفكار الناس، قالت لها إنها طول ما حاتحافظ عليه راح تفضل محبوبة وتخلى أبويا أسير حبها، أما لو ضيعته فراح تنقلب مكروهة فى عين أبويا، وفكره راح يشط ورا غراميات جديدة، فلما وافاها الأجل إديت هولى، وطلبت منى إذا القدر وقعنى على واحده أتجوزها إنى أديه لها. ودا اللى أنا عملته، حافظى

عليه، خليه عزيز عليكي زي حبة عنيكي، لو ضاع أو اديتيه للغير حاتكون دي خسارة مالهاش تعويض.

دسدمونه: ممكن ده ؟١.

عطيل: صحيح، دا نسيجه فيه سحر، عرافة عمرت على الأرض ميتين لفة للشمس هي اللي طرزته في جذبة من جذباتها النبوية، الدود اللي غزل حريره كان متقدس، إنصبغ في تحنيطه(۱) حضرها أهل العلم من قلوب البنات البكر.

دسدمونه: والله، دا صحيح؟.

عطييل : مافيش أصدق من كده، فخدى بالك منه.

دسدمونه: ياريت كانت مشيئة ربنا إنى ما أشوفوش أبدا.

عطيل : هه!! عشان إيه؟

دسدمونه: بتتكلم ليه بالاندفاع والحدة دى؟.

عطييل: ضاع؟ إختفى؟ إنكلمي هوه راح؟.

دسدمونه: إرحمنا يارب.

عطسيل: ماتنطقى!.

دسدمونه: ماضاعش، لكن يجرى إيه لو ضاع؟

عطسيل: إيه.

دسدمونه: باقول ماضاعش.

عطيل : دوري عليه ، وريهولي .

 تصرفني عن سؤالي، أرجوك ترجع كاسيو تاني.

عطيل : دوري لي على المنديل، قلبي بيتوجس.

دسدمونه: سيبك من الكلام ده، إنت عمرك ماحتلاقي واحد كفء زيه.

عطيل: المنديل!.

دسدمونه: أرجوك تكلمني عن كاسيو.

عطيل: المنديل!.

دسدمونه: راجل ربط دايما حظه بمحبته لك، شاركك الأخطار...

عطييل: المنديل!.

دسدمونه: الحق انت اللي تتلام.

عطيل: إبعدي.

بخرج

إميليا: بقى الراجل ده مش غيران؟.

دسدمونه: أنا عمرى ما شفت اللى بيعمله ده قبل كده، أكيد المنديل ده فيه شيء عجب، أنا تعيسه جدا اللي ضيعته.

إميليا : الرجاله ماتبانش في سنه ولا سنتين، كلهم مايخرجش الواحد منهم عن إنه معده، واحنا كلنا الأكل: ياكلونا بشراهه، ولما يمتلو، ايرجعونا.

يدخل ياجو وكاسيو

شوفي، آدي کاسيو ومعاه جوزي.

ياجــو: مافيش طريقة تانيه، هي لازم تتدخل، شوف البخت، آهي

هنا، روح كلمها.

دسدمونه: إزيك يا ياجو، إيه أخبارك؟.

كاسيو: يا افندم أنا لسه على طلبى الأولاني، أرجوك رجاء حار إنى أقدر بفضل مساعيك الحميده من استئناف وجودى ونوال حب القائد اللى بابجله بكل الطاعة اللى فى قلبى، وبودى لو ما انتظرش أكتر من كده، فلو كانت غلطتى م النوع اللى مافيش عنه تكفير، فلا خدمتى فى الماضى ولا أسفى فى الحاضر ولا عزمى بالنسبة للمستقبل كافيين كفدية تجلب محبته من جديد، فيبقى العلم بكده على الأقل هو النتيجة اللى لازم أقتنع بها، بحيث ساعتها ألبس رغما عنى توب الرضى وأركز نفسى على شغلة تانيه حسب ما يجود به الحظ لى.

دسدمونه: أسفه يا كاسيو، يا مثال الطيبة، واسطتى دلوقت مش وقتها، مولاى ماعادش هوه مولاى (۱) ، ولا كنت حا أقدر اعرفه لو مظهره إتغير زى ما اتغير مزاجه، ياريت كل نفس متقدسه تساندنى زى ما ساندتك بأحسن كلام، ووقفت على مرمى غضبه لكلامى الصريح معاه، لازم تصبر شويه، اللى أقدر عليه عليه قطعا راح أعمله، وراح أعمل أكتر من اللى أقدر عليه لنفسى، أكتفى بده.

ياجسو: هره مولاي غضبان؟.

غريب.

یاجـــو: هو ممکن یغضب؟ ده أنا شفته لما المدفع طیر فی الهوا عساکره ونتش زی الشیطان أخوه وهوفی دراعه وبتقولوا غضبان؟ یبقی لازم فیه شیء خطیر، أنا رایح أقابله مادام غضبان تبقی فیه حاجه مهمة أکید.

دسدمونه : أرجوك تروح له ؟ يخــرج باجــو

قطعا حاجه من شدون الدولة، يارسالة من البندقية، يامؤامرة انكشفت له هنا في قبرص عكرت مجرى فكره الواضح، وفي الحالات دى تلاقى طباع الرجاله تتعارك على الصغيرة بينما كان همهم الكبيرة، ودا شيء طبيعى، لما صباعنا يوجعنا تلاقيه أثر على الأعضاء التانيه السليمة لدرجة الإحساس بالألم، أيوه، إحنا لازم نفتكر إن الرجالة ماهماش آلهة، مش لازم ننتظر منهم على طول العناية اللي بتبقى في محلها يوم الجواز، أنبيني يا إميليا، أنا زيى زى العسكرى اللي مش فاهم حاجة، قعدت أتهمه في سرى بالقسوة، لكن أنا شايفة دلوقت إنى رشيت الشاهد وإن التهمة كانت كدب.

إميليا : إدعى إن الموضوع يكون شئون الدولة، زى ما بتفتكرى، ومش مجرد تصور أو هبة غيره عليكي.

دسدمونه : ينقطع اليوم ده ، أنا عمرى ما اديته سبب لكده .

إميليا: بس دا مش رد ع الناس اللي بتغير، عمرهم ما بيغيروا عشان سبب، وإنما بيغيروا لأنهم غيرانين، الغيرة مسخ بيولد نفسه

وبيتولد من نفسه.

دسدمونه: يارب إبعد المسخ ده عن عطيل.

إميليا: آمين، ياستى.

دسدمونه : أنا حاروح أدور عليه، كاسيو خليك هنا، لو حالاقيه رايق راح أحرك قضيتك وأحاول أكسبها بكل قوتي.

كاسبيو: أنا أشكر سيادتك بكل تواضع.

تخرج دسدمونه مع إميليا تدخل بيانكا

بیانکا: تسلم یا عزیزی کاسیو.

كاسميو: بتعملى إيه بره البيت؟ إزيك يا بيانكا، يا أجمل الكل، بذمتى ياروحى أنا كنت جاى لك على البيت.

بیانکا: وأنا کنت رایحة عندك یا کاسیر، ایه ده، تفضل بعید أسبوع بحاله؟ سبع تیام وسبع لیالی؟ تمن مرات فی عشرین ساعة، وعلیهم تمانیة، وساعات حبیب غایب فوق کده، یعنی تمن مرات فی عشرین أطول من ساعة المینا؟ یاطول العد، یاطوله یاطوله!

کاسیو: اعذرینی یا بیانکا، أنال کنت طول الفترة دی تحت ضغط أفکار تقیلة زی الرصاص، لکن راح أخلص لك دین الغیاب دا بحاله فی وقت أروق، بیانکا یاحلوه. (یدیها مندیل دا بحاله فی وقت أروق، بیانکا یاحلوه. (یدیها مندیل دسدمونه)، إعملی لی نسخة من ده.

بیانکـا: آه کاسیو، دا جاه منین؟ دا لازم تذکار من صاحبه جدیده، الغیاب اللی حسیته آدینی حاسه دلوقت بعلته، هی وصلت لکده؟ عال، عال. كاسبير: يامره إطلعى بقى، إرمى تخميناتك المنيلة دى فى بق الشيطان اللى رماها فى ودنك! إنت غيرانه ليكون دا من رفيقة، تذكار، طب بذمتى لأ، يابيانكا.

بيانكا: أمال بناع مين؟

كاسبير: ولا حتى دى أعرفها، أنا لقيته فى أودتى، وباحب شغله. فقبل ما حد يسأل عنه، وده محتمل جدا يحصل، أكون أخذت منه نسخة، خديه واعمليها، وسيبينى المرة دى.

بيانكا: أسيبك؟ عشان إيه؟

كاسبير: أنا هنا بانتظر القائد وافتكر إن دى لاهى توصية كويسة ولا حاجة ، إنت عايزهاه يشوفني مع واحده.

بيانكا: ليه من فضلك؟

كاسيو: مش عشان ما باحبكيش.

بيانكا: بل عشان مابتحبنيش، أرجوك نمشى معايا خطوتين في السكة وتقول إذا كنت راح تيجي بدرى الليلة.

كاسيو: مش حااقدر أمشى معاك إلا مسافة قصيرة لأنى منتظر هنا، لكن راح أشوفك الليلة.

بيانكا: كويس؛ ما أنا لازم أماشي الظروف.

خسروج



القصل الرابع (المشهد الأول) يدخل عطيل وياجو

یاجسسو: یعنی تفتکر کده؟

عطييل: إلا أفتكر كده باباجوا

ياجمو : بوسة في السر؟

عطيل: بوسة غير مشروعة.

ياجـــو: أو تبقى عربانة مع صاحبها في السرير ساعة ولا أكتر، من غير ما يفكروا في حاجة وحشة؟

عطيل : عربانة في السرير، يا ياجو، من غير ما تفكر في حاجة وحشة ؟ دا يبقى نفاق في عين الشيطان نفسه، اللي قصدهم فاصل، ومع كده بيتصرفوا بالشكل ده، دا يبقى الشيطان بيغوى فضيلتهم وهما بيغووا السما.

باجـــو: لو ماعملوش حاجة تبقى هفوة يعفى عنها(١) ، لكن لو أنا أديت مراتى منديل....

عطيل: يحصل إيه؟

ياجـــو: يحصل إنه يبقى بتاعها، ومادام بتاعها أفتكر إن لها حق تديه لواحد تاني.

⁽١) بعكس الخطيئة اللي ما تقبلش عفر.

عطيدل : لكن شرفها كمان في أمانتها، يبقى لها حق تديه؟

ياجـــو: شرفها دا شيء مايتشافش، تلاقيه كنز عند اللي ما عندهمش، لكن بالنسبة للمنديل..

عطيل : وحق السما كنت أفضل أنساه ، أنت بتقول ياه ، آهو رجع على بالى زى غراب البين على الدار المعفنة . . بتقول إن منديلى كان عنده .

ياجمو: أيره، فيها إيه؟

عطيد : فيها إنها ماتعجبش.

ياجـــو: أمال إيه اللى يجرى لوكنت قلت لك إنى شفته بيعمل حاجة غلط فى حقك، أو سمعته بيقول زى بعض الأوباش اللى بيجروا هنا وهناك واللى بعد ما ياخدوا غيتهم من مره زنقوا عليها أو حبتهم بهبل، مايستريحوش إلا لما يثرثروا..

عطييل: هوه قال أي حاجة؟

ياجــو: قال، يامولاى، بس تأكد إن كل اللي قاله راح ينكره.

عطيل : قال إيه؟

ياجـــر: قال إنه عمل.. أنا عارف عمل إيه!!

عطيل: إيه؟ إيه؟

ياجــو: قبح(١) .

عطيل: عليها؟

ياجـــر: عليها، معاها، زي ما انت عايز.

⁽۱) هذا برضه الترجمة احتاجت لتصرف، في الأصل فعل له معنى و رقد و ومعنى وكدب،

عطيل: عليها، معاها؟ الناس تقول قبع عليها لما يكون اتكام بالباطل، قبع معاها! ودم المسيح، دا شيء بشع، المنديل! الاعترافات! المنديل! ده يعترف ويتشنق ع اللي عمله! أولا يتشنق، وبعدين يعترف! أنا بأرتعش، مش معقول الطبيعة تتلف في ضلمة الألم للدرجة دي من غير ما يكون فيه أساس، دي مش مجرد ألفاظ اللي بترجني الرج ده كله، تش! أنوف، ودان وشفايف؟ دا ممكن؟ اعتراف؟ منديل؟ (يا) إبليس!

تيجى له نويه

یاج ـــو: الدوا بتاعی شغال، اشتغل، اشتغل، أهو کده ینصادوا الهبل اللی یصدقوا، وکده کمان یاما ست مصونة، عفیفة، من غیر ذنب، صابها العار، إیه، إیه، یامولای، اسمعنی یامولای، عطیل!

يدخل كاسيو

شفت اللي جرى يا كاسيو؟

كاسيو: إيه الحكاية؟

یاجـــو : مولای جات له نوبه صرع، دی تانی مرة تحصل له، إمبارح جات له واحده.

كاسسير: دلك له على صداغه.

ياجـــو: لأ، إلا كده، الغيبوبة لازم تاخد مجراها الطبيعى، وإلا بقه يرغى وتلاقيه ينفجر في جنون متوحش، بص، أهو بيتحرك، تسمح تبعد شوية، آهو راح يصحى على طول، لما

بمشی راح أكلمك فی موضوع مهم. بخرج كاسيو

إزاى الحال دلوقت يا سيادة القائد؟ إياك ماتكونش دماغك اتأذت؟

عطيل: انت بتستهزأ بي؟

ياجـــو: أنا باستهزأ؟ لأ، والسما شاهد! بس أحب إنك تشيل نصيبك زى الراجل!

عطيل : راجل بقرون، يبقى مسخ وبهيم.

ياجـــو: يبقى ما أكتر البهايم في مدينة مكتظة، وياما أكتر المسوخ المدنيين.

عطييل: هوه اعترف؟

یاج و : یاسیدی خلیك راجل، فكر فی إن كل جدع بدقن طوّقه الجواز بیجر الحمل معاك دلوقت. دا فیه ملایین عایشه دلوقت بتنام باللیل فی ملایات عمومیة وتحلف إنها مخصوص لیها . انت حالتك أحسن . دا جزء من نار جهنم أكبر سخریة من اللعین الأكبر ، إن الواحد یبوس فی مره مستهتره علی فرشه مأمونه وفاكرها عندها عفة ، لا ، أنا لازم أعرف، فإذا ما عرفت وضعی ، راح أعرف مصیرها .

عطييل: انت حكيم، دا شيء مؤكد.

ياجـــو: نمالك نفسك شوية، واسمع من غير ما تخرج عن صبرك، انت وانت هنا مغشى عليك من حزنك عاطفة ماتليقش أبدا

براجل زيك جاه كاسيو، وزعته وشفت له عذر مقبول لإغمائك وسألته يرجع عشان يكلمنى، فوعد، خبى انت بس نفسك وخد بالك من حركات السخرية والوقاحة وعلامات الاحتقار الواضحة اللى راح تبان على كل نقطة في وشه، علشان أنا راح أخليه يحكى الحكاية من أول وجديد، امتى وازاى وكام مره ومن أى مده وإمتى جامع مراتك ولسه حايجامعها، بس باقول لك لاحظ إشارته، أصبر وإلاً حا أقول انك بقيت من أولك لآخرك شحنة أعصاب وماعادش فيك ذرة رجولة.

عطبیل: أنت سامعنی یا یاجو؟ أنا فی الصبر مش راح یکون أدهی منی، لكن إنت سامع؟ مش راح یكون كمان سفاح أكتر منی.

یاجـــو: واضح بس خلی دایما کل شیء لوقته، ممکن تنسحب؟ پنسحب عطیل

دلوقت، أنا حاساً لك كاسيو عن بيانكا، عاهرة بتبيع رغباتها علشان تشترى بيها عيش وهدوم، مخلوقة متيمة بكاسيو لأنه دا داء في المومس، تخبل الكتير وتتخبل بواحد، وهو تو ما حايسمع سيرتها مش حيقدر يمنع نفسه من الضحك طوالي، أهه جاى.

يدخىل كاسيو

لما حايبتسم عطيل راح يتجن، غيرته الجاهلة راح تفسر

ابتسامات الغلبان كاسيو وحركاته وسلوكه المرح تفسير مغلوط من أوله لآخره.

إزاى الحال يا قائد تانى؟

كاسبيو: بتروح من سيء لأسوأ لما باسمعك تديني لقب قاتلني الحرمان منه.

یاجـــو: بس انت اشتغل کویس علی دسدمونه، تنحل (بصوت أوطی) لو کانت القضیة فی إید بیانکا کان النجاح جه جری.

كاسبير: مش بإيد الغلبانه دى، ياخساره.

عطيل : شوف بيضحك إزاى من دلوقت!

ياجـــو: أنا عمرى ما عرفت مره بتحب راجل بالشكل ده.

كاسبير: مع الأسف، أفتكر المطيوره بتحبني.

عطيل : دلوقت بينكر شوية وبيصرف الموضوع بالضحك.

ياجــر: سامع باكاسيو؟

عطيل : دلوقت باجو بيتكى عليه علشان يفرغ اللى عنده، استمر، كويس، كويس.

ياجـــو: دى بتقرل إنك حاتجوزها، انت نارى؟

كاسبيو: ها، ها، ها!

عطييل: إنتصرت، انت داخل روما، انتصرت(١) .

كاســــيو: أجوز! مين؟ مومس! أرجوك ترؤف شوية بذكائى، لسه مافسدش للدرجة دى، ها، ها،

⁽١) كان القائد المنتصر بدخل روما على عربية شايل قضيب علثان الوقاية من عين الحسود.

عطسيل : كده، كده، اللي حايضحكوا هما اللي حا يكسبوا في الآخر.

ياجـــو: بالذمة الاشاعات بتقول إنك راح تتجوزها.

كاسبيو: أرجوك تتكلم جد.

ياجــــو : ده أنا أبقى راجل وحش قوى لو ماكنتش .

عطيل : ضمنت لي خلفي؟.

كاسبير: القردة دى هية اللى طلعت الإشاعة دى، طلع فى دماغها إن أنا حاجوزها بناء على غرامها وغرورها، مش بناء على وعد منى.

عطيل : ياجر بيشاور لي، دلوقت حايبتدي يحكى.

كاسبير: دى كانت هنا من لحظة، بتلاحقنى فى كل مكان، ديك النهار كنت باتكلم مع جماعة من البندقية، فإذا بالمقطوعة تيجى وتترمى عليه كده حوالين رقبتى.

عطيل : وطبعا قالت له: ه ياعزيزي كاسير! حركته تدل على كده.

كاسبير: تتعلق وتميل وتعبط، تهز وتشد فيه! ها، ها!

عطيل : آهو دلوقت بيقول إزاى جرته لأودة نومى، آه، مناخيرك شفتها، بس لسه الكلب اللي حارميها له.

كاسسيو: الحق، أنا لازم أسيبها.

ياجــسو: االله، بص آهي جاية.

تدخسل بيانكسا

كاسبيو: دى رمه، وكمان مسريحة، انت قصدك إيه من

المطارده دي؟

بيانكا: إن شاء الله الشيطان واللى خَلَفه يطاردوك، انت قصدك ايه من المنديل اللى لسه مدُّهو لى دلوقت؟ أنا اللى هبلة ع الآخر اللى أخدته منك. أعمل لك واحد زيه! قال حاجة لقيتها في أودتك ومش عارف مين اللى سايبها لك! تذكار من واحده عاهرة، ولازم أعمل لك واحد زيه، آهو، اديه للى بتركب عليها؛ سوى جبته من هنا ولا من هنا، أنا مش حاشتغله.

كاســـيو: ليه كده يا بيانكا، خليك لطيفه، ليه كده، ليه كده؟

عطيل : وحق السما، دا لازم يكون منديلي!

بيانكا: إذا كنت عاوز تتعشى النهارده، اتفضل، إذا ما كنش، ابقى استنى اليوم اللي يعجب حضرتك.

تخسرج

ياجمو: وراها، وراها.

كاسبير: أيوه لابد، وإلا حتقعد تبرطم في الشارع.

ياجـــر: حتتعشى معاها؟

كاسىيو: أيوه، دى نيتى.

ياجـــو :كويس، أنا يمكن أعدى عليك، فيه موضوع لازم أكلمك فيه.

كاسمير: أرجوك، حاتيجى؟

ياجـــر: امشى، خلى الكلام بعدين. يخـرج كاسيـو

عطييل: أقتله إزاى يا ياجر؟

ياجــو: شفت إزاى كان بيضحك وهو بيحكى وساخته؟

عطيل: آه يا ياجو!

ياجــو: وشفت المنديل؟

عطیل: ده کان مندیلی!

ياجـــو: اقسم على كده، وشفت ازاى بيقدر الست المجنونة حرمك، هي اديت هو له، وهو اداه للمومس بناعته.

عطـــيل : آه لو أفضل أقتل فيه تسع سنين، مره متربية، مره جميله، مره لطيفه بالشكل ده.

ياجــو: ياعم، إنس كل ده.

عطيل: أيوه، خليها تعفن الليلة دى وتختفى وينضرب عليها العدم، لأنها مش حاتعيش، أنا دلوقت قلبى إنحول لصخر، أضربه، يوجع إيدى، آه، مخلوقه عمر الدنيا ما نضرت أرق منها، تقعد جنب إمبراطور وتأمره بأوامرها.

ياجــو: دا مش وقت الكلام ده -

عطيل : الحبل برقبتها، أنا باوصفها زى ما هيه، مين يجاريها لما تمسك إبرتها، لما تلعب على عودها ؟ غناها يروض دب، ذكاء قد كده عالى وابتداع!.

ياجـــو: ما هو دا اللي يزود الطين بله.

عطيل : آه ، ألف وألف مره . ثم شوف كرم أصلها .

ياجـــو: أيوه أصيله قوى.

عطيل : نعم، لكن الألم اللي في كل ده يا ياجو، أه يا ياجو، الألم

يا ياجر!

ياجـــو: إذا كنت متيم أوى بغدرها، إديها رخصة تغدر، فالموضوع لولا إنه يخصك،مايهمش حد.

عطييل: حافرمها حتت، تركبني أنا قرون.

ياجىسو: نعم، دى وساخة منها.

عطيل: ومع الظابط بتاعى!!

ياجـــو: أوسخ.

عطيل : إديني شوية سم الليلة دى يا ياجو، أنا مش حاطول معاها لاحسن جسمها وجمالها يهبطوا عزمي تاني، الليلة يا ياجو.

ياجـــو: ماتقتلهاش بالسم، أخنقها في سريرها، في نفس السرير اللي لوثته.

عطيل : عظيم، عظيم، اقتراح عادل والعدل يعجب، عظيم جدا.

ياجـــو: أما كاسير فسيبهولي، حاتسمع البقية في نص الليل.

عطيل : جميل جدا. (صوت طرومبيطة من الداخل) إيه الطرومبيطة دى؟

ياجـــو: أكيد رسالة من البندقية.

يدخل لودوفيكو ودسدمونه ويعض الأنباع دا لودوفيكو، دا جاى من طرف الدوق، بص، وآدى مراتك معاه.

لودرفيكو: رعاك الله، ياسيادة القائد.

عطسيل: ورعاكم من كل قلبى.

لردرفيكو: الدرق رشيوخ البندقية بيبعتوا لك تحياتهم.

يسلمنه جنواب

عطييل: أنا أقبل ما طاب لهم إرساله.

دسدمونه: إيه الأخبار، يا ابن عمى ؟.

ياجــو: أنا سعيد بمرآك ياسنيور، مرحب بيك في قبرص.

لودوفيكو: إزى القائد التانى كاسيو؟.

ياجـــو: أهو عايش يا سنيور.

دسدمونه: ياابن عمى، دا فيه قطيعة يؤسف لها حصلت بينه وبين مولاى، لكن انت حاتصلح الأمور.

عطيل : هل أنت متأكده من ده ؟

دسدمونه: مولای؟

عطيل : (يقسرأ) ولا يفوتكم العمل بالآتي، ألا وهو...

لودوفیکو: مابیتکلمش،مشغول بالجواب، فیه خلاف بین مولای وکاسیو

دسدمونه: خلاف من أوحش ما يمكن، كنت أحب أعمل كل شيء ممكن علشان أصالحهم نظراً لمحبتي لكاسيو.

عطيل : تنحرق الدنيا بنار وكبريت!.

دسدمونه: مولای؟.

عطسيل: انت عندك مخ؟.

دسدمونه : جرى إيه، هوه غضبان؟.

لودوفيكو : يمكن الجواب أثر فيه، علشان افتكر بيطلبوا إنه يرجع ويعين كاسير محله. دسدمونه : صدقنی دا شیء بسرنی.

عطيل: ياسلام!.

دسدمونه: مولاي!.

عطييل: أنا مبسوط .. اللي شايفك بتجنني.

دسدمونه: لیه یاعزیزی عطیل؟

عطيل: شيطانه!.

يصفعها

دسدمونه: أنا ما عملتش حاجه علشان استحق ده.

لودوفیکو: مولای، ده شیء لا یمکن حد یصدقه فی البندقیة حتی لو حلفت إنی شفته بعینی، ده شیء زیاده عن الحد، إعتذر لها، دی بتبکی.

عطيل : شيطانه، آخ يا شيطانه، لو كان ممكن الدموع تحبل الأرض لكان كل دمعه طلعت تمساح، إبعدى عن وشى.

دسدمونه: أنا ماشية ما دام حضوري بيأذيك.

لردوفيكر: سيدة مطيعة بحق، أرجوك تنده لها تاني.

عطسيل: يا ست!

emengis: agks.

عطسيل: إيه اللي انت عاوزه منها يا سيد؟

لودوفيكو: مين؟ أنا، يامولاى؟.

عطلین : آی نعم، انت قلت لی أخلیها لك تدور، دی یاسید ممكن تدور و تدور و تدور، ومع كده نمشی لقدام و تدور تانی،

ونقدر تعيط يا سيد، تعيط، مطيعة، زى مابتقول، مطيعة، مطيعة مطيعة جدا، إستمرى فى دموعك، أما بالنسبة للموضوع ده ياسيد، شوفوا الألم لما يتزور، فأنا جالى أمر بالرجوع إلى البندقية، إبعدى من هنا، حابقى انده لك بعدين أنا حالخضع للتكليف ده وراح أرجع البندقية، إمشى من هنا.

تخرج دسدمونه

كاسيوراح ياخد محلى، أما الليلة ياسيد، فأنا أرجو منك والح في الرجاء، إنك تتعشى معايا، مرحب بيك ياسيد في قبرص.

معيز وقرود(١) !! يخسرج

لودوفيكو: هل ده هو المغربى النبيل اللى مجلس شيوخنا كان بيشيد بكفاءته المطلقة؟ هل دى الطبيعة اللى ما كانش فيه انفعال يقدر يهزها؟ القوة الراسخة اللى لاطلقات الأحداث ولا سهام الحظ كانت تقدر تخترقها أو تجرحها؟.

ياجــو: إتغير كتير.

الودوفيكو: هل عقله سليم؟ هل النجن؟.

ياجــو: هو حسب ما هوه، أنا ما أقدرش أتناقش في اللي كان مفترض فيه؛ لكن إذا كان الحاضر مختلف عن المفترض ده، فأرجو إنه كان متفق في الماضي.

الودوفيكو: إيه ده!! يضرب مراته؟!.

⁽١) حيرانات عرفت بشبقها.

یاجسو: صحیح مش أصول، یا عالم إذا كانت دى أوجع واحده . لودوفیكو: هى دى كانت عاده ، ولا الجواب فور دمه وخلق غلطته خلق؟

ياجـــو: مع الأسف، مع الأسف، دى ماتبقاش أمانه منى لو قلت اللي شفته وعرفته.

انت حاتعاین بنفسك، وتصرفاته حاتوریهولك بشكل یوفر علیه الكلام، بس تابعه وشوف راح یستمر إزای.

الودوفيكو: أنا آسف اللي أملي فيه خاب. خـروج

(المشهد الثاني) [القلعــة]

يدخل عطيل وإميليا

عطييل: يعنى انت ماشوفتيش حاجه؟.

إميليا: ولا عمرى سمعت ولا شكيت في حاجة.

عطيل : لأ، انت شوفتيها هيه وكاسيو مع بعض .

إميليا: لكن ماشفتش أى حاجه بطاله، وسمعت كل حرف نطق به النفس بينهم.

عطيل : إزاى، عمرهم ما تهامسوا؟.

إميليا: عمرهم يا مولاى.

عطيان: ولا وزعوك بعيد عنهم؟.

إميات المسادا.

عطيل عجيبوا

إميليا: أنا مستعدة يامولاى وأراهن برقبتى إنها بريئة. إذ كنت بتفتكر غير كده، فشيل الفكرة دى من ذهنك، دى بتعمى قلبك، وإذا كان فيه شخص متعرس حطها فى راسك، فخلى السما تنتقم منه باللعنه اللى نزلت على الحية (١) ، علشان لو ما كانتش أمينه، عنيفة ومخلصة، يبقى مافيش راجل مسعد فى الدنيا. أطهر نسوانهم كلهم تبقى دنسه دناسة الافترا.

عطسيل: قولى لها تيجي هنا؛ روحي.

تضرج إميليا

اتكلمت كفاية ، لكن دى تبقى معرصة هبلة اللى ماتقدرش تقول الكلام ده وأكتر ؛ دى عاهره لليمة ، حاطه أسرارها الوسخة فى درج قافلاه بالضبة والمغتاح ، ومع كده بتركع وتصلى ، أنا شفتها بتعمل كده .

تدخل دسدمونه وإميليا

دسدمونه: إيه مشيئتك يا مولاى؟

عطييل: اتفضلي يا كتكوته، تعالى هنا.

دسدمونه : إيه اللي انت عاوزه ؟

عطييل : خليني أشوف عنيكي، بصبي في وشي .

دسدمونه: إيه الفكرة المخيفة دى؟

عطسيل: (لإميليما) إنت يا ست، شوفى شغلك، سيبى الزباين لوحدهم واقفلى الباب، وإذا أى حد جه، كحى، أو همهمى،

⁽١) اللي أغرت آدم وحوا، (التوراة، سفر التكوين)

صنعتك، صنعتك، باللا انكشحي.

تذرج إميليا

دسدمونه : بحق ركوعى قول لى إيه مفاد كلامك؟ أنا فاهمة الغضب اللى في كلامك، لكن مش فاهمة الكلام.

عطين : قولى لى انت إيه؟

دسدمونه : مراتك، يامولاي، مراتك الوفية، المخلصة.

عطيل: تعالى، إحلقى وودى نفسك جهنم، لحسن بصورتك اللى زى ملاك من السما، الشياطين نفسها ممكن تخاف تقبض عليكي، على جهنم إذن مرتين(١) ، إحلقي إنك أمينه.

دسدمونه: السما تعرف الحقيقة.

عطييل: السما تعرف بحق إنك كدابه كدب الجحيم.

دسدمونه: على مين، يامولاى؟ مع مين؟ كدابة ازاى؟.

عطييل: آه يا دسدمونه، إبعدى عنى، ابعدى، إبعدى.

دسدمونه: آه، یادی الیوم الکرب، بتبکی لیه؟ أنا السبب فی الدموع دی، یا مولای؟ لو کان عندك شك فی إن أبویا یکون هو اللی سعی فی طلب الرجوع ده، فما تحطش اللوم علیه، ما دمت أنت خسرته، فأنا كمان خسراه.

عطيل : لو كانت السماحيت تمتحنى بالعذاب، لو مطرت على راسى العريانه ذل وعار، وغرقتنى في الفقر لجبيني،

⁽١) مرة للخيانة ومرة للكنب.

ورقعتنى أسير أنا وأعز آمالى، لكنت لقيت فى زاويه من روحى قطرة من الصبر؛ لكن تسمرنى هدف لزمن الهزء يحط عليه صباعه البطئ، الدوار! نعم، حتى ده كان ممكن أحتمله، عال العال، لكن هناك محل ما حوشت روحى، محل ما انكتب لى يا أعيش يا أموت، المنبع اللى منه نهرى أما يجرى أو يضربه الجفاف، يا إما أطرد منه، يا إما أحتفظ بيه مستنقع لضفادع الطين، تجامع وتولد فيه! هنا يا صبر، ياملك صغير شفايفك زى الورد، لازم لونك يشحب ويسود؛ أيوه، هنا، تكفهر اكفهرار الجحيم!.

دسدمونه : آمل إن مولاي النبيل يعتبرني أمينه.

عطيل : أيوه ، زى دبان المدابح فى الصيف ، اللى حتى الهوا يلقحها ، انت العشبة ، انت اللى جمالك قد كده باهى ، اللى ريحتك قد كده عطر حتى إن الحواس تتوجع لك من شوقها ، ياريتك عمرك ما إتولدت!.

دسدمونه: يا أسفى، إيه الخطية الجاهلة اللي أنا ارتكبتها؟

عطيل: هل الصفحة البديعة دى، هل الكتاب اللى مافيش أجمل منه ده، كان انعم علشان ينكتب عليه، عاهرة؟ ارتكبت إيه! ارتكبت؟ آه يامومس الكل! دا أنا خدودى لازم تتحول لسعير ولا سعير الحداد يحرق العفة ويخلف منها رماد، علشان بس انطق باللى عملتيه، ارتكبت إيه؟ دى السما تسد أنفها والقمر يستغمى، الريح الهايجة اللى تبوس كل اللى تلاقيه تخمد في بطن الأرض الخاوية ولا تسمعش اللى انعمل، ارتكبت

ايه؟.

دسدمونه: وحق السما، انت غلطان في حقى!.

عطيل: انت مش بغي؟.

دسدمونه: لأ، أنا بقول الحق زى ما أقول إن أنا مسيحية، إذا كان الاحتفاظ بالوعاء ده لسيدى سليم من كل لمسة وسخة، ماهياش حلال، إذا كان ده مش مسلك باغية، أبقى أنا مش باغية.

عطيل : إيه، مانتش عاهرة ؟ .

دسدمونه : لأ، أنا روحى خالصة عند ربنا من الذنوب.

عطسیل: بقی دا ممکن؟.

دسدمونه: السما تغفر لنا خطايانا!.

عطسيل: ابقى أنا أطلب عفوك، أنا افتكرتك عاهرة البندقية المكارة، اللى الجوزت عطيل. انت ياوليه، (تدخل إميليا) ياللى موقف قدام موقف القديس بطرس، على باب النار، انت، انت، أيوه انت، احنا خلصنا شغلنا، آدى حق تعبك، من فضلك تدورى المفتاح وتخلى الموضوع سر.

بخسرج

إميليا: يادى الأذية، هو السيد ده بيفتكر إيه؟ وازيك انت ياستى؟ ازيك يا كريمة؟.

دسدمونه: بيتهئ لي نايمة نص نوم.

إميليا: إيه اللي حصل مع مولاي ياستي؟.

دسدمونه: مع مين؟

إميليسا: بقول مع مولاى ياسيتى.

دسدمونه: مين مولاك؟.

إميليسا: مولاى مولاك ١.

دسدمونه: أنا ماليش مولى، ماتكلمنيش با إميليا، أنا لا أقدر أبكى ولا عندى جواب غير اللى يجرى من عينى، أرجوك الليلة تفرشى ملايات دخلتى على سريرى، ماتنسيش، وقولى لجوزك بيجى هنا.

إميليا: ده إيه التغيير ده اللي حصل هنا؟!.

تخسرج

دسدمونه: دا عدل إنى اتعامل بالشكل ده، عدل كبير أنا عملت إيه علشان يوجه لى أى لوم على أى تصرف منى؟

يدخل ياجو وإميليا

ياجــو: إيه طلبك يا هانم؟ كيف الحال؟.

إميليك : مش عارفه، اللي بيربوا الأطفال الصغيرين بياخدوهم بالراحة، والواجبات السهلة، كان ممكن يأنبني كده، مانا بعدى عيلة ممكن تتأنب.

ياجسو: إيه الموضوع يا افتدم؟.

إميليا: ياحسرة، مولاى وصفها بالعهريا ياجو، ورماها بشتيمة وألفاظ فظيعة ما فيش حد عنده قلب يقدر يسمعها.

دسدمونه: أنا إسمى كده يا ياجر؟.

ياجــو: أي اسم يا افتدم؟ .

دسدمونه: الاسم اللي قالت إن مولاي سماني بيه؟.

إميليا: سماها عاهرة، لما يكون شحات وسكرى مايرميش ألفاظ زى دى على كلبة.

ياجمو: وإيه اللي خلاه يعمل كده؟.

دسدمونه : أنا مش عارفه، لكن أنا متأكده إنى مش كده .

ياجــو: ماتبكيش، ماتبكيش يادى اليوم.

إميليا: هي كانت سابت الخطاب اللي طلبوا إيدها من أكرم العائلات وسابت أبوها وبلدها وصحابها علشان يتقال لها كده؟ مش دى حاجة تبكى؟.

دسدمونه: دا حظى المنكوب.

ياجــو: حقك تلعنيه، ودا مين اللي حط الكلام ده في دماغه؟

دسدمونه: السما بس هي اللي تعرف.

إميليا: تنقطع رقبتى إن ما كانش فيه واحد ندل جهنمى، وغد، وصولى ونمام، عبد غشاش ودجال، هو اللى ابتدع الفرية دى علشان يلاقى له شغله.

ياجه و: أبدا، مافيش إنسان بالرصف ده، مستحيل،

دسدمونه: لو كان موجود، يسامحه رينا.

إميليا: يسامحه حبل المشنقة، والجحيم يهرى جلده، ليه بيقول لها عاهرة؟ بتقابل مين؟ فين؟ في أنهو وقت؟ إيه شكله؟ إيه شبهه؟ المغربي ضلله وغد مافيش أندل منه، وغد سافل

متمرس فى السفالة، ولد وسخ، أطلب منك يا سما تكشفى الأوباش دول وتحطى فى كل إيد أمينة كرباج يجلدهم عربانين فى كل مكان فى الدنيا، من الشرق للغرب.

ياجىر: وطى صوتك.

إميليا: مصيبة تنزل فوق دماغهم؟ أهو برضه كان واد من النوع دا هو اللي قلب على دماغك وخلاك ترتاب في حاجة بيني وبين سيدي المغربي.

ياجسو: انتى مجنونة، إعقلى.

دسدمونه : ياحسرتى يا ياجو، إيه اللى أقدر أعمله علشان أسترد اللى خسرته. عشان أحلف بنور السما أنا مش عارفه إزاى خسرت مولاى، أنا أشهد هنا وأنا راكعة، إذا كانت إرادتى أخطأت فى حق حبه، بالفعل أو بالفكر، أو إذا كانت عينى، ودانى أو أى حس من حواسى لقت متعتها إلا فى حبه، أو إذا كان حبى له وقف اليوم أو فى أى يوم مضى أو جاى رغم الهوان اللى شفته منه يبقى تنفقد راحتى، هنا وفى الآخرة، القسوة قدرتها كبيرة، وقسوته ممكن تدمر حياتى، لكن مش حتغير حبى، ما أقدرش أقول عاهرة، الكلمة نفسها بانفرها وهية جاية على لسانى، الدنيا كلها لو بأباطيلها اجتمعت، ماتقدرش تجرنى للفعل اللى استحق بيه الاسم

ياجــو: أرجوك تريحى بالك، دا مجرد إنقلاب في مزاجه، مشاغل الدولة مقلقلاه.

دسدمونه: إذا كان ما فيش شيء تاني ...

ياجــو: مافيش أؤكد لك.

صوت طرومبيطات

آهو الصوت دا ابتدا ينده ع العشاء المندوبين اللي جايين من البندقية بينتظروا جوا، ادخلي وبطلي بكا؛ كل شيء راح يتعدل.

تخرج دسدمونه وإميليا يدخيل رودريجيو

إزى الحال دلوقت يا رودريجو؟

رودريجو: أنا شايف إنك ظالمني.

ياجـــر: ظالمك في إيه؟

رودریجو: کل یوم تلبسنی شغلة جدیدة یا یاجو، وحسب ما أنا شایف دلوقت، بدل ما تدینی أی فرصة، بتبعد عنی کل سبب للأمل، أنا مش راح أستحمل ده بعد کده، ولا أنا مستعد أصبر بهدوء علی اللی صبرت علیه بعبط لغایة دلوقت.

ياجـــو: ممكن تسمعنى يارودريجو؟

رودريجر: ياما سمعت، وكله كلام مالوش صلة بالفعل.

ياجسسو: دا كلام ظالم جدا.

رودریجر: مافیهوش غیر الحق، أنا صرفت لحد ما فلست، المجوهرات اللی أخدتها منی علشان تدیها لدسدمونه، نصها کان یکفی یغری راهبة، قلت لی إنها اتلقیتها وردت بفتح باب الأمل

في نوال خطوتها ومعرفتها قريب، لكن أنا ماشفتش حاجة.

ياجــو: كويس، إستمر، كويس جدا.

رودریجو: کویس جدا؟ استمر؟ أنا ما اقدرش استمر یا راجل، ولا دی حکایة کویسة، بصراحة أنا افتکر إنها حکایة وسخة وحا ابتدی أشوف إنی انضحك علی .

ياجسو: كويس قوى.

رودريجو: بأقولك ما فيهاش كواسة، أنا حاروح أقدم نفسى لدسدمونه، إذا رجعت لى مجوهراتى، حالفع عبايتى وأكفر عن الغزل الحرام اللى مشيت فيه، إذا ما كانش، فتأكد إنك انت اللى حاتدفع الثمن.

ياجر: خلصت كلامك؟

رودريجو: خلصت، ولا قلتش إلا اللي بأبلغك إنى حاعمله.

یاج و دلوقت بان لی صحیح إنك شخص عنده رجوله، ومن اللحظة دی وطالع حایكون رأیی عنك أحسن من أی وقت فات، إدینی إیدك یا رودریجو، انت اعتراضك علی صح، وإن كنت أؤكد لك إنی اشتغلت فی موضوعك جد.

رودريجو: مش باين.

ياجـــو: أنا مسلم إنه ما فيش حاجة ظهرت، وإن الشك بتاعك مايخلاش من النباهة والصواب، لكن يارودريجو لو كان عندك كل اللي عندى دلوقت أكتر من أى وقت فات علشان افتكر إنه فيك – أقصد الهمة والشجاعة والشهامة – فالليلة فرصتك علشان توريه، وإذا ما كنتش راح تاخد غايتك من

دسدمونه الليلة الجاية، إبقى اعملك كمين تزيحنى بيه من وش الدنيا وابتدع أى مؤامرة تخلص بيها على .

رودریجو: طیب، دا یتلخص فیه ایه؟ حاجة فی حدود العقل والإمكان؟ یاجـــو : عزیزی، فیه النهارده بعثة مخصوصة جات من البندقیة عشان كاسیو یحل محل عطیل.

رودريجو: صحيح، يعنى عطيل ودسدمونه راجعين البندقية؟

ياجـــو: لأ، هو رايح موريتانيا، وراح ياخد معاه الحلوه دسدمونه، إلا إذا تعطل هنا لسبب من الأسباب، فالعامل الحاسم دلوقت هو إزاحة كاسيو.

رودريجو: تقصد إيه بإزاحة كاسيو؟

ياجـــو: الله، يعنى ما يقدرش ياخد محل عطيل: تنسحق راسه.

رودريجو: ودا اللي انت عاوزني أعمله؟

یاج و ایوه، إذا كنت تتجرأ تخدم حقك ومنفعتك، هو بینعشی اللیلة عند مره مومس، وأنا رایح له هناك، لسه ما یعرفش حاجة عن الشرف اللی نزل علیه، فإذا راقبته وهو طالع من هناك وأنا حاحاول إن دا یكون بین الساعة اتنشر والساعة واحده اهجم علیه بالطریقة اللی تعجبك، أنا حاكون قریب عشان أساعدك ونخلص علیه مع بعض، یاللا، ماتقفش مدهوش كده، امشی معایا، أنا حاوریاك إن الموته دی ضروریة لدرجة إنك مش حاتلاقی مفر من إنك تعملها، الناس دلوقت فی عز العشا واللیل قرب یخلص، یاللا بینا.

رودریجر: لازم تفهمنی أسباب أكتر لكل ده.

ياجسر: حافهمك. خسروج

(المشهد الثالث) [القلعــه]

يدخل عطيل ولودوفيكو ودسدمونه وإميليا ويعض الأتباع

لودوفيكو: أرجو سيادتك ما تتعبش نفسك أكتر من كده.

عطييل : عفوا، المشى كويس عشانى.

لودوفيكو: إنمسى بالخير، شاكر لسيادتكم كل الشكر.

دسدمونه: رفعتك محل أكبر الترحيب.

عطيل : تحب تتفضل سيادتك ؟ يادسدمونه .

دسدمونه: مولای؟

عطـــيل : أدخلي سريرك في الحال، أنا راجع بعد شوية، قولي للحال المادة والمادة المادة ا

دسدمونه: حاضر يامولاي.

يخرج عطيل ولودوفيكو وأتباعهم

إميليـــا: إزاى الحال دلوقت؟ باين عليه أروق شوية؟

دسدمونه: بيقول حايرجع في الحال، وطلب منى أدخل السرير، وأمرني أمشيكي،

إميليا: تمشيني؟!.

دسدمونه : مادام دا طلبه باعزیزتی إمیلیا، تبقی تجیبی لی قمیص النوم، ومع السلامة مش لازم نزعله دلوقت.

إميليا: يا ريتك عمرك ما شفتيه.

دسدمونه: أنا ما ادعيش بكده، حبى قد كده قابله لدرجة إن خشونته وتأنيبه وصرامته - من فضلك شيلى الدبوس - لهم حسن وجمال في نظرى.

إميليا: أنا فرشت الملايات اللي قولت لي عليها في السرير.

دسدمونه: كله محصل بعضه، باقولك يظهر أن عقولنا ضعيفة بصحيح! لو مت قبلك إبقى كفنينى فى ملاية من الملايات دول.

إميليا: إيه ده؟ إيه ده؟ بتقولي إيه؟

دسدمونه: أنا أمى كان عندها وصيغة اسمها بربارى، حبت واللى حبته صابه جنان وسابها، كان عندها غنوة عن «الصغصاف»، نغمة قديمة لكن كانت بتعبر عن حظها، ماتت وهى بتغنيها، الغنوة دى مش حاتروح من بالى الليلة، عندى حاجات كتيرة أعملها، غير إنى أميل راسى على جنب، وأغنيها زى المسكينة بربارى، أرجوكى تخلصى بسرعة.

إميليا : أروح أدور على قميص النوم؟

دسدمونه : لأ، لكن فكي الدبوس اللي هنا، لودوفيكو دا راجل مهذب.

إميليا: ورجيه جدا.

دسدمونه: بيتكلم كويس.

إميليا: أنا أعرف ست في البندقية كانت مستعدة تمشى ورجليها حافية لحد فلسطين بس عشان تلمس شفته التحتانية.

دسدمونه: تغنى:

الروح من شقاها قعدت تغنى جنب الجميزه، غنوا كلنا على الصفصصاف وخصصاره، الإيد على الصدر والراس على الركبة، غنوا على الصفصاف، غنوا على الصفصاف، غنوا على الصفصاف، غنوا على المخصاف، غنوا على المفصاف، غنوا على الصفصاف، غنوا على الصفصاف، غنو على الصفصاف، غنوا على الصفصاف،

غنوا على الصفصاف، غنوا على الصفصاف، (تتكلم) أرجوك تسرعى، راح ييجى دلوقت. غنوا ياجماعة على الصفصاف، اللى منه حاعمل عقدى وماحدش يلومه عشانى أنا قصصابله هجسسره

(تتكلم) مش دى الشطره، اسمعى، مين اللي بيخبط؟ إميليا: دى الريح.

دسدمونه: تغنى:

أنا قلت لحبى يا خاين، كان رده على إيه؟ غنوا على الصفصاف، غنوا على الصفصاف، لو غزلت غيرك مره، نامى مع غيرى م الرجال (تتكلم) خدى بعضك وامشى، مساء الخير، عينيه يتاكلنى، ياترى دا يفول بعياط؟

إميليا: دا كلام مالوش معنى.

دسدمونه: أنا سمعت كده، آه من الرجاله، الرجاله دول انت في ضميرك من تفتكري - قولى لى يا إميليا - إن فيه نسوان بتخون أزواجها بالشكل الوحش ده؟

إميايا: كتير منهم، مفيش كلام.

دسدمونه : يعنى انت تقبلى على نفسك تعملى كده ولو ادوك الدنيا كلها؟

إميليا: انت ماتعمليهاش؟

دسدمونه : لأ، والنور اللي نازل من السما ده.

إميليا: والنور اللي نازل من السماده، أنا كمان لأ، لكن ممكن أعملها في الضلمة.

دسدمونه: ممكن تعملي العمل ده ولو ادوكي كل الدنيا؟.

إميليـــا : الدنيا دى حاجة مالهاش حدود، دا يبقى نمن كبير على ذنب صغير.

دسدمونه : أنا بحق وحقيق ما افتكرش إنك تقدري.

إميليك : وأنا بحق وحقيق افتكر إنى أقدر، وبعد ما أربط أحل، طبعا مش حاعملها عشان خاتم بفص، ولا علشان كام توب كتان، ولا فساتين ولا چوبات ولا برانيط ولا أى تقليعة فارغة من النوع ده، لكن علشان الدنيا كلها؟ ياسلام، مين اللى ماتركبش لجوزها قرون علشان تركبه على عرش؟ ده أنا أغامر وأروح المطهر عشانها(۱).

دسدمونه : أنا أبقى ملعونة إذا عملت إثم بالشكل ده ولوكان نظير الدنيا كلها.

إميليا : ليه؟ ما هو الاثم إثم في الدنيا؛ فإذا كانت أجرتك الدنياكلها، يبقى إثم في دنيتك، وتقدري بسرعة تصحيه.

دسدمونه : ما افتكرش في واحدة في الدنيا بالوصف ده .

إميليا: فيه كتير، وتزودى عليهم عدد يملا الدنيا اللي لعبوا علشان يكسبوها، لكن أنا اعتقادى إن الغلطة غلطة الرجالة، إذا كانت نسوانهم بتقع في المنكر، افرضي إنهم أهملوا واجباتهم وراحوا يرموا الحب اللي من حقنا في حجر غير حجرنا، أو من غير كده ولا كده يقرفونا بغيرتهم ويحاسبونا على الخرجة والطلعة، أو افرضي إنهم يضربونا أو يقللوا المصروف انتقام ليه، ما احنا كمان عندنا الصغرا، وإذا كان عندنا لطف فعندنا كمان غل، خلى الأزواج تعرف إن زوجاتهم زيها زيهم، بتشوف وتشم، عندهم حلق يدوق الحلوة والمرة زي اللي عندهم، إيه اللي بيعملوه لما بيجروا

⁽١) المهر، درجة في عقاب الآخرة بين الجنة والنار.

ورا غيرنا؟ رياضة؟ أفتكر كده، هل الميل هو السبب؟ أفتكر أيوه. هل صنعف وبيتوههم عن الطريق؟ دا كمان أيوه. طيب هل احنا ما عندناش ميل؟ غية رياضة وضعف زى اللي عند الرجالة؟ إذن خليهم يعاملونا كويس، وإلا خليهم يعرفوا إن أذانا ليهم اتعلمناه من أذاهم لينا.

دسدمونه: انعسى بالخير، انعسى بالخير، أطلب من السما الهدى اللى يخليني بدل ما اتعلم من الشر الشر، أتعلم يحسني.

خسروج



الفصل الخامس (المشهد الأول) يدخل باجو ورودريجو

یاجـــر: هنا، أقف ورا الجدار ده، هو جای فی الحال، سل سیفك وعاالقلب على طول، بسرعة، بسرعة، ماتخافش من حاجة، أنا وراك، دی ضربة یاحاتنقذنا یاحاتهلكنا، مانساش ده وثبت عزیمتك.

رودريجو: خليك قريب، يمكن الضربة تخيب.

ياجـــو : هنا، خطوة وأكون معاك، خليك جرئ وأقف في مطرحك.

ينسحب

رودریجو: أنا مش متحمس للعملیة دی، ومع كده دا ادانی أسباب كافیة، راجل وحایختفی، یاللا یاسیف، وریه الموت.

یاجـــو: أنا فضلت أحك فی جلد الواد ده لغایة ماهریته، وآدیه بیركبه الغضب، دلوقت سوی قتل كاسیو أو كاسیو قتله أو الاتنین قتلوا بعض، كله بالنسبة لی مكسب، لو رودریجو عاش حایطالبنی علی دایر الملیم بالدهب والمجوهرات اللی لهفتها منه بحجة إنها هدیة لدسدمونه، دا مش لازم یحصل، ولو كاسیو فضل، فالجمال الملموس كل یوم فی حیاته حایطلع علی أنا بالقبح، وغیر كده یصح المغربی یقول له حكایتی

ساعتها حاكون في خطر كبير، لأ، دا لازم يموت، فليكن، أنا سامعه جاي.

> بدخل کاسیو رودریجو: أنا عارف خطوته، داهوه، موت یاوغد.

يوجه طعنه لكاسيو

كاسبيو: الطعنه دى كان ممكن يكون فيها القضاء على لو ما كانش الصديرى بتاعى أحسن من اللى انت فاكره، لما اختبر أنا بتاعك.

يسل سيفه ويجرح رودريجو

رودريجو: آه، أنا اتقتلت!!

یاجو پجرح کاسیو فی رجله من ورا ویخرج(۱)

كاسبير: أنا اتبترت للأبد، المعونة ياهوه، القاتل! القاتل!.

يدخيل عطيل

عطيل: دا صوت كاسير، ياجر كان عند كلمته.

رودريجو: آه، أنا الوغد!

عطييل: بالظبط.

كاسبير: أه المعونه ياناس! شوية ضوء، هاتوا جراح!.

عطيل : داهو الت شهم، أمين وتعرف العدل، اللي لما صاحبك انضر، نبلك خلاك تشعر بإحساسه، انت بتديني درس.. ياقطقوطه آدى حبيبك ميت ع الأرض، وساعتك المنحوسة

⁽۱) جرحه في رجله ما دام سمع إن الصديري بتاعه بيحميه.

جايه جرى. يامومس، أنا جاى، المفاتن اللى فتنت لبى، عنيكى، سحرها إمحى من قلبى، السرير اللى اتوسخ بالشهوة راح بالدم يتوسخ. يخسرج

بدخل لودوفيكو وجراسيانو.

كاسيو: ياهوه، مافيش حارس، مافيش دورية؟

أنا اتقتلت، اتقتلت.

جراسیانو: دا فیه مصیبه حصلت، الصوت ده رهیب.

كاسبير: النجده.

الودوفيكو: إسمع.

رودريجو: يا ندل ياحقير.

لودوفیکو: فیه اتین أو ثلاثه بیتأوهو، لیلة ضلمة ودا ممکن یکون تمثیل، دی تبقی مجازفة، صدقنی، لو جرینا عالصراخ من غیر حد معانا.

رودريجو: مافيش حد جاى؟ يبقى أنا دمى حايسيح لغاية مأموت. يدخل ياجن ومعاه نور

لودوفيكو: اسمع!.

جراسیانو: آدی واحد جای فی جلابیته ومعاه نور وسلاح.

ياجـــو: مين اللي هنا؟ صوت مين ده اللي بيصرخ عا القتل؟

لودوفيكو: احنا مش عارفين .

ياجــو: ماسمعتوش صراخ؟

كاسسير: هنا، هنا، في عرض السما الحقوني.

ياجــر: إيه الحكاية؟!

جراسیانو: دا حامل رایة عطیل، علی ما أفتكر.

ياجــو: مين انت اللي عمال تصرخ هنا بالشكل المفجع ده؟

كاسبيو: ياجر؟ آه، أنا ادمرت، أوغاد خلصوا على، ساعدني شوية.

ياجــو: ياحرام، يا نائب أول! مين الأوغاد اللي عملوا كده؟

كاسبير: أفتكر فيه واحد منهم لسه هنا ومايقدرش يهرب.

ياجـــو: ياخونه يا أوغاد، (لجراسيانو ولودفيكو)

أنتو مين اللي هناك؟ تعالوا ساعدوا شوية.

رودریجو: آه ساعدونی هنا.

كاسبير: دا واحد منهم.

ياجــو: ياعبد، يامجرم، ياشرير، (يطعن رودريجو)

رودريجو: يا ياجو ياملعون، ياكلب مجرد من الإنسانية (يغمى عليه)

ياجسو: تقتلواالناس في الضلمة؟ فين الحرامية السفاحين دول؟

إيه الصمت اللى نزل على البلد دى!! هو، جريمة قلل، جريمة! (بدخل لودوفيكو وجراسيانو) إنتوا تطلعوا مين؟ أهل شرولا أهل خير؟

لردوفيكو: إبقى أحكم علينا بعد الاختبار.

ياجــو: سينيور لودوفيكو؟!

لودوفيكو: هوَّه ياسيد.

ياجـــو: أتوسل رحمتك، دا هنا كاسيو إعتدوا عليه جماعة أشرار.

جراسیانو: کاسیو؟

ياجــو: إيه حالك يا أخريا؟

كاسبير: رجلي انقطعت نصين.

ياجـــو: بعد الشر، شوية ضوء يا سادة، أنا راح أضمده بجلبيتي.

تدخسل بيانكسا

بيانكا: جرى إيه؟ مين دا اللي كان بيصرخ؟

ياجـــو : مين دا اللي كان بيصرخ؟

بیانکاسیو، یاکاسیو عزیزی، حبیبی کاسیو، یاکاسیو، یاکاسیو، یاکاسیو، یاکاسیو، یاکاسیوا.

ياجـــو : يا مومس، يامعروفة للكل، كاسيو، انت عندك فكرة مين اللي شوهك كده ؟

كاسيو: لأ.

جراسیانو: أنا آسف اللی لقیتك فی الحالة دی، أنا كنت بادور علیك. یاجـــو: إدونی رباط كـده، آه، بس كـرسی علشان ننقله من هنا بالراحة.

بيانكا : ياحسرتي، دا عمال يغمى عليه، كاسيو، ياكاسيو، ياكاسيو.

یاج ... یا حسن رات السادة، أنا عندی شك إن البت دی یكون لها ضلع فی الجریمة دی، اصبر انت شویة یا كاسیو یا أمیر، تعالوا، تعالوا، هاتوا لی ضوء، الوش ده إحنا نعرفه ولا لاً؟!! آه صدیقی وابن بلدی العزیز، رودریجو؟!! لا أیوه بالتأكید آدی مشیئة السما، رودریجو!!.

جراسيانو: إه، اللي من البندقيه؟.

ياجــو: هوه، بالضبط، ياسيد حضرتك كنت تعرفه؟

جراسيانو: أعرفه ؟ أيوه.

باجـــو : السيد جراسيانو؟ أرجوك تغفر لى، المصايب الدموية دى هية اللى فيها عذرى إذا كنت ما انتبهتش لسيادتك.

جراسيانو: أنا مسرور اللي شفتك.

ياجــو: إزاى حالك يا كاسيو؟ هاتوا كرسى، كرسى ١.

جراسیانو: رودریجو؟.

ياجــو: هو بعينه يبجى الكرسى آه، دا جميل، الكرسى جه، راجل أمير منكم يشيله من هنا بكل لطف، أنا حادور على الجراح بتاع القائد العام لبيائكا أما انت ياهانم، فوفرى تعبك، الأخ اللى راقد هنا يا كاسيو، كان صديقى، إيه الخصومة اللى كانت بينكم؟!.

كاسبير: ماكانش فيه خصومة، ولاحتى أعرف الراجل.

یاجــر لبیانکا: لیه لونك انخطف؟ آه، انقلوه بره فی الهوا خلیکوا
هنا، یا أسیادی لونك مخطوف یا مدمازیل؟ شایفین
الزوغان اللی فی عینها؟ آی والله مادام بتصفری کده،
یبقی حانسمع منك دلوقت، أرجوکم بصوا لها کویس، بصوا
لها شایفین یاساده أکید الذنب ینطق ولو انخرس اللسان.

تدخسل إميليا

إميليا: يادى البلوه، إيه الحكاية؟ إيه الحكاية يا جوزى؟

ياجـــو: دا كاسير هاجمه رودريجو في الضلمة وناس تانية هربت، هو

شبه مقتول ورودريجو مات.

إميليا : حرام يا ساده، يا أمرا، ياحرام ياكاسيو ياراجل يا أمير.

ياجـــو: آدى نتيجة المشى مع النسوان، أرجوكى يا إميليا تسألى هوه كاسيو اتعشى فين امبارح؟ الله، إيه اللى في السؤال ده بيخليكي تترعشى كده؟

بيانكا: إتعشى في بيتى، لكن دا مابيخلينيش أترعش.

ياجسس : في بيتك؟ أنا أقبض عليكي، تعالى معاي.

إميليا: عار، عار فوق راسك يا شرموطه.

بیانکا: أنا مش شرموطه أنا طول عمری شریفة زیك انت یاللی بتشتمینی.

إميليسا: زيى أنا يانتنه؟ قطع لسانك.

خسروج

(المشهد الثاني) عطیل یدخل ومعاه نور، دسدمونه في السریر نایمه

عطيل: الحق ع السبب، الحق ع السبب، ياروحى، ماتخلنيش أقول لك إسمه يا نجوم، انت طاهره؛ الحق ع السبب، ومع كده مش راح أسيل دمها، ولا أنا حاخدش جلدها الأبيض من بياض التلج، الأملس زيه زى المرمر، مرمر القبور، ومع كده لازم تموت، وإلا اللى اتعمل معايا راح تعمله مع غيرى، اطفى النور ده، وبعد كده النور ده (۱)! لو إنى طفيتك انت، ياوهابة الضوء (۱) يكفى أندم عشان أرجع لك نورك من أول وجديد.

لكن نورك انت لو انطفى، يا أبرع نقش خرج من إيد الطبيعة لما اتفوقت على نفسها، حالاقى فين رب اللهب اللي يقدر يشعل نورك من جديد؟ الورده اللى تنقطف ماتنزرعش تانى، مكتوب عليها الذبول، راح أشمك على الشجرة. (يبوسها) يا أعطر نفس، ياللى شوية وتقنع العدالة نفسها أنها تكسر سيفها بيدها! مرة تانيه، مره تانيه، فليكى على الصورة دى فى الممات، وحا أقتلك، وراح أحبك بعد ما أقتلك. مرة تانيه، المرة الأخيرة (يشم ريحتها ويبوسها) عمر الحلاوة ما كانت بالشكل ده فى القضا. ما

⁽۱) بمعنى يقضى على حياتها.

⁽٢) استعارة من الشمعة.

أقدرش ما أبكيش، لكنها دموع قاسية، دا أسف مبعوت من السما اللي بيضرب مطرح ما بيحب، آهي بتصحي.

دسدمونه : مين اللي هنا؟ عطيل؟.

عطيل : نعم يادسدمونه .

دسدمونه: راح تدخل السرير يامولاى؟.

عطيل: انت صليتي الليلة يا دسدمونه؟.

دسدمونه: نعم يامولاي.

عطيل : إذا اذكرت جريمة أنسه مارضيتش عنها السما ولا الرحمان، اطلبي عنها فورا الغفران.

دسدمونه: آه يامولاي، قصدك بكده إيه؟.

عطيل : طيب، صلى بقى وما طوليش، أنا حاتمشى شويه، ماأحبش أقتل نفسك وهى لسه مش مستعده. لا، السما تحرم ده، نفسك ما أحبش أقتلها.

دسدمونه: إنت بتتكلم عن القتل؟.

عطيل : أيوه باتكلم.

دسدمونه : يبقى ابتهل م السما تنزّل رحمتها عليه .

عطييل: آمين، من كل قلبي.

دسدمونه: إذا كنت بتقول كده، يبقى أرجو إنك ما تقتلنيش.

عطسيل: هم!

دسدمونه: ومع كده أنا خايفه منك، لأنك مالكش مرد لما عينيك تتقلب كده، ليه خايفه، مش عارفه، علشان مافيش ذنب أعرف إنى ارتكبته، ومع كده خايفه.

عطيل : فكرى في خطاياك.

دسدمونه: خطایای حب شیلتوهولك.

عطييل: أي نعم، وعلشان كده راح نموتي.

دسدمونه: دا موت مش فى عرف الطبيعة اللى يقتل علشان المحبة. آه إنت ليه بتعض كده شفتك اتحتانية؟ كيانك كله بتهزه شهرة دموية، دى نذر شر، لكن أتمنى، أتمنى ما أكونش أنا المقصوده.

عطيل: اسكتى والزمى الهدوء.

دسدمونه : حاضر، بس إيه الموضوع؟

عطييل: المنديل اللي كنت قد كده باحبه وانت اديتيه لكاسيو.

دسدمونه : أبدا، أحلف بحياتي وروحي، جيب الراجل واسأله.

عطـــيل : ياروحـــى حاسبى، حاسبى مــن القسـم بالكدب انت على سرير الموت.

دسدمونه: أنا ؟! بس مش في الحال.

عطيل : لا، في الحال، اعترفي صراحة بجريمتك، مش إنكار كل بند بالحلفان هو اللي حايقدر يزحزح أو يقدر يكتم الرأى النائي اللي أنا باتأوه منّه جوايّه، لازم تموتي.

دسدمونه: إذن يرحمني رينا.

عطيل: آمين.

دسدمونه : وانت كمان خلى عندك رحمة ، أنا في حياتي ما أخطأت في

حقك، ولا عمرى حبيت كاسير، إلا الحب اللى السما تأمرنا بيه كلنا، عمرى ما اديت له دليل.

عطيل : بحق السما، أنا شفت النمديل في إيده، يامره ياللي بتحلف كدب، انت بتقلبي قلبي حجر وبتخليني أسمى جريمة العزم اللي أنا كنت شايفه تضحية، أنا شفت المنديل.

دسدمونه : يبقى لقاه، أنا عمرى ما إديتهوله، إبعت جيبه هنا، خليه يعترف بالحقيقة.

عطسيل: ما اعترف.

دسدمونه: اعترف بإیه، یامولای؟

عطييل: إنه عرفك.

دسدمونه: إزاى؟ بره حدود الشرع؟.

عطيل: أيوه.

دسدمونه: مش حايقول كده.

عطيل : لأ، مش حايقول، بقه انكتم، ياجو الأمين عمل اللازم.

دسدمونه :آه، خوفي بيتفسر، مات.

عطييل: لوكانت كل شعره من شعره حياة، لكانت شدة إنتقامى خلصت عليها كلها.

دسدمونه: آه، هو اتخان وأنا رحت.

عطيل: بره يا عاهرة، بتبكى عليه قدامى؟

دسدمونه :آه، اطردني يامولاي، بس ما بعشيش.

عطييل: موتى يا عاهرة.

دسدمونه: اقتلني بكره، خليني أعيش الليله؟

عطييل: لو قاومتي ...

دسدمونه: نص ساعة بس.

عطيل: اللي ابتدي ينتهي ...

دسدمونه: بس أصلى صلاة واحده.

عطيل : فات الأوان.

دسدمونه: آه بارب، بارب، بارب.

بخنقهسا

إميليا: (من الخارج): مولاى، مولاى، إيه ده، مولاى، مولاى، مولاى، عطيا عطيا الصوت ده؟ ما مائتش؟ لسه مامائتش تمام؟ أنا قاسى لكن برضه عندى رحمة، ما أحبش ألمك يطول، خلاص خلاص خلاص.

إميليا: (من الداخل): يامولاي، أحب أقول لك كلمة.

عطــيل: آه، دى إميليا، كمان شوية، ماتت. باينها جاية تتكلم على موت كاسيو، الصوت كان عالى. هيه ماعادش فيه حركة؟ ساكنة زى القبر. أخليها تدخل؟ هل دا صح؟ بتهيألى إنها بترتجف تانى. لأ،إيه أحسن شىء يتعمل؟ لو دخلت حاتكلم قطعا مراتى، مراتى، مراتى! مراتى إيه؟ أنا ماليش مره، يادى اللحظة اللى مالهاش إحتمال، يادى الساعة اللى أتقل منها ساعة، يتهيأ لى أن خسوف هايل كان لازم يحصل دلرقت للشمس والقمر، والأرض المرعوبة كان لازم تنشق

وهي بتشوف الكرن بيتغير.

إميليا: (من الداخل): أترجاك تخليني أكلمك يامولاي؟.

عطيل : أنا نسيتك، آه ادخلي يا إميليا، بشويش، كمان شوية، خليني أنزل الستاير الأول، إنت فين؟ إيه حكايتك دلوقت؟

يفتح الباب ... تدخل إميليا

إميليا: آه ياسيدي، دي جرايم فظيعة حصلت هناك!

عطسيل: إيه؟ دلوقت؟

إميليا : من أقل من ثانية .

عطييل: دا لازم القمرتاه في سكّته وقرب من الأرض أكتر من اللازم فجنّن الناس،

إميليا: كاسيو ياسيدي قتل شاب من البندقية اسمه رودريجو.

عطيل : رودريجو إتقتل ؟ وكاسيو إتقتل ؟ .

إميليسا: لأ، كاسيو ما اتقتلش.

عطيل : كاسير مااتقتلش؟ يبقى الجريمة وقعت في غير محلها، ونغمة الانتقام طلعت نشاز.

دسدمونه: آه، اتقتلت ظلم، ظلم.

إميليا: يارب، إيه الأنين ده؟!.

عطسيل: ده؟ إيه؟

إميليا: يادى المصيبة، دا كان صوت ستى.

تزيح ستاير السرير

النجدة، النجدة ياهر، النجدة، ستى، إتكلمى تانى، دسدمونه

باحلرة ،ستى باحلوه ، اتكلمى .

دسدمونه :أنا باموت من غير ذنب.

إميليا: مين اللي عمل العملة دي؟.

دسدمونه: مافیش حد، أنا نفسی. الوداع. بلغی سلامی لمولای.. آه، الوداع!.

عطميل: لكن دى إزاى اتقتلت؟.

إميليا: باحسرة مين عارف؟.

عطييل: انت سمعتيها بتقول ببقها إنه مش أنا.

إميليا: قالت كده، أنا لازم أبلغ الحقيقة.

عطيل : دى كدابه كدب واحدة رايحة الجحيم، دا أنا اللي قتلتها .

إميليا: آه، دى ملاك وبقت ملاك أكثر، وأكثر، وأنت شيطان وزدت سواد.

عطييل: دى فجرت، واتشرمطت.

إميليسا: إنت بتكدب في حقها، إنت شيطان.

عطيل : دي كانت خدّاعة، زي الميّه.

إميليسا: وأنت تبقى مدمر زى النار لما تقول إنها خداعه، دى كانت صادقة صدق السما.

عطيل : كاسيو نط عليها، إسألى جوزك، دانا يتحكم على بالنزول لقرار الجحيم لو كنت وصلت للحد ده من غير ما يكون معايا حق. جوزك كان عارف الموضوع كله.

إميليا: جرزى؟.

عطيل: جوزك؟

إميليا: قال إنها خانت سرير الزوجية؟

عطيل : أيوه ، مع كاسيو ، دانا من غير كده لوكانت السما عرضت عليه دنيا بحالها قد الدنيا دى ، من حجرة كريمة واحدة ، مافيهاش أى خدش ، لكنت رفضت أبدلها .

إميليا: جوزى؟

عطيل : هو اللي نبهني الأول، راجل أمين ويكره عَفَن الأعمال الوسخة.

إميليا: جوزى.

عطيل : إيه لازمة التكرار ياولية ؟ بأقول جوزك.

إميليا : آه ياستى، تبقى قلة الزّمة عملت من الحب لعبة! جوزى قال إميليا : آه ياستى كدابة؟.

عطيل : هوّه ياولية ، بأقولك جوزك : إنت مش فاهمه معنى الكلمة ؟ صديقي اللي انت متجوزاه ، ياجو الأمين المخلص .

إميليا: لوكان قال كده يبقى العفن ياكل روحه ذرة بذرة كل يوم! دا كداب لقرارة قلبه، دى كانت بتحب إختيارها المزفت أكتر من كده بكتير.

عطيل: هاا

إميليا: اعمل اللي ما بدالك، انت عملتك دى ماتستاهاش لطف السما أكتر ما انت كنت تستاهلها.

عطييل: اسكتى أحسن لك.

إميليا: انت ماتقدرش تأذيني نص الأذى اللي أنا أقدر استحمله يا مخدوع، يامغفل، ياجاهل زى كوم الزبالة، انت عملت عمله... (يهددها بسيفه) أنا سيفك ما يهمنيش أنا حاخلي الدنيا كلها تعرف ولو خسرت حياتي عشرين مره، النجدة، النجده ياهوه، النجدة! المغربي قتل ستى، الجريمة، الحريمة!

يدخل مونتانو وجراسيانو وياجو

مونتاتو: إيه الموضوع؟ جرى إيه ياسيادة القائد؟.

إميليا: آه، انت جيت يا ياجو؟ إنت لازم عملت عمله سودة اللي بتخلى الناس تركب جرايمها في رقبتك.

جراسيانو: إيه الحكاية؟.

إميليا: كدب الوغد ده لو كنت راجل، دا بيقول إنك قلت له إن مراته كانت خاينه، أنا عارفه إنك ما قلتش، إنت مش سافل للدرجة دى، إنطق، أنا قلبى انعلا.

ياجـــو: أنا قلت له فكرى، وما قلتلوش كلام أزيد من اللي هو نفسه لقاه مضبوط وصحيح.

إميليا: لكن عمرك قلت له إنها كانت بتخونه؟.

باجــو: قلت.

إميليا : تبقى قلت كدبه، كدبه بغيضه، لعينة! بحق روحى كدبة، قاسية، هي خانته مع كاسيو؟ إنت قلت مع كاسيو؟.

ياجمع كاسير، ياست، روحى بقى وامسكى لسانك.

إميليا: أنا مش راح أمسك لسانى، أنا لازم أتكلم، ستى راقده هنا، مينه في السرير.

الجميع : يا ساتر يارب!

إميليا: وانت أكاذيبك هي اللي حثت على الجريمة.

عطييل: نعم، ماتندهشوش ياساده، دى حقيقة.

جراسيانو: حقيقة غريبة.

مونتاتو: فعل فظيع!

إميليسا: خيانة، خيانة، خيانة، أنا بافكر فيها، شامة ريحتها، يادى الخيانة! أنا فكرت كده ساعتها، الحزن راح يقتلنى! يادى الخيانة، يادى الخيانة!.

ياجـــو: جرى إيه؟ إنت إنجنينتى؟ روحى البيت بالأمر.

إميليا: يا أسيادي، ياكرام، سيبوني أتكلم. نعم، واجبى أطيعه ... بس مش دلوقت، أنا يمكن يا ياجو عمرى ما حاحط رجلي في الست.

عطيل: آه، آه، آه. (يرتمي على السرير)

إميليا : آيوه، خليك مرمى هناك وأملا الدنيا زئير، ، علشان انت قتلت أحلى بريئة رفعت عينها للسما.

عطيل : أوه ، كانت مش طاهرة ، أنا ماانتبهتش لك يا عمى ، بنت أخوك راقدة هناك ، اللي الإيدين دى فعلا كتمت أنفاسها ، أنا عارف إن ده فعل مروع وقاسى .

جراسيانو: دسدمونه يا مسكينه،أنا سعيد اللي والدك مات، اختيارك

أجهز عليه والحزن وحده استهلك خيط عمره الطويل، لو كان عايش دلوقت، لكان المشهد ده خلاه يعمل عمل ، نعم، كان زاح ملاك الخير عن كتفه وسقط بين المغضوب عليهم.

عطليل : شيء محزن لكن ياجو يعرف إنها ارتكبت العار مع كاسيو ألف مرة، كاسيو إعترف، وهي توجت أعمال عشقها بأول تذكار وعهد على الحب أنا اديته لها، أنا شفته، كان منديل، رمز قديم، والدى إداه لوالدتى.

إميليا: يا الله! يارب السما!.

ياجـــو: اخرسي، امسكى لسانك!.

إميليا: أخرس، أخرس،أنا أمسك لسانى، لا، دا أنا حاتكام، اللى يمسك لسانى يبقى يمسك الريح، خلى السما، خلى العالم، خلى الشياطين، خليهم كلهم يقولوا، عيب عليكى، برضه حاتكلم.

ياجــو: خليكي عاقلة وروحي البيت.

إميليا : مش حاروح.

باجو يسل سيفه ويهدد إميليا

جراسیانر: عیب! تسل سیفك على واحده ست؟

إميليا: إنت يامغربى، ياغبى، المنديل اللى انت بتتكلم عنه، أنا لقيته بالصدفة واديته لجوزى لأنه بإلحاح شديد أكتر م اللازم عشان حاجه تافهه زى دى كان كل ساعة والتانية يترجانى إنى أسرقهوله.

ياجسو: أما عاهرة حقيرة!

إميليا : هيه إديته لكاسيو؟ مع الأسف لأ، أنا لقيته، وأنا بإيدى إديته لجوزى.

ياجـــو: بتكدبى، ياقذرة!

إميليا : بحق السما أنا ما باكدب ياحضرات! إنت يانطع ياسفاح، إيه اللي كان لم واحد مغفل زيك على ست أميرة بالشكل ده ؟!.

عطييل: هي السما مافيهاش حجر إلا للرعد؟ يا أبشع ندل!.

يهجم على باجو، مونتانو يجرده من سلاحه، ياجو يطعن إميليا من الخلف ويخرج

جراسيانو: الولية بتقع، دا أكيد قتل مراته.

إميليا: آي، آي، مددوني جنب ستي.

جراسیانو: هو جری لکن مراته إتقتلت.

مونتانو: دا ندل ممعن في الندالة، خدوا السلاح ده اللي أنا انتزعته من المغربي؛ وياللا ، إحرسوا الباب من بره ، إوعوا تخلوه يطلع ، لو حاول اقتلوه . أنا رايح أشوف الندل اللي هرب راح فين ، عشان دا عبد ملعون .

الكل يخرج ما عدا عطيل وإميليا

عطيل: ولاعندى شجاعة كمان، بل أول هلفوت مسفرت يقدر ياخد سيفى. لكن الشرف راح يفضل ليه بعد ما ضاع الضمير؟ خلى كل شيء يروح.

إميليا: هيه غنوتك كانت بتنذر بإيه ياستى؟ إسمعى انت مش قادرة

تسمعینی؟ أنا راح أمثل البجعة وأموت فی لحنها، (تغنی):
یاشجرة الصفصاف، الصفصاف، الصفصاف، یامغربی،
دی کانت طاهرة، وکانت بتحبك یامغربی، یاقاسی، أنا
زی مابقول الحق روحی حاتلاقی نعیمها، زی ماکلمتی
مخلصة لفکری راح أموت، أموت. (تعسوت)

عطيل: أنا عندى سيف تانى فى الأوده دى، سيف فولاذ من أسبانيا مسقى فى ميه بارده زى التلج، آه، أهو هنا. ياعمى، أنا لازم أخرج.

جراسيانو: (من الخارج) إنت لوحاولت حاتكلفك المحاولة غالى، إنت مجرد من السلاح وبالتالى لازم تخضع.

عطيل : إذن ادخل شُغنى واتكلم معايا، وإلا راح أهاجمك زى ما أنا عريان، (يدخل جراسيانو)

جراسيانو: إيه الموضوع؟

عطیل: شایف، أنا معایا سلاح مافیش جندی حط علی فخده أحسن منه، أنا شفت الیوم اللی فیه بقوة السلاح الصغیر ده وبقوة السیف السیف المخلص ده، شقیت بطریقی وسط عوائق أقوی من وقفتك عشرین مرة، لكن آه من التفاخر الفارغ، مین اللی یقدر یتحكم فی قدره؟ الأمر مختلف دلوقت، ماتخافش وإن كنت شایفنی متسلح، هنا نهایة رحلتی، هنا خاتمتی وعلامة الحد الأخیر اللی ینطوی عنده شراعی، إنت

بترجع لورا مفزوع؟ دا خوف مالوش معنى. عطيل، بس صوب عليه قشاية يتقهقر، حايروح فين عطيل؟

يروح للسرير

دلوقت، هيئتك إزيها دلوقت؟ آه يا أموره ياقليلة الحظ، شاحبة زى توبك، لما حانتقابل يوم الحساب، مظهرك ده راح يحدف روحى من السما تتلقطها الشياطين، باردة، باردة يابنتى، زى نقاوة عفتك. ياعبد ياللى إنكتبت على اللعنة، وانتوا ياشياطين، ماتطردونى بكرابيجكم من سحر المنظر السماوى ده، إرمونى فى مهب الرياح، إشوونى فى الكبريت، اغسلونى فى خلجان غويطة من النار السايلة، آه يادسدمونه، دسدمونه ميته، ميته، آه، آه.

یدخل لودوفیکو ومونتانو وظباط معاهم یاجو سجین وکاسیو فی کرسی

لودوفيكو: فين الراجل العنيف، البائس ده؟.

عطيل : قصدك ده اللي كان عطيل ؟ أنا هنا.

لودوفيكو: وفين التعبان الخبيث؟ هاتو الاسفل.

عطيل : أنا بابص لرجليه (۱) ، لكن دا وهم . نو انت شيطان ، ما أقدر ترفي أقتلك . (يجرح ياجو)

لودوفيكو: انزعوا سلاحه.

عطيل :أنا كمان مس أسفان، أفضل تعيش، عشان الموت في رأيي سعاده.

⁽١) الشيطان له رجلين بحوافر.

لودرفيكو: أنت ياعطيل، ياللي كنت في الماضي أمير فوق الحد، تقع في ألاعيب ندل ملعون زي ده؟ نقول عنك إيه؟.

عطييل: إيه؟ أى حاجه، قاتل شريف، إذا حبيت، علشان مافيش شيء من اللي عملته صدر عن الكره، إنما عن الشرف.

لودرفیکو: الوغد ده اعترف جزئیا بجریمته، هل انت اتآمرت معاه علی قتل کاسیو؟

عطيل : أيوه .

كاسيو: يا عزيزي القائد، أنا عمرى ما عملت حاجة تبرر ده.

عطيل : أنا مصدق، اسأل عفوك، ممكن أرجوك تسأل الراجل نص الشيطاني ده ليه وقعني في شباكه، روح وجسد.

ياجـــو: ماتسألنيش أي حاجة، أنت تعرف اللي انت تعرفه، منهنا وطالع مش حانطق بحرف.

لودوفيكو: إيه، ولا للصلاه؟.

جراسيانو: التعذيب راح يفتح بقه.

عطييل: السكوت أحسن حاجة تعملها.

لودوفیکو: یاسید، إسمع اللی جری واللی انت فیما أعتقد، لسه ماعرفتهوش، آدی جواب لقیناه فی جیب رودریجو اللی انقتل، وآدی جواب تانی، واحد منهم یستفاد منه إن قتل کاسیو کان مکلف بیه رودریجو.

عطيل : الندل.

كاسيو: لاكفر ولابشاعة أكتر من كده.

لودوفيكو : الثانى، جواب سخط، لاقيناه فى جيبه برضه، دا يظهر جواب كان رودريجو ناوى يبعته للمجرم الملعون ده، لولا إن ياجو، على مايبدو، لحقه ساعتها وأقنعه.

عطييل: الوغد الخبيث، إزاى المنديل اللي كان بناع مراتى جاه في إيدك يا كاسيو؟

كاســـيو: لقيته في بيتي. هو نفسه لسه معترف دلوقت إنه سابه هناك لغرض في نفسه ونجح في تحقيقه تمام.

عطيل : الجنون، الجنون، الجنون!

كاسبيو: غير كده جواب رودريجو فيه مؤاخذه موجهه لياجو، لأنه خلاه يتحدانى فى دار الحرس، وكانت النتيجة إنى انظردت، بل بعدما افتكرناه ميت مدة طويلة، اتكام لسّه دلوقت وقال إن ياجو هو اللى طعنه، ياجو هو مرتكب الجريمة.

لودرفيكر: (لعطيل) إنت لازم تسيب الحجرة دى وتيجى معانا، سلطتك وقيادتك له انشالت منك، وكاسيو هو اللى بيحكم قبرص، أما عن الوغد الخسيس ده، فإذا كان فيه تفنن فى القساوة ممكن يعذبه كتير ويحتفظ به حى زمن طويل، فده حايكون معمول عشانه، أما انت فراح تفضل سجين لغاية دولة البندقية ماتعرف المآخذ اللى عليك، ياللا، خدوه،

عطيل : بشويش، كلمة أو كلمتين قبل الرحيل، أنا أديت للدولة بعض الخدمات، وهما عارفين، بلاش كلام في ده، أرجوك لما

تذكر في رسايلك الوقائع المؤلمة دي، تتكلم عنى زى ما أنا، لا تخفف من شيء، ولا تتحامل في شيء، ساعتها راح تتكلم حتما عن راجل حب من غير حكمة، لكن حب تمام، راجل مش سهل يغير، لكن لما انصاد في الغيرة، ارتبك وجوده آخر ارتباك؛ راجل رمى من إيده، زيه زى الهندى اللي لسه ماتحضرش، لؤلؤة أغلى من قبيلته كلها؛ راجل عينيه اللي ما اتعودتش تتبل، لما انهزمت انذرف منها الدمع كأنها شجرة في بلاد العرب صمغها الشافي انسال جرى، دون كل ده وضيف عليه إني مره في حلب شفت تركى معمم، خسيس، بيضرب مواطن من البندقية وبيسب دولتها، فمسكت الكلب المختون من حنجرته وطعنته طعنة دي دي.

يطعسن نفسسه

لودوفيكو: يادى الخاتمة المتلطخة بالدم.

جراسیانو: کل کلم بعد کده زیاده.

عطسيل: أنا قبل ماقتلتك بوستك، ما عدشى فيه مخرج غير قتل نفسى، ميت على بوسه.

يقع على السرير.. ويموت


كاسبير: أنا كنت خايف يعمل كده، بس كنت فاكر ما معاهوش

سلاح؛ لأنه صاحب قلب فخور.

لودوفيكو: (لياجو) إنت ياكلب إسبرطى() ، يا أشد ضراوة من الكرب، من الجوع أو م البحر، بص شوف الحمل المأسوى اللي على السرير ده، دا صنعك، مشهد يسمم البصر، إخفوه عن العين، جراسيانو، احتفظ بالبيت واستولى على أملاك المغربي لأنها تؤول لك بالوراثة. سيادة الحاكم، إنت اللي يرجع لك الحكم في شأن الوغد الجهنمي ده، المكان والزمان والتعذيب، آه خليه شديد، أما أنا، فراح أبحر فورا أبلغ بقلب حزين خبر الفعل الحزين.

خسروج

*** انتهـــــى ***



⁽١) كانت كلاب أسبرطه، حسب ما بيتقال، تستخدم في صيد الدببه، ووصف اسبرطي معناه بوجه العموم: لا يتأثر بشيء ولا يحيد عن اللي صمم عليه، عن أردن.

3 na



الناشر مكتبة الأنجلو المصرية ١٦٥ ش محمد فريد ـ القاهرة